

合刻蔡忠惠詩集別紀序

僊游蔡忠惠先生千古之名流八閩
之先哲也歐陽文忠稱其著作清適
粹美殊爲定案又嘗讀王梅溪序謂
文以氣爲主而公之詩文實出於氣
之剛此語更覺傳神金之利也有時



而鈍石之堅也有時而瑕爲其剛於
質而非剛於氣也氣之剛稟天地以
生而還可塞天地巖巖獨立亭亭軒
舉在家爲孝子在邦爲忠臣摛於筆
墨有不磨之精華布於經綸有不朽
之事業延於子孫有無窮之福澤榮

不係於高位壽不關於長生與日星
俱耀不與廟社俱墟與山川同靈不
與草木同腐是則剛氣之所爲孟氏
所謂浩然而孔夫子所歎未見也忠
惠事仁英兩朝直諫有聲其赫赫者
在除授非當輒封還與不書溫成皇

后父碑文此昔人所云一諤諤勝百
諾諾者也他如剖決之捷撫字之勞
經費之悉所至史不一書而古五塘
之開丁口稅之減浮屠蠱毒之禁萬
安之濟七十里之松則皆千百載梓
里之膏澤也竊以爲維桑共食甘棠

之芘而後生莫闡先進之幽亦吾閩
有憾之世界也偶太僕丁先生擊楫
欲南余以舊下走追而送之江之滸
先生有物在袖中如延津之劍光怪
逼人出以相示則忠惠之詩集別紀
爲宋子比玉所編輯而增補者太僕

將別語刺刺不能休欲余授剖劂爲
忠惠廣其傳且捐俸先之余唯唯不
敢辭乃於樽俎之餘簡畫而攷數點
而稽盡訂其亥豕魯魚之謬始付諸
梨棗復向諸枌榆之一時聚首畱都
者各募其素絲以供工人之餼廩閱

五旬而臻厥成是篇出雖未傾蜃樓
之萬寶聊足備豹胎之一臠矣或謂
詩集以存先生之風雅何取於別紀
之瑣屑不知古人之精神無處不到
每於日用飲食之間會出許大名理
安在書法鑒賞爲莊生之逍遙而茶

事荔品非楊子之太玄哉從來下如
韋布上如公卿有先生之才未必有
先生之遇不亦當時則榮歿則已焉
先生當年無崇階峻秩之貴而上元
則有觀燈之諭龍圖閣則有觀書之
召羣玉殿之賜宴御筆之賜字母夫

人之賜冠帔凡所獻詩章之有詔答
對天顏如家人父子取玉音若友朋
尺牘皆極人臣未有之遭且也橋左
之祠觀碑羣而頌德道旁之墓攀枝
莫不流涕至於斷簡殘珉數行隻字
淘沙所見掘塚所獲猶能重連城之

價而致千金之購自非一種剛氣不可消滅而同氣之妙於相求何以有此此一舉也勞苦功高非宋子吾誰與歸蓋宋子博綜今古又生長於莆其先世評事公與忠惠有葭莩之好故忠惠始末宋子知之獨詳不然上

下數百年江山已不可復識忠惠之文業與其人俱往孰表而出之卽如漳南十詠其中所題南溪西湖陳將軍廟皆至今存而佳句悉歸之無何有之鄉至今日而始爲丹霞生色余故曰宋子勞苦而功高也集紀計百

餘板刻就苦無安頓處因思吾閩有
一拂祠在清涼寺東偏其地高敞幽
潔宜於藏書遂携而貯之此中與西
塘集並垂琬琰且使蔡之忠鄭之清
合之而成雙美後有君子以覽觀焉
想當令金陵紙貴矣

天啓壬戌嘉平月望日龍溪後學顏
繼祖書於太常官舍



蔡忠惠集序



文以氣爲主非天下之剛者莫能之古今能文之士非不多而能傑然自名於世者亡幾非文不足也無剛氣以主之也孟子以浩然克塞天地之氣而發爲七篇仁義之書韓子以忠犯逆鱗勇叱三軍之氣而發爲日光玉潔表裏六經之文故孟子闢楊墨之功不在禹下而韓子觝排異端攘斥佛老之功又不在孟子下皆氣使之然也若二子者非天下之至剛者歟國朝四葉文章尤盛歐陽文

忠公徂徠先生石守道河南尹公師魯莆田蔡公
君謨皆所謂傑然者文忠之文追配韓子其剛氣
所激尤見於責高司諫書徂徠之氣則見於慶曆
聖德頌師魯則見於願與范文正同貶之書君謨
則見於四賢一不肖詩嗚呼使四君子者生於吾
夫子時則必無未見剛之歎而乃同出於吾仁祖
治平醇厚之世何其盛歟夫以臺諫之風采朝士
莫不畏其筆端自侍從而下奔走伺候其門者紛
然也文正鄱陽之貶余尹歐旣與之同罪矣蔡公

乃於四賢相繼黜謫之後形於歌詩而斥爲不肖
羞其見縉紳之面而辱甚市朝之撻則公之剛又
可知也十朋初見其詩於張唐英所撰仁英政要
甚歆慕之其後見公文集乃沒而不載竊以爲恨
乾道四年冬得郡溫陵道出莆田望公故居裴回
顧歎而不忍去入境訪公遺迹則首見所謂萬安
橋者與大書深刻之記爭雄且深惜其有濟川之
才而不至於大用登愛松堂九日山則又見公之
詩與其真蹟猶在凜然有生意如見其正顏色坐

黃堂時也蓋公至和嘉祐間嘗兩守是郡至今泉
人稱太守之賢者必以公爲首求其遺文則郡與
學皆無之可謂缺典矣於是移書興化守鍾離君
松傳君自得訪於故家而得其善本教授蔣君讎
與公同邑而深慕其爲人手校正之鈇板於郡庠
得古律詩三百七十首奏議六十四首雜文五百
八十四首而以四賢一不肖詩置諸卷首與奏議
之切直舊所不載者悉編之比它集爲最全且屬
予序之予曰端明公文章文忠公嘗稱其清適粹

美後雖有善文辭好議論者莫能改是評也予復
何云然竊謂文以氣爲主而公之詩文實出於氣
之剛入則爲蹇諤之臣出則爲神明之政無非是
氣之所寓學之者宜先涵養吾胸中之浩然則發
而爲文章事業庶幾無媿於公云五年十月永嘉
王十朋序



蔡忠惠公集

本傳

蔡襄字君謨興化僊游人舉進士為西京留守推
 官館閣校勘范仲淹以言事去國余靖論抅之尹
 洙請與同貶歐陽修移書責司諫高若訥由是三
 人者皆坐遣襄作四賢一不肖詩都人士爭相傳
 寫鬻書者市之得厚利契丹使適至買以歸張於
 幽州館慶曆三年仁宗更用輔相親擢靖修及王
 素為諫官襄又以詩賀二人列薦之帝亦命襄知

諫院襄喜言路開而慮正人難久立也乃上疏曰
朝廷增用諫臣修靖素一日被命朝野相慶然任
諫非難聽諫爲難聽諫非難用諫爲難三人忠誠
剛正必能盡言臣恐邪人不利必造爲禦之之說
其禦之之說不過有三臣請爲陛下辯之一曰好
名夫忠臣引君當道論事惟恐不至若避好名之
嫌無所陳則土木之人皆可爲矣二曰好進前世
諫者之難激於忠憤遭世昏亂死猶不辭何好進
之有近世獎拔太速但久而勿遷雖死是官猶無

悔也三曰彰君過諫諍之臣蓋以司過舉耳人主
聽而行之足以致從諫之譽何過而能彰至於巧
者亦然事難言則喑而不言擇其無所忤者時一
發焉猶或不行則退而曰吾嘗論某事矣此之謂
好名默默容容無所愧耻躡資累級以挹顯仕此
之謂好進君有過失不揀之於未然傳之於天下
後世其事愈不可掩此之謂彰君過願陛下察之
毋使有好諫之名而無其實時有旱蝗日食地震
之變襄以爲災害之來皆由人事數年以來天戒

屢至原其所以致之之由君臣上下皆闕失也不
顯聽斷不攬威權使號令不信於人恩澤不及於
下此陛下之失也持天下之柄司生民之命無嘉
謀異畫以矯時弊不盡忠竭節以副任使此大臣
之失也朝有弊政而不能正民有疾苦而不能去
陛下寬仁少斷而不能規大臣循默避事而不能
斥此臣等之罪也陛下既有引過之言達於天地
神祇矣願思其實以應之疏出聞者皆竦然進直
史館兼修起居注襄益任職論事無所回撓開寶

浮圖災下有舊瘞佛舍利詔取以入宮人多灼臂
落髮者方議復營之襄諫曰非理之福不可徼幸
今生民困苦四夷驕慢陛下當修人事奈何專信
佛法或以舍利有光推爲神異彼其所居尚不能
護何有於威靈天之降災以示儆戒顧大興工役
是將以人力排天意也呂夷簡平章國事宰相以
下就其第議政事襄奏請止之元昊納款始自稱
兀卒旣又譯爲吾祖襄言吾祖猶云我翁慢侮甚
矣使朝廷賜之詔而亦曰吾祖是何等語邪夏竦

蔡忠惠言集 本傳 三
罷樞密使韓琦范仲淹在位襄言陛下罷竦而用
琦仲淹士大夫賀於朝庶民歌於路至飲酒叫號
以爲歡且退一邪進一賢豈遂能關天下輕重哉
蓋一邪退則其類退一賢進則其類進衆邪並退
衆賢並進海內有不泰乎雖然臣切憂之天下之
勢譬猶病者陛下旣得良醫矣信任不疑非徒愈
病而又壽民醫雖良術不得盡用則病且日深雖
有和扁難責效矣保州卒作亂推懦兵十餘輩爲
首惡殺之以求招撫襄曰天下兵百萬苟無誅殺

決行之令必開驕慢暴亂之源今州兵戕官吏閉
城門不能討從而招之豈不爲四方笑乞將兵入
城盡誅之詔從其議以母老求知福州改福建路
轉運使開古五塘溉民田奏減五代時丁口稅之
半復修起居注唐介擊宰相觸盛怒襄趨進曰介
誠狂愚然出於進忠必望全貸旣貶春州又上疏
以爲此必死之謫得改英州温成后追冊請勿立
忌而罷監護園陵官進知制誥三御史論梁適解
職襄不草制後每除授非當職輒封還之帝遇之

益厚賜其母冠被以示寵又親書君謨兩字遣使
特詔予之遷龍圖閣直學士知開封府襄精吏事
談笑剖決破姦發隱吏不能欺以樞密直學士再
知福州郡士周希孟陳烈陳襄鄭穆以行義著襄
備禮招延誨諸生以經學俗重凶儀親亡或秘不
舉至破產飯僧下令禁止之徙知泉州距州二十
里萬安渡絕海而濟往來畏其險襄立石爲梁其
長三百六十丈種蠶於礎以爲固至今賴焉又植
松七十里以庇道路閩人刻碑紀德召爲翰林學

士三司使較天下盈虛出入量力以制用剗剔蠹
弊簿書紀綱纖悉皆可法英宗不豫皇太后聽政
爲輔臣言先帝旣立皇子宦妾更加熒惑而近臣
知名者亦然幾敗大事近已焚其章矣已而外人
遂云襄有論議帝聞而疑之會襄數謁告因命擇
人代襄襄乞爲杭州拜端明殿學士以往治平三
年丁母憂明年卒年五十六贈吏部侍郎襄工於
書爲當時第一仁宗尤愛之製元舅隴西王碑文
命書之及令書温成后父碑則曰此待詔職耳不

奉詔於朋友尚信義聞其喪則不御酒肉爲位而
哭嘗飲會靈東園坐客誤射矢傷人遽指襄他日
帝問之再拜愧謝終不自辯蔡京與同郡而晚出
欲附名閥自謂爲族弟政和初襄孫佃廷試唱名
居舉首京侍殿上以族孫引嫌降爲第二佃終身
恨之乾道中賜襄謚曰忠惠

墓誌

歐陽修

公諱襄字君謨興化軍僊游人也天聖八年舉進
士甲科爲漳州軍事判官西京畱守推官改著作

佐郎館閣校勘慶曆三年以秘書丞集賢校理知
諫院兼修起居注是時天下無事士大夫弛於久
安一日元昊叛師久無功天子慨然厭兵思正百
度以修太平旣已排羣議進退二三大臣又詔增
置諫官四員使拾遺補闕所以遇之甚寵公以材
名在選中遇事感激無所迴避權倖畏歛不敢撓
法干政而上得益與大臣圖議明年屢下詔書勸
農桑興學校革弊修廢而天下悚然知上之求治
矣於此之時言事之臣無日不進見而公之補益

爲尤多四年以右正言直史館出知福州以便親
遂爲福建路轉運使復古五塘以溉田民以爲利
爲公立生祠于塘側又奏減閩人五代時丁口稅
之半丁父憂服除判三司鹽鐵勾院復修起居注
今叅知政事唐公介時爲御史以直言忤旨貶春
州別駕廷議無敢言者公獨論其忠人皆危之而
上悟意解唐公得改英州遂復召用皇祐四年遷
起居舍人知制誥兼判注內銓御史呂景初吳中
復馬遵坐論梁丞相適罷臺職除他官公封還辭

頭不草制其後屢有除授非當者必皆封還之而
上遇公益厚曰有子如此其母之賢可知命特賜
冠帔以寵之至和元年遷龍圖直學士知開封府
三年以樞密直學士知泉州徙知福州未幾復知
泉州公爲政精明而於閩尤知其風俗至則禮其
士之賢者以勸學興善而變民之故俗除其甚害
往時閩人多好學而專用賦以應科舉公得先生
周希孟以經術傳授學者常至數百人公爲親至
學舍執經講問爲諸生率延見處士陳烈尊以師

禮而陳襄鄭穆方以德行著稱鄉里公皆折節下
之閩俗重凶事其奉浮屠會賓客以盡力豐侈爲
孝否則深自愧恨爲鄉里羞而姦民游手無賴子
幸而貪飲食利錢財來者無限極往往至數千百
人至有親亡秘不舉哭必破產辦具而後敢發喪
者有力者乘其急時賤買其田宅而貧者立券舉
債終身困不能償公曰弊有大於此邪卽下令禁
止至於巫覡主病蠱毒殺人之類皆痛斷絕之然
後擇民之聰明者教以醫藥使治疾病其子弟有

不率教令者條其事作五戒以教諭之久之閩人
大便公旣去閩人相率詣州請爲公立德政碑吏
以法不許謝卽退而以公善政私刻于石曰俾我
民不忘公之德嘉祐五年召拜翰林院學士權三
司使三司開封世稱省府爲難治而易以毀譽居
者不由以遷則由以敗而敗者十常四五公居之
皆有能名其治京師談笑無畱事尤喜破姦發隱
吏不能欺至商財利則較天下盈虛出入量力以
制用必使下完而上給下暨百司因習蠹弊切磨

剗剔久之簿書纖悉紀綱條目皆可法七年季秋
大享明堂後數月仁宗崩英宗卽位數大賞賚及
作永昭陵皆猝辦於縣官經費外公應煩愈閒暇
若有餘而人不知勞遂拜三司使居二歲以母老
求知杭州卽拜端明殿學士以往三年徙南京畱
守未行丁母夫人憂明年八月某日以疾卒于家
享年五十有六蔡氏之譜自晉從事中郎克以來
世有顯聞其後中衰隱德不仕公年十八以農家
子舉進士爲開封第一名動京師後官于閩典方

州領使一路二親尚皆無恙閩人瞻望咨嗟不榮
公之貴而榮其父母母夫人尤有壽年九十餘飲
食起居康強如少者歲時爲壽母子鬢髮皆皤然
而命服金紫煌煌如也至今閩人之爲子者必以
夫人祝其親爲父母者必以公教其子也公於朋
友重信義聞其喪則不御酒肉爲位以哭盡哀乃
止嘗會飲會靈東園坐客有射矢誤傷人者客遽
指爲公矢京師喧然事旣聞上以問公公卽再拜
媿謝終不自辯退亦未嘗以語人公爲文章清道

粹美有文集若干卷工於書畫頗自惜不妄爲人書故其殘章斷稿人悉珍藏而仁宗尤愛稱之御製元舅隴西王碑文詔公書之其後命學士撰溫成皇后碑文又勅公書則辭不肯書曰此待詔職也公累官至禮部侍郎既卒翰林學士王珪等十餘人列言公賢其亡可惜天子新卽位未及識公而聞其名久也爲之惻然特贈吏部侍郎官其子旻爲秘書省正字孫傳及弟之子均皆守將作監主簿而優以賻卹以旻尚幼命守吏助給其喪事

曾祖諱顯皇不仕祖諱恭贈工部員外郎父諱琇贈刑部侍郎母夫人盧氏長安郡太君夫人葛氏永嘉郡君子男三人曰勻將作監主簿曰勻大理評事皆先公卒幼子旻也女三人一適著作佐郎謝仲規二尚幼以某年某月某日葬公於莆田縣某鄉將軍山銘曰

誰謂閩遠而多竒產產非竒寶惟士之賢嶷嶷蔡公其人傑然奮躬當朝讜言正色出入左右彌縫補益間歸于閩有政在人食不畏蠱喪不憂貧疾

者有醫學者有師問誰使然孰不公思有高其墳
有拱其木凡閩之人過者必肅

祭文

歐陽修

維年月日具官修謹遣三班奉職指使李敷以清
酌庶羞之奠致祭于故端明殿學士尚書吏部侍
郎蔡公君謨之靈曰嗚呼盛必有衰而生必有死
物之常理也生爲可樂而死爲可哀人之常情也
而又有不幸于其間者宜其爲恨于無窮也自公
之奮起徒步而名動京師遂登朝廷列侍從其年

壯志銳而意氣橫出材宏業茂而譽望偉然方公
之輝華顯赫之時而其親享壽考康寧之福夫得
祿及親人以爲幸也而公以榮名顯仕爲之養綵
衣而戲昔以爲孝也而公以金章紫綬悅其顏使
天下爲子者莫不欲其親如公之親爲父母者莫
不欲其子如公之爲子也其榮且樂可謂盛哉及
其衰也母夫人喪猶在殯而公已臥病于苦塊之
間而愛子長而賢者遽又卒于其前遂以奄然而
瞑目一孤藐然以爲二喪之主嗚呼又何其不幸

也此行路之人聞之皆爲之出涕况于親戚朋友乎况如修者與公之遊最久而相知之最深者乎夫世之舉遠以爲言者不過曰四海而閩負南海齊臨東海使修不得躬一觴之奠寫長慟之哀此其爲恨又可涯哉尚饗

福州府志

蔡襄字君謨僊游人天聖進士由右正言直史館
元德初親出知福州事始復古之五塘又奏減五代時州民丁口稅之半陞本路轉運使尋以父喪

去嘉祐初以樞密直學士禮部郎中再知福州疏導附郭河浦以溉民田首延周希孟以經學授諸生親臨勸講尊處士陳烈以師禮陳襄鄭穆輩以德行稱皆折節下之作五戒以教民若浮屠巫覡蓄蠱之言一切禁止閩俗丕變州民刻石以紀其政卒贈吏部侍郎加贈少師謚忠惠

東越文苑

蔡襄字君謨僊游農家子也天聖八年舉進士爲開封第一景祐三年襄爲館閣校勘當此時范仲

淹以言事忤丞相呂夷簡落職知饒州集賢校理
余靖諫上曰陛下自親政以來屢逐言事者恐鉗
天下之口於是落職知筠州酒稅館閣校理尹洙
請與范仲淹同貶斥監處州酒稅司諫高若訥知
上貴幸丞相遂莫敢言校理歐陽修移書責之若
訥怒上其書修貶夷陵令於是襄乃作四賢一不
肖詩詩成都下爭傳寫之鬻書者手腕幾脫會契
丹使者至亦購數十本以歸於是襄之名聞于夷
狄襄數好切諫不肯從吏承意以阿主取容久之

求知福州以便養母襄之知福州也以經術傳授
學者常數百人師尊處士陳烈平交陳襄鄭穆福
州大治襄爲文章清遒粹美而詩凜然有生意尤
工于書畫頗自惜不妄與人故其殘箋斷簡人悉
珍藏之而仁宗最爲賞愛嘗御製元舅隴西王碑
文詔襄書之其後命學士撰溫成皇后碑文又詔
襄書襄則辭不肯曰此待詔職也官終端明殿學
士禮部侍郎卒謚忠惠所著詩文三十六卷軼不
傳惟荔支譜貢茶錄行于世

莆陽文獻

公會祖諱顯皇不仕祖諱恭贈工部員外郎父諱
琇贈刑部侍郎弟高字君山第景祐元年進士調
長溪尉遷開封府太康縣主簿卒于官年二十八
歐陽公銘其墓公三子勺勺旻皆早世勺子傳歷
朝奉郎通判南京畱守司四十三卽上章乞致仕
傳子三人長楠字子強大觀三年與從父佃同登
進士歷官朝奉郎直秘閣知泉州乃公舊治爲政
得公之家法人謂有祖風烈官至朝奉大夫次樞

以政和五年同從父伸登第歷官西京提舉學司
主管文字御史樞子頤孫師言敷言皆登第次楸
字子堅欽宗朝以父任尉會昌遇贛賊力戰遇害
贈承事郎官其子顓贈朝散大夫伸字伸道公季
子旻之子也伸與兄佃佃入太學俱有聲號三蔡
佃崇寧初進士第二官至朝奉郎伸政和五年進
士遷通判移滁州改知徐州德和安四州伸與秦
檜同年後忤檜除浙東帥司叅謀官官至左中大
夫伸子洸居雪川以父任補官以公未易名請于

蔡忠惠詩集 文獻
朝得謚忠惠官至戶部尚書徽猷閣學士從孫戡
居毘陵乾道中第進士官至寶閣直學士

蔡忠惠詩集全編目錄

卷上之上

賦三首

士伸知己賦

季秋牡丹賦 并序

慈竹賦

四言古詩一首 附錄一首

親祀南郊 并表

卷上之下

五言古詩六十四首 附錄九首

姑胥行

鄴陽行

讀樂天篇

期秦伯鎮不至

會亭遇孫公赴闕

過皇甫侍郎

秋思

秋夜書解壁

過漁溪驛二首

安靜堂書示子

卽惠山煮茶

觀宋中道家藏書畫

遊冲虛觀

題延平閣

釣龍臺

遊鼓山靈源洞

新作春野亭

春野亭待月有懷

送許寺丞知古田縣

贈勤師

和黃介夫憶竹

龜山夜泊書事

碧峰亭

遷陽道中寄楊正臣同年

泊吳江寄胡武平

任山歸河東

寄襄城孫主簿

送安思正之蜀

和永叔酬答寄聖俞

送胡武平出守吳興

楊叔武北堂夜話

過白樂天墳

陪諸君會史館園

和王勝之遊普明院

寄題滁州豐樂亭

卷之八 詩集 目錄
達觀亭

聖泉

端居述懷

別小欄花木

北苑十咏

西齋秋暑

胡鴈

題周著作萃賢亭

瞻禮開師像

雨晴早出

訪天台菴

和吳省副青梅

留別舊居花檻

南都思杜祁公

登馬子山觀漕亭

西湖四月八日觀放生

和王學士芍藥

題將軍巖

宋宣獻公輓詞

七言古詩二十八首 附錄二首

御筆賜字詩

四賢一不肖詩五首

至和襍書五首

憶弟

寒食梨花小飲

道中寄福州王祠部

送楊渥赴西安主簿

送李山英以疾歸田

送何秘書三子應詔

餞送解發進士

聖泉寺松徑

題譙國評事壁

送勤上人歸吳中

送石昌言知宿州

答葛公綽求猿

戲效柏梁體

和答孫推官

和王學士水車

元日過浦城西陽嶺

丙午二月十二日雜言

卷下之上

五言律詩五十四首 附錄二首

和御製觀三聖御書

溪行

西郊

三月詣陳逋民

次韻翠巖寺

夏晚南墅

蕪陰樓上

和丘提刑寄湖南賈度支

和聞鴈

嵩陽道中

送別陳比部

城西金明池小飲

題僧希元禪隱堂

題杉溪驛二首

病中偶書

發篋得亡友書札

正月侍親還家

三月再還家

題龍紀院僧室

溫成皇后輓詞一首

宋宣獻公輓詞四首

謝杜相公

汾陽夫人輓詞二首

過泗州嶺

寶月法喜堂

寓居興化轉運解舍

仁宗皇帝輓詞六首

洪澤阻風

遊金山寺

開州園縱民遊樂二首

夜雨病中

寄來安孫推官

唐彥猷輓詞二首

七月二十四日射弓

冬温

太湖驛寄建州賓職方

題嚴先生祠堂

宋宣獻公夫人哀詞二首

宴桃杏園

游靈峰院龍龕山

七言律詩一百九首 附錄八首

上元進詩

久寓悟空刹行而書之

漳南十咏

耕園驛佛桑花

酬王知縣賞春不與

喜弟及第

杪秋湖上

和陳殿丞南州新詠

過天津橋

讀離騷經

暮春登南門

福昌院春日花卉最盛

金明池小飲

寒食樂詞

喜除三諫官

送楊殿丞通判睦州

廣陵

馬奴周晬思之因成

江頭別杜殿丞

經錢塘故宮

宿延平雙溪閣

晚上碧峰亭

和王介夫遊西禪

興化軍曹殿丞荔枝

和曹殿丞寄荔枝

國家圖書館 NATIONAL CENTRAL LIBRARY, TAIWAN, R.O.C.

蘇東坡詩集 目錄
飲薛老亭晚歸

和許寺丞泊釣龍臺

寄答王仲儀待制

吳屯驛曉起

憶與蘇才翁會別

懷文雅儼上人

耕園驛

白蓮院東軒

別邵武長史朱照隣

哭賈少卿

和杜相公謝寄茶

城西射弓

答河東轉運楊樂道

過真慧素上人院

杭州訪吉祥璘上人

丙午元日過浦城西陽嶺

丙申五月遊興化西門上溪

謝宋評事荔枝

投阮丈評事

和詩送茶寄孫之翰

詔貢士

福州賞花有所感悼

登四徹亭

寄題張景山太卿園池

仁宗皇帝輓詞

甲辰寒食遊公謹園池

重陽日有美堂南望

和答孫推官見過錢塘二首

和登有美堂

和登安濟亭

和江上觀潮

和答孫推官

和古寺偃松

和新燕

遣興

寒食西湖

上巳日杭州東園

四日清明西湖

十日西湖晚歸

十五日遊龍華淨明兩院

十八日吉祥院看牡丹

二十二日山堂小飲和元郎中

答孫推官

和孫推官憶徑山遊

答孫推官南屏舊遊

和登安濟亭

和王學士舟次德清見寄

和運使學士芍藥篇

游煙霞洞

和錢端明遊南屏山

清暑堂會同年

中秋夜飲

上元同飲

客至自京師因念昔遊輒形篇咏

九日許當世以詩見率登高

璘上人以花栽見寄

庚子上元卽事

安靜堂庭松

四月池上

北園登高卽事

燕司封以詩見迎

題共樂亭

人日立春舟行寄燕司封

寄興化徐虞部

上元至南劍州大雨

寄題華藏院清軒

過楊樂道宅西

和張唐公約遊名園遇雪輒止

和楊龍圖畫屏二首

和吳省副北軒湖山

送仲庶待制知澤州

送子真給事出守常山

送程刑部出守洪州

卷下之下

五言排律一十六首 附錄一首

羣玉殿賜宴

序賓亭

宿香山寺

游龍門香山寺

登府店福昌山閣

登三鄉寺閣

題福州釋迦院幽亭

題何僊人大隱閣

題處州朱山人幽居

崇德夜泊寄章屯田

哭石曼卿

四月十七日舟次陳畱感懷述事十六韻

十九日奉慈親再往吉祥院看花

中秋夕獨坐望月

答提刑司封

衢州大雪有懷

七言排律三首

城南春會

送張太傅還鄉

送錢端明還京

五言絕句八首

偶作

晚色

福州寧越門外石橋看西山晚照

別顏慥下第

孫武篇

西施篇

秋日登郡樓二首

七言絕句一百二十首 附錄二首

夢中作

別宋判官

望春詞

落花

淨衆院嘗荔枝

正月四日

春晚

福昌院

雪中不見女兒山

訪陳處士

題建造寺奉先院

宿揚州

聞鴈

題金山寺

經林逋舊居二首

離錢塘

至睦州

呈沈子山二首

題漁溪驛

春潮

十一月後庭梅花盛開二首

正月十八日甘棠院二首

夢遊洛中十首

方山渡口占

江村

宿海邊寺

建溪桃花

王臺驛見晚李花有感

漳州白蓮僧宗要遺紙扇十首

後舍緋桃

聽彬長老談禪

南劍州見臘月桃花

觀音院聞泉

華巖院西軒見芍藥寄呈才翁三首

嘉禾郡偶書

讀宿州天慶觀門屏仙篆有感

送張處士二首

銓舍後軒

閣下晝眠

戲答王仲儀

銅雀妓

泰靈院書事二首

讀太平告身

楚州聞晚角有懷

宿漁梁驛

過南劍州

芋陽鋪見桃花

見勻親抄書

泉州安靜堂

泉州北藏院見初荷花

登清風樓

榴花洞

寄南海李龍圖求素馨含笑花

昭陵行

復葛子發通議

有遺梅花枕前者因成

至鑠外

五月宿江陰軍葛公綽草堂

七月過孤山勤上人院

韓玉汝山堂會別

梨園小部

答葛公綽遺詩

答公綽以九龍泉為壽

度南澗

十二日晚

十三日吉祥探花

十五日出趙園看花

十六日會飲駱園

又往鄭園

錢塘春遊詩寄郭待制

段家堤西望晚山

六月八日山堂試茶

李閣使新種洛花二首

秋日

七月二十四日食荔枝

醉後

朱樓

一百五日開千葉間金

乞雨題西方院

送馴鹿與東禪長老

題李維寫像

將赴京留題山莊西壁

徐虞部龍尾石研

過囊山題宏師室

過陸氏觀小欄花卉

杭州過璘上人花園

雪

和龐公謝子魚荔枝

和宋次道宴日不赴有懷

春日

張唐公出知濠州

桃杏園

三月出城別張唐公

玉仙池

凝祥池上晚歸

通源驛別顏茂才

入天竺山畱客

遊九鯉湖

錢塘題壁

洛陽詩帖二首

稼邨詩帖二首

漢魏六朝及唐人詩集皆先錄賦於前而同時唱和酬答或後人依韻賡咏并得附錄此通例

也蔡公集出于散佚之餘刻者不遑編較賦既混于雜文而詩之古律絕句與四五七言復參錯無辨珣因取善本及墨蹟雙對而竄補之兼附歐陽文忠梅宛陵趙清獻鄭一拂劉文靖諸公酬和之作共得二十五首恨搜采不博尚多遺失但使覽者論世知人因之遊神千載雖一齋亦足快也壬戌之秋七月旣望宋珣識于白門之浪樓

較刻蔡集姓氏

林學曾

晉江縣人南
京通政使

林欲棟

晉江縣人南京
光祿寺卿

李開芳

永春縣人南
京太僕寺卿

丁啟濬

晉江縣人南京
太僕寺卿

游鳳翔

莆田縣人南
京湖廣道御史

曾熙丙

侯官縣人南京
河南道御史

涂一榛

鎮海衛人南
京吏部郎中

沈維毗

長泰縣人南京
吏部郎中

謝宗澤

海澄縣人南
京戶部郎中

黃淳中

晉江縣人南京
戶部郎中

吳廷雲

長汀縣人南
京戶部郎中

洪啟聰

南安縣人南京
兵部郎中

陳其仁

莆田縣人南
京刑部郎中

洪時蕃

龍溪縣人南京
刑部郎中


黃道敬

晉江縣人南
京戶部主事

王肇績

晉江縣人南京
刑部主事

生天



顏繼祖

龍溪縣人南京太常寺博士

黃起楫

莆田縣人南京戶部照磨

袁文紹

建陽縣人南京國子監學正

陳欽

莆田縣人南京光祿寺署丞

陳鍾衡

莆田縣人南京應天府通判

黃鳴鑾

莆田縣人南京鴻臚寺署丞

楊錫璜

晉江縣人金壇縣知縣

林日烜

莆田縣人文華殿中書

林德升

福清縣人南京東城副兵馬

丁啟潢

晉江縣人晉江縣學生

宋珏

莆田縣人南京國子監生

鄭大益

莆田縣人南京國子監生

附錄原較姓氏

蔣孟育

龍溪縣人南京吏部侍郎

林堯俞

莆田縣人國子監祭酒

盧廷選

莆田縣人湖廣按察使

陳一元

侯官縣人江西巡按御史

李長庚

麻城縣人江西布政使

沈蒸

桐鄉縣人江西按察使

蔡善繼

烏程縣人福建泉州府知府

黃鳴喬

莆田縣人南京戶部郎中

馬鳴起

龍溪縣人江西南昌縣知縣

朱謀璋

南昌縣人

李克家

南昌縣人

陳臣忠

莆田縣人南京戶部主事

謝兆申

建寧縣人國子監生

黃應官

歙縣人癸卯舉人

李流芳

嘉定縣人丙午舉人

汪明際

嘉定縣人戊午舉人

程嘉燧

嘉定縣人

梅慶生

南城縣人

柯憲世

莆田縣人興化府學生

鄭繼紹

莆田縣人興化府學生

黃光

莆田縣人興化府學生

陳綵

莆田縣人南京國子監生

黃道周

鎮海衛人翰林院庶吉士

方喬齡

莆田縣人興化府學生

林玄

莆田縣人壬戌進士

俞近光

莆田縣人興化府學生

葉胤祖

江寧縣人文華殿中書

葛一龍

吳縣人國子監生

張士昌

莆田縣人

郭天中

莆田縣人

洪寬

莆田縣人

鄭天民

平海衛人

方應祥

西安縣人南京禮部郎中

沈春澤

常熟縣人南京國子監生

錢謙益

常熟縣人翰林院編修

余大成

江寧縣人兵部郎中



蔡忠惠詩集全編卷上之上

宋端明殿學士莆陽蔡

襄君謨父著

明南京國子生同里後學宋

珏編輯

南京太常寺博士龍溪顏繼祖較訂

賦

士伸知己賦

古有云賤而達已者道必有裕貴而得士者禮必與鈞意關榮以高世竭游名於大人威鳳下而覽德微蠖屈而求伸謂周公多才揮沐吐餐而延白

屋顏子具聖砥名勵行而附青雲故我浩氣集義
遊於天真默守節而無悶動會時而益振彬文薄
乎河漢長算驚乎臣隣指素絃而稟潔紉香草兮
生春彼美君子風度瑰偉烏在其蔓葛以均戚寧
藉乎樹粉而接里夷廉疑而索言詣幽眇而鈞旨
判柔植於異畦決斷涇於東水始傾崑而娛玩遽
倒廩而矜侈耽聖域以同輿秩皇塗而並軌雖韜
瑕可以取璧兼體可以收非矧或太公蛻北海之
居安石翔東山而起我拒其歸誰執茲耻必使右

雪苑之蓆屨繡衣之履繩引堯舜以致君蒙合燕
趙之多士苟氣協而聲同偕克濟乎薰美者也且
夫虹玉隱乎巉石砒硃淪乎層漪麒麟非犬羊之
比鱣鱒豈螻蟻之持沕明淵而自得曷怵迫而外
移華屋千椽柔繪百帷積粟乎京坻躍馬乎騶驪
匪裘藏之雅尚羗得志而弗爲何蘊諛以發顏何
挾巧而譎辭宜乎厚德表世嘉聞蓋時身享崇高
之貴目瞻咫尺之儀謂朽株可萬乘之器廊廟非
一木之枝得于道不伐乎衆公推于室不惜乎內

私舉岩穴而悚觀峩冠佩而來思上弗求焉無曰
茂當吾取下弗進焉無曰胡爲我知然則人之膠
于今者或安于近泥乎古者或昧乎通擇其粉墨
之異考以宮商之同射乃墉上隗宜日中鳴鶴陰
而子和雕虎嘯而生風不然則名位相雄師學相
攻畊石田而待稔懷珍鬣而適戎故非五難而吐
論和再別而處窮嗟乎木秀林而必摧士入朝而
見嫉絳灌隱堤而賈遷椒蘭發機而原黜子冉膏
舌而墨幽臧倉園睛而軻逸夜光明月招訶按劍

之年流水高山沈思絕絃之日在孤見之卓越發
羣蔽之豐密借如說困刑戮何擷其芳尹恬耜耨
何鋪其香若歲旱而澤及卒阿衡而自將惟聖睿
之覲逢俾業履之猗昌奚仕虞而弭廢由自戎而
虜亡秦何售之而遂用遽厚之而遐疆仲負弩而
仇君鮑何奪徽纒與鋒鏑弗芥薑乎左右麾千侯
而拱天王設隕越於九淵幾夷衽而易鄉窳倚輶
而鳴嗑桓何寶其琅琅驪肆語而靡著向何悟而
趨下堂伊邠勳之末圖胥何利乎錫土越石娛薪

以相佯嬰何次驟而奄取平負郭而久貧何梯魏
而康寓信鼓刀以周身何翼蕭而登輔節信疲於
游宦何怵心於皇甫正平蹶於羈雌何銜能於文
舉亮規時而晦身蜀何奮之于叻畝蒙署籍而委
質吳何抗之于卒旅蹇斯類之有徒殫筠素而曷
叙彼王公之宏略豈數子智謀之補畏遺德於冥
鴻思灑恩平施雨向使失風雲之會構竒衰之伍
或侘傺于草茅或殲危于俘虜亘天地以寂寥尚
何流嘉風而建英矩者哉今茲有人遠陶聖世少

齒鄉鬢根英雲之節奏表畛域而墾耕躋陵隅之
峻巖泳垠埃之淵渟若夫名山首乎黃老鬼谷譎
乎縱橫桑羊役乎術計商鞅刻乎刑名姑還車而
却步目吾肆之豐贏旣披閩吳而僑貢未幾唱第
于天楹賦從軍兮南土天蓋五而回星莽萬端而
外眩愚幽墨而無營憧百趾以高附愚遭環而後
行噂決辯以旁肆愚抑闕而箝聲紛結游以走譽
愚友益而盡傾親冒頤而雙白又齊伐乎大庭第
假田不足以羞旨烏敢斬外物而薦榮晞往躅而

結援塊回沈而崢嶸介語嘿于蔀室其誰燭之而使明勾孽芽于瘠壤又其誰育之而使成豈云病哇而諂笑哀絃而賣名然世主炎黃之化鼎連邴魏之風時平時者難值且復旦以親逢儻率道而自進立誠知命抑在乎其中亂曰善知人者豈古有而今無善求知者豈彼智而茲愚倘固其窳而厚其簿必幽者縲而培者扶進抑時而退抑命爾其守約而于于者乎

季秋牡丹賦

并序

爽秋涉杪扶欄間有牡丹舊枿輒吐芳楨亭亭上擢發紅葩一大可徑咫尺角春取勝無聞然爾扶欄當采翠亭之右亭屹縣圃之西北隅圃直縣堂之背縣介大江之南蓋漢元朔中江都易王上封其子敢爲丹陽侯采邑蕪湖此其地也今爲太平州堯時河間凌公尹之行再葺矣政休賦集又所瀕江英游雅故受署齋伐被名將命者憧憧然率道其疆故觴詠之娛相因無缺及此珍卉馨茂公有非時之異趣張具高會于

其側酒三行蒲陽蔡襄醕舉而言曰公起文章
聲二紀于茲顛葆幾華位不過禁省貳丞官不
過萬戶長吏而善禦外物居頗休閒獨以浩博
記書稱道聖明爲事今是花也韜英和緒揭麗
蕭辰時雖後而且大盛意者公其日寢亨會才
慮將有所售乎昔騷人取香草美人以媿忠潔
之士牡丹者抑其類歟請爲公賦之其詞曰
朔羽南翔建构西宅霜天一清露草皆白悲哉轉
涼葉於亭臯兮悵穠華之圓寂均百芳之不能秋

兮何子花天姿之的的使人觀之若披大暑兮臨
清湘剝層霾兮仰白日厥初槁壤潛春扶欄向夕
芳枝舉以融怡絳藻扇兮纂歷寶霧宵籠鮮風曉
折麗或中去聲人香可專國刻紅炬以烘燄綴彤霞
而薦色鬱弗誰語丰茸自持非倚瑟之神女抑善
賦之文姬盼清都而時下簾晴暘以孤嬉霄顚汗
兮排金屏氣矻矻兮張寶帷霓燁煜兮揭朱旗雲
腫隴兮護纁衣韞綠跗兮曠修眉姹鮮萼兮伸微
辭沛怡愉兮新相知眇悽惻兮送將歸桃有援兮

溪之曲蓮爲媒兮澤之湄嗟此物之善遠亶夫君
之後時君不聞佳麗皇州喧繁戚里清籟迢迢名
園疊疊綺櫳曉兮金鑷黃繡牆明兮雨苔紫嚴霰
才歸光風半起於是萬蒂駢紅交柯結翠密顏紆
餘斜袂輕綺文鴛羣飛霍錦橫被縹蓋攀聯緹裳
積委則有姝姝玉人翩翩卿子葆鞶過兮飛電珠
噫來兮流水擁翫嘉辰笑語成市彼瓊蕤美英縹
葉新蘼羗不得借其餘光矧標揚乎意氣今何爲
兮江之干地之卑兮歲將闌荆蕪北兮霜月寒望

下苑兮思上蘭嘉本擢兮靈根盤遠淮波兮鮮楚
山是知元冶一陶昌生萬族無左右先游者淪乎
朽株當匠伯不顧者被之散木譬此花之賦命兮
亦節暮而葩獨然貴賤反衍禍福倚伏其暮也何
遽不爲貴其獨也庸知不爲福噫化工物情吾以
茲卜

慈竹賦

種植至多強名萬彙物拔其萃茲乃當天地之正
氣有美竹兮特稟挾慈名而榮被豈有懷於本根

芳何千竿蔚然而瓌侍若夫吳郡名園王家新第
遠閣斜欄橫塘靜水或薰風晝來或秋露宵墜日
遲留芳簷外陰移人悽悄芳屏間籟起方且濯峭
格而清舉足檀欒之生意或翹而舉者若堂有高
年芳動素風而講議或亞而側者若家有令子芳
感話言而沉思俛如出門而事遠遊芳滋宿雨之
清淚雍如奉卮而介眉壽芳幕春煙而怡醉紫芽
蟠聯馨兒季穉去者奔追迎者嬉戲竦者如招並
者如倚雖復貫千狀於巧筆曾莫形其倣佛借如

秋晚霜重芳萬木零零而僵悴隴榆盡芳塞月高
堤楓丹芳楚江紫此君迺束藍田之苗玉刻炎州
之梢翠固節虚心芳雖大鈞不能奪其志於是揖
三荆於堂下結蔓藟於河涘襲氣同根之荳交驩
承萼之棣顧威鳳之時下亦孝烏之來寄設有
於律筩天聲發芳太和備覩此芳物悲哉遠人昔
我從軍芳南之海濱今我辭家芳西遊洛塵暢然
於舊國舊都感莊生之論恭止乎維桑與梓諷周
傳之陳指白雲芳天遠採幽蘭芳露新嗟碧鮮之

得地乃叢茆莫保反而相親吾議爾德豈止乎千畝
之涓侯當訂萬石之封君者也

四言古詩

親祀南郊詩

并表

臣襄言伏覩皇帝親執牲玉以饗上帝酌定大
樂登侑三聖天地清霽神祇歆格陛下齋精至
誠著見夫此臣叨從法駕躬覩禮文之盛職在
詞掖不敢以虛陋自棄謹撰成親祀南郊四言
古詩一章凡一百七十六句雖不足以道誦德

業之光然采掇大略垂傳遐域亦愚臣惓惓之
至其詩曰

天畀元統赤運開祉聖祖神宗海域平砥思皇真
考嶽封汾祀餌係戎胡包束戈矢不顯靈德光被
萬里民壽而康恩及蕭葦恭惟皇帝繼文之始兢
兢日慎夙夜勤只哀憐困窮有如在已惟刑惟恤
弗繇怒喜躬服儉約黜棄浮侈罔有逸欲曰惟三
紀大中則經典亡則史陰陽時序日緯纏軌樂律
本原禮法根抵兵韜術數萬微精旨該通變貫咸

燭厥理歲舍壬辰盜發南鄙帝曰沔靖治辦行李
毋大誅割定患則已獵獵靈旗啟道徑指兇渠踣
仆俘徒授耳嶺服旣平勳賞周被封歿錄孥門戶
擘擘粵茲明年農家豐美廬積腐庾漕儲峙帝
咨相臣匪台德爾穹昊眷賚祖考佑併何施不報
將祀郊時號令四下若建瓴水荒服述職奔走輸
委仲冬丙寅齋寢以俟先時霾晦颺籟號起真意
益莊降鑒伊邇夜漏適中星露雲靡大輅旣馭清
暢出晷休光無垠令容有偉爰翊殊庭奠享仙机

高靈委蛇元氣旭卉陰施自遠大功績似擁格純
禧益厚丕址入宿廟下月魄初朏龍章采藻瓚爵
擎跪拜于禰宮慈顏僅咫尺至誠馨香甘薦滲瀝哀
念劬勞譬瞻岵岵濯淚霑珪將遂復止京都之南
崇丘迤邐飛螭躡塵法乘徐柅地環帟帷霄揭隅
雉警角飄簫鼓騎連累言降言陟實惟告已燭錯
宵明壇圮空紫交佩陸離旒颯纒樂變神格列
周甲癸三后咸在上蒼臨視皇皇富媪從執籩簋
七精閃忽五鎮瑰瑋星官下翔濤祗騰跼等級卑

高食飲噓哆欣歆告言奏福來底更御步輦夾途
軍壘鉦鼓警轟跳呼牛鬼異域窮販黃髮稚齒動
薄戍波謹喧成市端闌停午玉色尚展赦澤春行
幽如蠶蟻廢滯振拔垢瑕刷洗寬貸賦取削減逋
詭皇帝慈孝下民胥擬皇帝恩仁四國傾倚皇帝
日咨羣公卿士舜隆聯夔商圯朋誣孰忠予是孰
讒于匪入官多門孰予室弭蓄兵過制孰予究揣
百姓害窮其患孰弛外夷狙驕其疆孰箠驅人以
法曾莫如耻化人成俗曾莫如禮百工勅業相予

表裏登任峻良剗斥姦宄天錫帝年萬有億梯天
錫聖嗣誥誥衆子乾剛不息章明度揆無疆惟民
惟帝其侍臣襄詠歌直道是履

馮靖一本作汝青

詔荅

勅蔡襄省所進親祀南郊古詩事具悉朕惟王
者之禮莫重於郊謂怠於事天不可以訓是故
憲章周式參講漢儀序惟仲冬始因陽氣之達
卜以南至躬卽園丘之崇爰升燎以致誠乃推
恩而均貺卿學窮雅奧詞摘藻絢慶元吉之祚

美盛事之成啟發英辭鋪昭景鑠溫麗盡一時
之妙適逸得備善之長覽玩載周歎尚無已故
茲獎諭卿宜悉知

附錄

同南郊慶成

歐陽修

字永叔
謚文忠

祀教民昭孝天惟德是親泰宮嚴大饗吉土兆
精禋禮樂三王盛梯航萬國賓恩霑羣動洽慶
與一陽新奉冊尊長樂均釐及衆臣不須雲物
瑞和氣浹人神

蔡忠惠詩集全編卷上之下

宋端明殿學士莆陽蔡襄君謨父著

明南京國子生同里後學宋珏編輯

南京太常寺博士龍溪顏繼祖較訂

五言古詩

姑胥行

香涇無故流胥臺有餘基太伯以德啟後王結心
師夫差昔好戰戈矛臨越陸天蟹須食稻未拯吳
人饑于今十一貢貧甚吳王時全吳古都會腴田

澆湖陂雨場適小變數米不足炊吾知事本末本
末何由知家戶徼福利坐輸黃衣兒平糶連拖漕
入朶天兵願困窳不夕儲勢若偷生爲長慮且後
顧苟卿有良規

鄴陽行

春秋書大水災患古所評去年積行潦田畝魚蛙
生今歲穀翔貴鼎飪無以烹繼亦掇原野草萊不
得萌剝伐及桑棗折發連簷薨誰家有倉困指此
爲兼并頭會復箕歛勸率以爲名壯強先轉徙羸

瘠何經營天子憂元元四郊揚使旌朝暮給饘粥
軍稟闕豐盈殍亡與疫死顛倒投官坑坑滿棄道
傍腐肉犬豕爭往往互食噉欲語心魂驚荒村但
寂寥晚日多哭聲哭哀聲不續饑病焉能哭止哭
復吞聲清血暗雙目隴上麥欲黃寄命在一熟麥
熟有幾何人稀麥應足縱得新麥嘗悲哉舊親屬
我歌鄴陽行詩成寧忍讀

讀樂天閒居篇

閒居篇云君看裴相國金紫光照地心苦頭盡

白纜年四十四乃知高蓋車乘者多憂畏予感
其說因抒鄙章

予年四十四髮白成衰翁非有高蓋車曷與賢者
同嗟予出寒遠家世常力農十九登科第聖設參
英雄十年出史選校書蓬階中

是年二十九

天子誤採

拔謂有諫諍風旣叨言責地三十二蹇蹇思匪躬竊
不自度量語剡奸邪胸一毫抗千鈞擯落無流蹤
同時皆驥首金紫班著崇惟予守長樂幸就祿養

豐三十八年江海外再上螭階東四十入西閣宿

仇司化工蒙錦設機穿惟賴天聽聰代言遊禁密
侍從多從容尋行京兆事擊斷露鈿鋒是職非所
好輒以死竭忠願闢大幽都爲君囚四凶願拂西
省堂爲君延夔龍願舒泰山雲甘澤成歲功願回
太清日晴景破陰蒙願躋萬人壽天扎終不逢願
令編戶富食衣無困窮羣臣走率職陛下居法宮
文彩成禮樂籌略羈夷戎意言亦良苦精神庶潛
通短步趨遠道心健力不克早衰鬢已華憂傷仍
自攻我知古人心生德貫上穹何爲論貴賤貴賤

非大公南歸雖云樂此念殊忡忡

期秦伯鎮不至

高人懷真趣每欲棄祿仕超然外造化那復顧妻子有田給饑寒有路出生死儻得自由身休隨榮利起或聞毫郊滂族大無餘米且持州綬去官廩尚可指何時當歸來焚香朝玉几

會亭遇資政孫公赴闕公致仕已七年時召歸將有西鄙之任

志節雖落落不能無謗毀壯年自雄豪末路遽顛

委衆口方叢嘈卽欲置之死公嘗爲大臣沉寃不辦理恭惟仁宗聖散地而後已新治甬上居閒逸安暮齒恭遇今天子繼照大明是問公何處在勉哉爲予起使者臨其門將駕不容俟滔滔汴流急行舟姑少止長堤榆柳深夜涼襟帶襦語終求其要茲事殊可喜朝廷英俊林豈無人器使謂公先帝臣擢任刷前耻惟公體上意畢力荷恩紀富貴安足論精心寂如水古人老益壯忠義在所指況復千載遇功名邁良史

過皇甫侍郎

丈人幾八十歲晚益窮經陰陽判九六天地環丙
丁初若發泉穴漸已澄滄溟所寶非世有願克天
子庭問我久京國鬢髮何星星無乃矜才能吐論
生風霆不爾負潔修楊眉自娉婷昏翳本來性憔
悴百歲形子知大方家真精潛杳冥萬化一相遇
起滅如秋螢而於須臾間計較壘與瓶膏消見遠
照木燼聞餘馨惟公懇懇誨敢怠拳拳聽追思嚮
踐歷媿汗曾未停決然趨所適金刀貴發礪去矣

汴流駛薰風送楊舸

秋思

幽蘭受新霜孤鴈叫落月沉憂何由平永夕不可
徹將琴鼓憶伶曲名聲急弦屢絕芳華日益遠香澤
忽消歇秋風吹石門思君還復訣誰云無生忍識
此悠悠別

秋夜書解中壁

遙夜不能寢值茲節物清太空瑩虛碧仰觀澄性
情素月若可把浮雲何故生瑤琴且勿弄誰憐希

蔡忠惠詩集
卷之十一
三
代聲

丙申秋八月過漁溪驛驛舊有梅數株嘗題
詩記今無有也二首

曾把早梅枝思君在別離別離雖云遠萬里有還
期樹枯根已撥人去復何之故館動秋色雲物藏
寒曦清香不可聞衰草空繁滋一夜平階雨輾轉
良自知

梅花不復見況乃攀花人花飛別故樹粉黛化爲
塵秋風卷落葉蟲豸鳴悲辛昏鴉投舊巢匹侶自
相親缺月行復滿歸雲本無根因題憶花篇此意
難重陳

安靜堂書示子

勿學異世人過常不可琛勿學慢世人側身隨浮
沉白日當青天難破是非心不有拔俗器安得太
古音大暑苦煩濁清泉流高岑烈士無戀嫪至理
須推尋

卽惠山煮茶

此泉何以珍適與真茶遇在物兩稱絕於予獨得

趣鮮香筋下雲甘滑杯中露當能變俗骨豈特湔
塵慮晝靜清風生飄蕭入庭樹中含古人意來者
庶冥悟

附錄

同前題次蔡密
學壁間原韻

無名氏

斯泉信甘冽罕與清時遇余今破曉來始領靈
源趣羅峴洗春前松蘿淪秋露貪看甌面雲忘
却胸中慮野屋闌無人風吹綠杉樹來者復爲
誰於焉發深悟

觀宋中道家藏書畫

宣獻業文學嘗作調羹鹽藏書百千帙傳世惟清
廉東堂得春和花卉晨露霑之君延賓從當晝褰
珠簾朱函青錦囊寶軸紅牙籤大令至歐褚屈王
聯鉤鈐草行戰騎合楷正中軍嚴水墨固昏淡骨
氣猶深潛江田亦名手農野與鋤鎌桑麻婦女喜
饁餉兒童覘烈女自幽閑明眸咽頸纖昔人何遙
遙意會相披瞻南曹古貌醒博士新詩炎持杯屢
屬我謂我毫錐銛煤姬浮醉鈿研流泣秋蟾放灑
雲雷起取餘風浪恬鄙藝豈足多詫語誰能謙因

思佐宣獻載檄陪車幘辱公知遇厚表裏曾無嫌
間復請筆法指病如投砭今朝觀故物撫已悲慙
兼層丘恩德重素髮年華添不能枉尺尋況乃事
飛箠壯心久已衰竒尚顧未厭幸公有令子辭源
橫江濤劇飲以自慰後慶其人占

附錄

同蔡君謨江隣幾
觀宋中道家書畫

梅堯臣

字聖俞

君謨善書能別書宣獻家藏天下無宣獻旣歿
二子立漆匣甲乙收盈厨鍾王真蹟尚可睹歐
楮遺墨非因模開化大曆名流夥一一手澤存

有餘行草楷正大小異點畫勁婉精神殊坐中
鄰幾素近視最辨纖悉時驚吁逡巡蔡侯得所
得索研鋪紙纔須臾一掃一幅大快健檀溪躍
過瘦的顱觀書已畢復觀畫數軸江田種稻圖
稻苗秧秧水拍拍羣鷺矯翼人荷鋤陂塍高下
石籠密竹樹參倚荆籬疎大車立輪轉流急小
犢歛顧稚子驅令人頻有故鄉念春事況及蠶
桑初虎頭將軍畫列女二十餘子拖裙裾許穆
夫人尤窈窕因誦載馳誠起予予無書性無田

區美人雖見身老癯舉頭事事不稱意不如倒
盡君酒壺

游冲虚觀

按圖經黃霸昇仙之地

真人玉骨輕御氣升瑤臺俯首視下方萬落腥塵
埃香火久寂寞山川空徘徊舊樹絡青蔓虚壇生
紫苔宴坐白晝永長吟清風來飛花亂棋子遊蜂
依酒盃嘉月當醉飲上客誠珍才神仙那可冀金
鼎何時開

題延平閣

雙溪會一流新構橫鮮赭浮居紫霄端臥影澄川
下峽深風力豪石峭湍聲瀉古劔螫成龍商帆來
陣馬晴光轉羣山翠色著萬瓦汀洲生芳香草樹
自閑冶主郡王士安高文勇枚賈顧我久疎悴霜
髭漸盈把臨津張廣筵窮晝傳清竿舞鼉驚浪翻
歌扇嬌雲惹歡餘適晚霽望外迷空野曾是劔遊
人意慮亦瀟灑

釣龍臺

龍在固神物動與風雲會胡爲脫淵泉輒觸鈎綸

害無乃護明珠睡目方帶昧而或嗅香餌貪涎適
霑霈不爾騰角牙自銜鱗蟲最來應川岳搥去等
蟬蛇蛻傳聞曠百世茲事久睨睨空餘古臺石碑
硯塵沙外湍流卷白日巖壑動清籟乾坤終蒼茫
物理有否泰

游鼓山靈源洞

郡樓瞻東方嵐光瑩人日乘舟逐早湖十里登南
麓雲深翳前路樹暗迷幽谷朝鷄亂木魚晏日明
金屋靈泉注石竇清吹出篁竹飛毫劃峭壁勢力

忽驚觸

題名石壁

捫蘿躋上峰太空延眺矚孤青浮海
山長白挂天瀑沆逢肥遯人性尚白幽獨西景復
向城淹畱未云足

新作春野亭

太守職民治詔書勸吾農載酒事緬邈作室當解
中況憑軒牖高中視田野功澹沲沐新澤依微生
柔風江湖漲新綠山麓延朝紅耕鋤時節動歌謠
聲意通慙非共理材幸邁頻年豐未厭畎畝樂駕
言誰相從

春野亭待月有懷

浙瀝涼風來空郊生暮寒山氣鬱蒼蒼江流去漫
漫闔關行人稀投棲夕鳥還疎鍾度林際華月吐
城端徘徊待遙夜露下明河寬心朋隔萬里獨坐
起憂歎

送許寺丞知古田縣

大雪擁都門子行亦良苦予貧乏觴豆子車誰爲
祖少止聽我言於子不無補于今方用兵連年戍
羗虜戰厄動萬計募人填卒伍賜衣縻國帑走粟

填邊庾平時賦稅外弓刀甲楯弩干名應急須筋
皮角毛羽前年科鞏革農牛半斤斧殺之先冒禁
不殺卽鞭楚江南供鵬鴿是物不棲渚十倍買所
無贏利資商賈編紙作戰鏑紉聯驅婦女輸來不
適用空屋窠蟲鼠此類如蝟毛更僕難悉數大凡
歛貨財百姓若外府苟可入軍須豈敢怨官取蓋
患在不均又索非其土有司失預計臨事纔披簿
嚴程弗渝日落符灑飛雨使者但依違州家不敢
主況復爲邑令喑吟莫伸吐其間或得才吏手無

容舞子今佩縣章所領十萬戶志慮固精明利病
前可覩姑能務均一瘵瘼庶蘇瘡

贈勤師

勤爲浮屠人形類心不偶獨負山林棲遠犯風塵
走如聞大衆居乃是賢豪藪專意學文章韓編不
離手退之所尚者豈以言深厚徑馳周孔域不爲
雜說誘大凡民之生蟲豸均一醜聖人酌中道君
臣與夫婦飲食若衣冠事行而易守不喜釋老言
抵斥遭誣負子今讀其書無乃相紛糾學本勿學

末何爲恤衆口

和黃介人憶竹

吾家有美竹繞廬千百个種時意慮深別後年華
過顏容日益新根芽久已播石間鳴溜去煙外哀
禽和子特何因依茲焉辜嘯臥慈親齒髮暮學宦
非敢惰風雲乖會遇羽翼頓摧挫遺經極精究收
功若計課懷策遊鉅公鯁語幾喙唾忍腹大窮歸
離魂費招些予嘗欲論薦身微蟻在磨藉令或指
擿聲名屢自墮吾師天下賢黠羗久未破屈禮致

豪英雋材多將佐古來死恩士乃是翳桑餓況子
挾所能何門不驚坐丈夫感氣義豈肯類市貨行
矣勿棲遲曷日祖車軌憶竹夙有尚直節無染漉
勉哉困益堅持之以爲賀

龜山夜泊書事

十月淮水平瑩淨鋪寒簟浴日弄浮光涵山碎青
點開帆直千里快去曾非漸盲風斗作勢怒浪立
呈險枯林助呼嗥巨蜃工騰閃偃崖少休息繫纜
猶歎颭忠信古云仗奸邪神所貶扣心良自安潛

祈亦羞諂夜分羣籟息天明惡雲斂霜威寒更清
霽色鮮可染懷安固俗喜乘危豈予歉賜告雖慶
幸被恩實慙忝慈親慰衰髮嬌兒別啼臉人情足
愛戀將思輒閉掩世事忽憂來驚起顛癡魔金絮
北弭胡弓刀西壓陝天子欲求理羣才務撻檢大
明破昏翳久弊刮痕玷有如廣廈時拙者亦磨剡
行路勿遲遲流年空冉冉

碧峰亭

虛亭城西隅開檻俯臨北青山正相向萬狀呈峭

格落日涵紫翠深春變顏色雲石抱幽致猿鳥自
娛適上窮林端寺下見海內國賢侯乘閑來四座
揖佳客歌吹侑杯酌筆硯角文墨雄談連古今大
笑一歡戚嗟物亦時遇曠久茲乃得從知閩州圖
復記新名跡

遷陽道中奉寄楊正臣同年

并序

襄頓首頃者同年秘校楊兄以疾去官退休于
家沈洋自適無不如意每念不得一奉從遊之
後以觀塵外之趣如何也前歲復往邑中未始

一通問訊懷恨無量今者賜告迎親歲暮道遠
歸心摇摇又不得一造門下顧塵容之人益可
愧耳過遷陽路輒書一篇以導企念之思兼伸
起居十二月二十八日襄又頓首

名第同一籍家園連七閩何爲別眉宇於今十四
春昔子補一尉扶病走風塵歸來解組綬宴處願
精神架書括遺逸甕酌涵清醇東阡與北陌候問
通慇懃或言疾良瘡呼盧氣益振或傳近詩句平
淡與古隣語之天下事塞耳不復聞寧當決引去

齊忠惠詩集 卷上 下
道固有屈伸嗟予仰尺祿對讐中秘文天子誤採
拔指名填諍臣力微責任重百慮加一身列章乞
使郡賜告迎慈親窮冬過梨嶺山蹊出幽榛俯深
下坎井斗起攀蒼旻水石齧晚沙霜風變朝皴粲
粲澗中花孤芳能自珍斑斑雲上鳥朝鳴亦求羣
歲晏時節動天遙客愁新去子無跬步笑語絕燕
秦作此欲招隱翻愧林泉人

泊吳江寄胡武平

遙夜吳江瀕露坐鬢成葆天空不帶雲野迥正收

潦徘徊波上月灑漾浮光好清風送炎敲飜覺秋
氣早乃問茗溪路舟虞爲予道水行至州下樓臺
壓煙島淨居譬如仙嘉產極富媪念君鎮雅俗適
以資恬浩豈不欲一往驩成寄鳧藻縱遊窮佳賞
劇論寫幽抱嗟予遠庭闈六年見春草終日諷陔
蘭無路羞羊棗胡爲久去家一慮心如擣今而賜
告歸計課免讐討前走奉慈顏敢憚勤輿皂北來
尚何時汀洲白蘋老倘得杯酒同爲君一醉倒

任山歸河東

風俗憂思深在昔言汾絳之人隱其間白首甘陋
巷畢力事詩書豈特專記誦編年作通紀起周迄
炎宋甲子二十五迴環補遺空予聞春秋法尊王
正一統維持生民綱樹立大邦棟上賢若游夏鳥
獸於麟鳳三傳自名家講解或失中區區休預徒
奔馳困羈鞅排闥侵異端寢久成蠹蟲仲淹著元
經劉蕡比奴從去聖日彌遠斯言誰折衷猶勝女
兒曹煙雲費嘲弄君於春秋學勤勞務包綜向時
耻飛箝畫策尚擒縱羗戎負恩德王師壓秦雍邊

閨重瘡痍堪爲賈生慟廟堂誅賊謀謂與天下共
詔書入巖穴丐告嘉謀貢使者出河東輒以姓名
送謁來遊京邑天門如可狃崑嶢雙浮雲下有千
人斲板緣逐聲利激射苟祿俸蹭蹬不敢前撫心
愈疑恐短翮無吹噓微芳少培擁客舍逼隆冬蕭
條殘雪凍悠悠晉溪上水石挂清夢長羅復西歸
孤懷不偶衆身窮况節義物曲何時用美田隨意
耕寒魚傲經種夜堂素琴橫晚案青蔬供決然顧
予別蕪音強吟諷持歸傳里閨亦足侑壘甕

寄襄城孫主簿

昔子尚稚孩從親蒞此邑今子稽簿書職守仍前

襲

其父嘗爲
縣主簿

歲月曾未幾風流正相及新礪刃益

銛舊署墨猶濕非徒吏氣奮固使家聲立征調事
漸繁須材時所急何不一軒翔榮名亦可拾勗子
乃自省滿顏抱羞澁

送安思正之蜀

臨字思正

賤者易屈志少年多直情子獨修節行愛護如目
睛辛勤走銓省歷歲纔點名舍居在窮巷門戶面

西城妻孥愁屢空道邇心無營驅騾從僮僕間或
造予庭是時楊叔武相值極驩誠妙言發潛穉遠
意倍幽萌羞諛刺俗子指急條邊兵過從豈云厭
時節忽崢嶸叔武守岳陽別去方行行子今復之
蜀蜀道天險并索中無一錢劍外幾百程春風卷
地來凡草猶奮榮如何使之人憔悴氣與形內富
在乎我外窮繫於生此事久已判努力敦誠明吾
友黃君度實乃浮其聲子往從之遊切磨以相成

城字

君度

永叔示及聖俞酬答因奉和寄聖俞

吾友多稱君思見寒附火氣溫玉開籍才敏鏃加
箚嘗於師魯書言詞屢及我乖疎久益新慕合迎
已可柰何縻組綬無路動車輅近乃得百篇能詩
今信果清寒水石春怪險蛟螭鎖遠念煙鴻去呈
妍露葩娜古人雖已矣風流未應墮東來勿後期
山桃綴紅顆

附錄

依韻和聖俞見寄

歐陽修

與君結交深相濟同水火文章發春葩節行凜

筠箚吾才已媿君子齒又先我君惡予所非我
許子云可厭趣共乖時畏塗難轉輅道肥家所
窮身老志彌果每嗟游從異有甚樊籠鑱天匠
染青紅花腰呈裊娜苟能杯酌同直待冠巾墮
無欺校讐貧鹽米尚餘顆

附錄

依韻和永叔子履冬夕小齋聯句見寄

梅堯臣

遙知夜相過對語冷無火險辭鬪尖竒凍地抽
笋箚吟成欲寄誰談極惟思我學術窮後先文
字少許可敢將蠡測海有似脂出輅必餓嘗見

憂此病各又果敝駕當還都重門不須鎖到時
 春怡怡萬柳枝娜娜定應人折贈只恐絮已墮
 行橐且不貧明珠藏百顆永叔嘗見嘲謂自古詩人率多寒餓顛困
屈原行吟於澤畔蘇武啗雪於海上杜甫凍餒於未陽李白窮溺於宣城孟郊盧仝棲棲道路以子之才必類數子今二君又自為此悲而反有飯顆之詩何耶

送胡武平出守吳興

東南有佳士文高志清苦翩然請郡章入居使君
 府雲水生春瀾瑩靜沙可數霽日鳴旌旗長風送
 鏡鼓燿帆十丈舩湖山一杯土橘嫩宴亭秋茶香

齋閣午神歡所適宜動默造幽覩應念懷鈞人垂
 頭證魚魯

楊叔武北堂夜話

歲宴物景薄層陰向晚饒輕雲隱微月殘雪棲枯
 條夫君有高適顧我慰寂寥瀟洒開北門拂榻延
 良宵前机陳古書坐見千載遙間亦發新句幽思
 含九韶神明靜外照念慮醉中消楊雄戒丹轂顏
 子安一瓢良玉不火變翠栢寧霜彫此心固獨往
 聲利詎得招爐灰寒更劃燈炮落仍挑相看數漏

蔡忠惠詩集卷之十一
板後會誠重要

過白樂天墳

樂天本才士羽儀初頡頏脫身避禍機遂得林泉
尚生愛香山遊死亦香山葬悠悠醉吟魂終古墳
幽壙小堂松檜間躋攀白雲上春日照伊流素波
明演漾草樹豈有情一步一回望

陪諸君會史館園

名園霽宿雨春日正和柔花香泛草際竹影搖清
流鳴禽自往還遊魚時沈浮出門市朝喧愛此林

亭幽況陪君子讌飛竿更相酬亦有佳人携艷歌
青眉愁佳人足娛適遠思何夷猶故鄉去千里野
堂臨溪頭夢寐別四載南望無時休王粲昔從軍
登樓以銷憂今予豈不然每到終遲留

和王勝之遊普明院

昔賢履道第平時洛都選門外多風塵林端出臺
殿名園迤邐清小徑縈紆轉修竹環數畝可愛青
不變水生流水靖葉盡危巢見晴日破雲末遊魚
過池面君意高如鴻孤超遺健羨茲遊恐難屢歷

覽豈云倦放懷窮幽趣回首把歸戀裁詩賦景物
芬葩有餘絢呼童秣予馬追閒性所便

寄題滁州豐樂亭

君爲滁上守乘閒務幽尋羣從畱山阿美望窮前
林良醺追佳賞高亭曠遐臨煙雲無定姿水石惟
清音靜見魚鳥適遙聞鷄犬深時節屢豐有民里
無欺侵豈獨延衆物因茲託冲襟大筆每絕唱芳
樽寧孤斟別日念已長來期詎能今安得凌風翰
相從殫歲陰

達觀亭

峭峻鈞龍石飛亭壓其端曠徹四無際因之名達
觀扳雲躋大庭仙路何紆盤秋明澄遠綠暑霽凝
新寒城郭煙火稠水陸漁樵安偶暇按民俗適遊
心意歡鳴絃俯清流對酒環蒼山重拂衣裾淨從
帶石嵐還

聖泉

竭十餘年今者復
溢俗傳糜則民安

源流出何山湧澗茲有異湛然盈石泓餘波下金
地清甘本無滓渴飲得真味端能發茶色博亦資

農利矧茲民俗安溢溢尤可憇滿酌復攜歸良追
曲肱意

授轉運使罷州端居述懷

被詔領均漕前解閩州符掩關謝來賓釋然捨攀
拘日晏眠空齋啼禽在高梧神情已欣快痾恙還
輕蘇暫閒固自適況與塵滓殊勿樂夸毗子開眼
趨畏途投身試羅網反用腴妻孥精慮成長謹鑒
此非迷愚

移居轉運宇別小欄花木

三年對小欄花藹見顏色紅薇開已久春風常先
得素馨出南海萬里來商舶團團茉莉叢繁香暑
中折餘畦十數種亦自尚風格念爾幽芳性乞致
多手植瑤草固微生栽培子豈德別去重來看猶
使中情惻

北苑十咏

出東門向北苑路

曉行東城隅光華著諸物溪漲浪花生山晴鳥聲
出稍稍見人煙川原正蒼鬱

北苑

蒼山走千里斗落分兩臂靈泉出地清嘉卉得天
味入門脫世氛官曹真傲吏

茶壠

造化曾無私亦有意所加夜雨作春力朝雲護日
華千萬碧玉枝戢戢抽靈芽

採茶

春衫逐紅旗散入青林下陰嵯喜先至新苗漸盈
把競攜筠籠歸更帶山雲寫

造茶

其年改造新茶十斤九極精好
被旨號為上品龍茶仍歲貢之

屑玉寸陰間搏金新範裏龍鳳茶八片為一斤上
品龍茶每斤二十八片
規呈月正圓勢動龍初起焙出香色全爭誇火候
是

試茶

兔毫紫甌新蠲眼青泉煮雪凍作成花雲閒未垂
縷願爾池中波去作人間雨

御井

井常封
鑰甚嚴

山好水亦珍清切甘如醴朱幹音韓待方空玉璧見

深底勿爲先渴憂嚴扃有時啟

龍塘

泉水循除明中坻龍矯首振足化仙陂回睛窺畫
牖應當歲時旱噓吸雲雷走

鳳池

靈禽不世下刻像成羽翼但願醴泉飲豈復高梧
息似有飛鳴心六合定何適

修貢亭

予自採掇時
入山至貢畢

清晨挂朝衣盥手署新茗騰蚪守金鑰疾騎穿雲

嶺修貢貴謹嚴作詩論遠永

附錄

嘗北苑新
茶呈聖俞

歐陽修

建安三千里三月嘗新茶人情好先務取勝百
物貴早相矜誇年窮臘盡春欲動蟄雷未起驅
龍蛇夜聞擊鼓滿山谷千人助叫聲喊呀萬木
寒凝睡不醒惟有此樹先萌芽乃知此爲最靈
物宜其獨得天地之英華終朝採摘不盈掬通
岸鏐小圃復窳鄙哉穀雨槍與旗多不足貴如
刈麻建安太守急寄我香蕪包裹封題斜泉耳

器潔天色好坐中揀擇客亦嘉新香嫩色如新
造不似來遠從天涯停匙側盞試水路拭目向
空看乳花可憐俗夫把金錠猛火炙背如蝦蟇
由來真物有真賞坐逢詩老頻咨嗟須臾共起
索酒飲何異奏雅終啾哇

附錄

次韻和宋
叔嘗新茶

梅堯臣

自從陸羽生人間人間相學事春茶當時採摘
未甚盛或有高士燒竹煮泉爲世誇入山乘露
掇嫩嘴林下不畏虎與虵近年建安所出勝天

下貴賤求呀呀東溪北苑供御餘王家葉家長
白芽造成小餅若帶銛鬪浮鬪色等夷華味甘
廻甘竟日在不比苦硬令舌宐此等莫與北俗
道只解白土和脂麻歐陽翰林最別識品第高
下無歎斜晴明開軒碾雪末衆客共賞皆稱嘉
建安太守置書角青翦包封來海涯清明纔過
已到此正是洛陽人寄花兔毛紫盞自相稱清
泉不必求蝦蟇石餅煎湯銀梗打粟粒鋪面人
驚嗟詩腸久饑不禁力一啜入腹鳴啣哇

附錄

得聖俞詩復
次韻再作

歐陽修

吾年向老世味薄所好未衰惟飲茶建溪苦遠
雖不到自少嘗見閩人誇每啜江浙凡茗草叢
生狼藉惟龍蛇豈如含膏入香作金餅蜿蜒兩
龍戲以呀其餘品第亦奇絕愈小愈精皆露芽
泛泛白花如粉乳乍見紫面生光華手持心愛
不欲碾有類弄印幾成窠論功可以療百疾輕
身久服勝胡麻我謂斯言頗過矣其實最能祛
睡邪茶官貢餘偶分寄地遠物新來意嘉親烹

屢酌不知厭自謂此藥真無涯未言久食成手
顫已覺疾饑生眼花客遭水厄疲捧碗口吻無
異蝕月蟄僮奴傍視疑復笑嗜好乖僻誠堪嗟
更蒙酬句怪可駭兒曹助噪聲哇哇

附錄

次韻再和

梅堯臣

建溪茗株成大樹頗殊楚越所種茶先春喊山
摘白萼亦異鳥嘴蜀客誇烹新鬪硬要咬盞不
同飲酒爭畫虵從揉至碾用盡力只取勝負相
笑呀雖傳雙井與日注終是品格稱草芽歐陽

翰林百事得精妙官職況已登清華昔得隴西
大銅碾碾多歲久深且窳昨日寄來新鑿片包
以籊籊纏以麻誰能賸毀任腹冷幸免酪酏冠
弁斜人言飲多頭顫跳自欲清醒氣味嘉此病
雖得優醉者醉來顛踣禍莫涯不願清風生兩
腋但願對竹兼對花還思退之在南方嘗說稍
稍能嚼墓古之賢人尚若此我今貧陋休相嗟
公不遺舊許頻往何必絲管喧咬哇

附錄

答李仲求寄建溪洪井茶七品

梅堯臣

忽有西山使始遺七品茶末品無水暈六品無
沉相五品散雲脚四品浮粟花三品若瓊乳二
品罕所加絕品不可議甘香焉等差一日嘗一
甌六腑無昏邪夜枕不得寐月樹聞啼鴉憂來
惟覺衰可驗惟齒牙動搖有三四妨咀連左車
髮亦足驚悚踈踈點霜華乃思平生遊但恨江
路賒安得一見之煮泉與相誇

西齋秋暑

齋居一室靜晝永來風微仙棋覆前局女布便輕

衣向人顏色強與世心事違且效金門隱詎有田
園歸

胡鴈

胡鴈畏空漠羣飛嚮洲渚寒雲避射弋萬里聲悲
苦月色滿關河欲下迷處所春江沙平淨魚蚌不
可數飽暖身肥腴歸路欲遠舉尋常弓箭兒仰視
隨意取從來遠禍心狼藉失舊侶小哉啣蘆智豈
識保身語

題周著作作萃賢亭

君家作虛亭獨得江山情四向各有適萬趣森自
呈夜深蟲鳥息漸聞泉石鳴日高煙靄去始見峰
巒生之人務佳尚意與賢豪傾中盤淪薇蕨傍砌
顛瓶罌毫端潛造物局上橫戈兵樂遊時景邁薄
宦身事縈種花行老色馴猿無故情蕭散復後期
外塵殊可輕

周君善詩與茶

瞻禮開師真像

輕瀾還故潯墜軫無遺音好在池邊竹猶存虛直
心往復二十年每見惟清吟覺性既自如世味隨

浮沉琅琅白雲姿，悵望雲山岑。豈不悟至理，悲來難可任。

雨晴早出

徂秋久不雨，霑濡纔此旬。新陽淨萬物，太虛無一塵。老稚出曠野，鋤犁及清晨。愛爾安居樂，力作勿辭貧。

訪天台庵

幽人去未還，門戶和雲閉。亭午樹陰圓，深冬泉響細。寒生羣鳥鳴，清徹孤鶴唳。寂寞傍山歸，寫向滄

溟際

和吳省副青梅

梅華畏高寒，獨向江南發。那知汴陽墅，青顆摘春月。持之矜所無，歸思動楚越。願君侑清罇，行恐新芳歇。

留別舊居花檻

別意起中夕，出門風吹衣。側月光艷薄，餘花香氣微。清尊歲相向，欲去心有違。殘葩勿盡放，主人行亦歸。

南都思杜祁公

祁公清德老在昔相先帝青雲吐論高白璧持身
銳待俗無町畦取人兼揭厲甘貧安車後直道洪
鈞際每聞天下士行業若材藝未見比調饑況乃
挹襟袂早嘗登公門顧睐叨末契謂有金石姿良
工心磨礪仰瞻通德衢獨立耆英第所居名也評書草
聖優煮薺雲腴細遺墨秘巾篋感激君子惠悲風
吹白楊佳城茲久閉聲名與濰澳東流無已歲

泗州登馬子山觀漕亭

廟社奠東都恃德非恃險聚兵三十萬待哺無容
歉西有砥柱峻菽麥不踰陝齊魯糧食藉漸水不
漱灑惟餘汴渠利直貫長淮賺歲輸六百萬江湖
極收歛挽送入太倉因陳失蓋弁將漕苟不登汝
職茲為忝或謂取太多六路有豐儉其間一不熟
饑殍誰能掩一旦俾之粟是人意常慊區處失其
宜斯言反為玷嘗欲請增減革乎亦須漸連營今
飯稻香美若菱芡因循未易論官曹畏書檢虛亭
一臨眺比比危檣颯來從數千里歲時空在苒雨

餘山氣淨黛色淺深染夜昏漁火出倏忽電光閃
須臾月色空水面鋪寒簾相逢喜道舊城柝屢移
點因語發長謠誰能刊琬琰

四月八日西湖觀民放生

盈舟載魚蝦投瀉清波際應無校人欺獨行流水
惠非求升斗活終免螻蟻制江湖自相忘洲島亦
環逝脫淵思曩戒喫餌省非計爲生豈不幸萍藻
庶可翳

和王學士芍藥

粲爾芳草葉孤根當砌植違春已自分薰風猶惜
力艷艷朝日光紛披照顏色持之遺佳人歲久香
不息

題將軍巖

赤日正停午解衣巖石下石泉殊甘涼野簌亦瀟
灑驚猿度嶺雲遺菓墜庭瓦披軒忽永歎幽抱不
可寫

宋宣獻公輓詞

四首在五言律

去歲洛城東公歸秉樞務今日國門西轎車行哭

度同此晚春節依舊西山路千古訣幽明一年纔
旦暮遠恨寄山川餘哀慘雲霧平昔送公詩何言
歌薤露



蔡忠言
詩集



國家圖書館, NATIONAL CENTRAL LIBRARY, TAIWAN, R.O.C.

蔡忠惠詩集全編卷下之上

宋端明殿學士莆陽蔡襄君謨父著

明南京國子生同里後學宋珏編輯

南京太常寺博士龍溪顏繼祖較訂

七言古詩

御筆賜字詩

并序

臣襄伏蒙皇帝陛下特降中使賜臣御書一軸
其文曰御筆賜字君謨者臣孤賤遠人無大材
藝陛下親灑宸翰推著經義俾臣佩誦以盡謨

謀之道事高前古恩出非常臣感懼以還謹撰
成古詩一首以叙遭遇于冒聖慈臣無任荷戴
兢營之至

皇華使者臨清晨手開寶軸香煤新沿名與字發
深旨宸毫灑落奎鉤文精神高遠照日月勢力雄
健生風雲混然氣質不可寫乃知學到非天真緘
藏自語價希代誰顧四壁嗟空貧臣聞帝舜優聖
域臯陶大禹爲其隣吁俞勅戒成典要垂覆後世
如穹旻陛下仁明如舜禹豪英進用司鴻鈞臣囊

材智最駑下豈有志業通經綸獨是丹誠抱忠樸
常欲贊奏上古珍又聞孔子春秋法片言褒貶賢
愚分考經內省不自稱但思至理書諸紳乾坤大
施入洪化將圖報効無緣因誓心願竭謨謀義庶
禪萬一唐虞君

詔荅

勅蔡襄省所進古詩一首事具悉朕常日罷朝
閒燕多以經史書藝時用頤神因見唐高宗賜
戴郝李崔四臣六字旨義皆有誨諭卿詞令根

于溫厚筆力極于深妙名以本其所贊字以申其所輔偶御毫而援翰俾中璫而特錫良以將厚意而表殊寵也敷陳謝懇發爲詩文遵臯陶之言以懋其稽古述帝舜之事以思其底績宣明順美重增嘉歎故茲獎諭卿宜知悉

附錄

恭觀蔡忠惠公賜字詩真蹟

解

縉

字大紳

汴水東流宋社移中郎名字日星垂精神翰墨猶生氣想見彤庭賜對時

又

端明書法繼鍾王珮玉瓊琚在廟堂見說當年推第一米家應自愧疎狂

四賢一不肖詩五首

中朝鸞鶴何儀儀慷慨大體能者誰之人起家用儒業馳騁古今無所遺當年得從諫官列天庭一露胸中竒失身受責甘如薺沃然華實相葳蕤漢文不見賈生久詔書曉落東南涯歸來俯首文石陞尹以京兆天子毗名都翼翼郡國首里區百萬多占辭豪宗貴倖矜意氣半言主者承其願昂昂

孤立中不倚傳經決訟無牽羈老姦黠吏束其手
衆口和附歌且怡日朝黃幄邇天問帝前大畫當
今宜文陳疏舉時密啟此語多秘世莫知傳者籍
籍十得一者已足爲良醫一麾出守番君國惜
此智慮無所施吾君睿明廣視聽四招英俊隆邦
基廷臣諫列復鉗口安得長喙號丹墀晝歌夕寢
心如疾咄哉汝憂非汝爲

右范希文

南方之強君子居卓然安道襟韻孤詞科判等屢
得雋呀然鼓燄天地鑪三年待詔處京邑斗粟不
足榮妻孥耳聞心慮朝家事螭頭比奏帝曰都校
書計課當序進麗賦集仙來顯塗誥墨未乾尋已
奪不奪不爲君子儒前日希文坐言事手提勅教
東南趨希文鯁亮素少與失勢誰復能相扶斬然
安道生頭角氣虹萬丈橫天衢臣靖胸中有屈語
舉噍不避蕭斧誅使臣仲淹在庭列日獻陛下之
嘉謨刺史重官雖重寄柰何一郡卷不舒言非由
位固當罪隨漕扁舟盡室俱炎陬此去數千里橐

中狼籍惟蠹書高冠長佩叢闕下千百其羣訶爾
愚吾知萬世更萬世凜凜英風激懦夫

右余安道

君子道合久以成小人利合久以傾世道下衰交
以利遂使周雅稱嚶鳴煌煌大都足軒冕綽有風
采爲名卿高名重位蓋當世退朝歸舍賓已盈脅
肩諂笑不知病指天報遇如要盟一朝勢奪德未
改萬鈞已與毫釐輕畏威諛上亦隨毀矧復鼓舌
加其評逶迤陰拱質氣厚兩豆塞耳心無營嗚呼

古人不可見今人可見誰與明章章節義尹師魯
飭躬佩道爲華榮希文被罪激人怒君獨欣慕如
平生抗書轂下自論劾惟善與惡宜彙征削官竄
逐雖適楚一語不掛離騷經當年亦有大臣逐朋
邪隱縮無主名希文果若事姦險何此吉士同其
聲高談本欲悟人主豈獨區區交友情

右尹師魯

先民至論推天常補袞扶世爲儒方園冠博帶不
知本樛櫟安可施青黃帝圖日盛人世出今吾永

叔誠有望處心學古貴適用異端莫得窺其墻子
年五月范京兆服天子命臨鄱陽二賢拜疏贖其
罪勢若止沸反揚湯勅令百執無越位諫垣何以
敢封囊哀來激憤抑復奮強食不得下喉吭位卑
無路自聞達目視雲闕高蒼茫裁書數幅責司諫
落筆驟驥騰康莊刃迎縷析解統要其間大意可
得詳書曰希文有本末學通古今氣果剛始自理
官來秘閣不五六歲爲天章上心倚若左右手日
備顧問隣清光苟爾希文實邪佞曷不開口論否

臧陰觀被譴始醜詆摧枯拉腐奚爲彊儻曰希文
實賢士因言被責庸何傷漢殺王章與長倩當時
豈曰誅賢良惟時諫官亦結舌不曰可諫曰罪當
遂令百世覽前史往往心憤涕泗滂斯言感切固
已至讀者不得令激昂豈圖反我爲怨府袖書乞
憐天子傍謫官一邑固分耳恨不剖腹呈琳琅我
嗟時輩識君淺但推藻翰高文場斯人滿腹有儒
術使之得地能弛張皇家太平幾百載正當鑑古
修紀綱賢才進用忠言錄祖述聖德垂無疆

右歐陽永叔

人稟天地中和生氣之正者爲誠明誠明所鍾皆
賢傑從容中道無歎傾嘉謀讜論范京兆激姦糾
繆揚王庭積羽沉舟毀銷骨正人無徒姦者朋主
知膠固未遐棄兩轡五馬猶專城歐陽秘閣官職
卑欲雪忠良無路岐累幅長書快幽憤一責司諫
心無疑人謂高君如撻市出見縉紳無面皮高君
携書奏天子游言容色仍怡怡反謂范文謀疎濶
投彼南方誠爲宜永叔忤意竄西蜀不免一中讒

人機汲黯嘗糾公孫詐弘於上前多謝之上待公
孫禮益厚當時史官猶刺譏司諫不能自引咎復
將已過揚當時四公稱賢爾不肖讒言易入天難
欺朝家若有觀風使此語請與封人詩

右高若訥

至和雜書五首

八月一日

淮天過盡入吳渠蘭亭晚日光疎疎金桃傅粉好
顏色綠醺泛灩深車渠觥巡屢卷明星出花翹零

落隨衣裾么絃不動凝古意春容淺破長眉舒庭
院簾帷一齊下紅蠟陰沉霜滿瓦鷄頭軟熟七月
終舉手分傳玉盈把席前碧甕覆瑤漿一秋愁淚
風前灑雲中寶暈萬重高付與輕綃藏冰麝孤城
寒柝夜迢迢誰道劉郎有天馬歸來却問東海桑
海浪漫漫彩虹挂紅絲縈膾曉刀鳴雙龍笑斷夢
中驚莫將團扇掩塵匣曾障清歌十數聲

八月二日

濃雲瞥過雙鳳飛清顏照射朝日輝畫船南畔煙

成障鮮荷掩護仙銖衣凝魂杳眇不知處酒醺香
破驚新知一聲入耳醉人骨天容牢落星點稀海
山萬里風濤外扶桑未老成春絲春絲不斷縈成
結玉環宛轉無窮時曉簾半上香飄穗笑指冰壺
凝遠淚秦樓後夜鏤孤鸞秋風不動烏龍睡願將
瓊樹隔花看一一花房暗相值濁水芙蓉天際雲
長時倚望清江濱迎來未語送歸速暮山紫翠含
空顰勸君美酒千萬壽情如芳草年年新

八月九日

曉虹跨江一千尺平浪東西入天碧遊人初覺秋
氣涼衣不禁風薄羅窄漁家小艇方醉眠艇裏長
魚三尺白彩欄北倚數流螢似與流螢舊相識香
脂揩盡暗成雲銀甲試絃初未直橋前流水聲潺
潺年華一去何時還重來若問桃花路記取松亭
月影間

八月十二日

高樓中天月色淨玉山禾熟秋雲映草邊水際見
流螢流螢獨自尋香徑稜層鴈塔挂千燈蜜意雖

通語還併城上驚烏飛復啼落泊無依終不定欲
下長橋夜漏深燭臺飄炮青梧陰仙人若也乘鸞
去彩霧千重是處尋

八月十九日

潮頭出海卷秋風風豪潮起蒼海空弄潮牙旗出
復沒騰身潮上爭驍雄沙頭萬目注江水晴雷乾
電來無窮幄外簾旌飛獵獵新醅翠筍行坐中欲
作吳訶弄清晝回看滿眼西陽紅六曲屏深映雲
母珠盤縷縷青鴉茸山移海轉有變化生緣長短

須相逢

憶弟 并序

丙子年春三月予解官漳州與弟君山西行至
順昌富屯之間夾溪十里紅白薔薇盛開特與
君山臨流飲而賦詩甲申夏四月二十日復來
追悼君山之亡畱詩屋梁以紆哀思

清溪曲曲抱山斜
遶溪十里薔薇花
春風吹香襲人骨
乾紅淡白相交加
眼睛眩晃不能視
爛如赤日凌朝霞
時有扁舟向中下
共疑來處從仙家
于

時邀我臨流飲
下踞大石盤
犬牙平生意氣一快
論屈指世務還驚嗟
酒酣襍紙探彊韻
胡塗醉字成
亂鴉侵更把火入官舍
下馬猶吟詩各誇何言
花落悲人世只見溪流自
歲華今年初夏我復至
深叢晚艷餘孤葩
山川故物依然在
惟子別路幽明
賒想像音容杳何許
桂旗獵獵隨雲車
悲來獨坐蔭芳樹
涕淚揮灑黃沙
行人怪我愛溪水
那知此恨無邊涯

寒食梨花小飲

江南寒薄春常早花卉入春先自老嗟予衰病不
及時出見池園半青草縱有餘葩在葉間行看落
片隨風掃尋春已過索寞歸重憶歡娛耿懷抱雖
然妖艷難再得但只逢花須醉倒二月中天寒食
朝牆隈忽見梨花飄開門四顧粲然白傳催翠帟
賓朋招長吟環遶不知數漸值明月臨清宵誰剪
輕雲成碎蕊天留密雪封枯條重重盡挂珠纓絡
簌簌初呈箇步搖傍花行酒發新唱滿座例舉黃
金瓢西都姚黃高一尺揚州寶髻分雙翹幽香絕
豔信尤物設欲置之千里遙壁門寫生亦名畫未
免五彩塗鮫綃莫如此君慰人意相對一笑開無
慘古來英豪多感激坐使綠鬢朱顏彫勸君且作
梨花飲慎勿稱量別流品

道中寄福州王祠部

臨津館下日銜西風卷寒潮上碧溪畫船急槳隨
潮去山川滿眼煙淒迷醉起開船看潮落林深日
落哀猿啼離魂復與潮東下兀然愁坐心酸悽今
年賜告歸鄉里翩翩飛鳥投故棲雙親素髮喜我

至鞠撫歡笑如嬰兒東阡北陌來慶問姬翁壘醜
交持攜雖欲晨昏在環堵柰何職守通金閨春暮
辭家就行役幽蘭在手空萋萋閩州太守意慷慨
一見歡甚無町畦欲令邦人滿瞻聽灑酒高會搥
鼓鞀我知君侯落落者胸中氣象盤虹霓問之當
今至急務無若羗虜方突梯君言區處果得術勢
類秋隼持寒鷄養兵精悍不在衆黠賊頭顱可立
提海隅僻郡誰與語彊欲論列懲吹壺又言人生
尚忠孝二者輕重均銖圭以諫名官宜盡節健行
勿繫驂騶蹄別來破熱走山驛神疲骨瘦顏容顰
作詩遙寄復感激豈不戚戚論乖睽

送楊渥赴西安主簿

余思去夏還甌閩温風赤日爭陶蒸舟行夜寄浙
江稜江濤洶湧來相仍雷電翕虢蛟螭騰方牀竹
簟寒生水上隴西去景色澄青山兩向水一絙猿
鳥啼叫交酬應晚樵出霧魚投罾脫離滓濁躋陵
兢造託微波訊嚴陵清遐可使貪者懲山窮水盡
乃攀登爛柯巖岫孤峻嶒幽邃闕矚岕險憑少畱

觀奕喜莫勝子官其間良足稱子材秀美神粹凝
萬象態度遭披凌吟咏設寫踰畫繪當有味者論
淄澠今予癡仕如秋蠅飛塵滿耳汗浹膺聞子大
編行可乘骨目森竦神慮興子姑去嗟予未能送
子一念魂九升

李山英以疾歸田客有言山英移書石守道
者因撫取其略作詩以送之

吾友守道氣剛勁醜邪扶直出天性意高身賤無
所發胸中事事先後併襄嘗畏其大勇果願以中

直爲得正忽聞魯士李山英移書告之要力行曰
今天下最急務邊頭戰守羗夷橫異術紛回蠢化
原佞夫欺巧疵邦政生民失職餽斂繁勢若久旱
方雩禱安得快雨洗長空萬物蕭森蒙大慶古人
有以身殉言前者已僵後者更況值朝廷尚寬大
苦諫兼容天子聖我疾不幸子可屬或列封章或
廷諫勿學得路世俗兒軟語妖歌日酣營乃知山
英落落者支革雖疲心愈競予思物理似顛倒難
用智愚準衰盛賢豪旣少遇又稀或老且困壯而

病就令貴顯亦迤躋尤觸陰機石臨窵一思九歎
起呼天何等官曹司是柄由來宰主都冥冥用捨
惟時窮達命山英歸去亦何恨門外無塵春色淨
回看名宦似浮漚都把雄心付觴詠

送何秘書三子歸泉應詔

秘書昔共官臨漳時呼三子侍側傍修瞳潤穎善
應對舉止不類羣兒行遙知成就在他日爾時迄
今十載彊閩州太守無伎術乞持符竹還故鄉近
觀詔書下郡國選訪行實登俊良疑然三子復過

我衣裾飄灑凝秋霜各攜編軸幾百幅互以理學
克詞章久之潛思叩幽眇角牙騰觸聲礪礪言歸
溫陵入場屋爭奮筆舌論短長海鷹上雲出爪翼
天馬歷地無羈韁秘書多才晚未遇有如此子傳
義方吾徒沉昇不須議且看少者騰聲光

州學餞送解發進士

坐中分得意字

朝家歲取天下士官守小大悉分治育材論薦苟
失宜德業英豪苦難致予嘗備員內供奉作書叅
議科場事鄉舉察廉未易復責其節行在長吏策

之當世之大務適時可以觀周智問之六經之歸
趣知言可以見精意衆賢一劃天子可開設學校
朔南被世儒苟欲便有司詔令初傳尋已置今年
郡國選多士糊名仍舊搜取類常憂璣貝隨手遺
往往中夜起不寐折封辨號指姓名十九冥合州
人議耽耽鬻舍秋景長芳殺旨酒邀賓醉惜哉今
樂與古異遣士禮數不能備霜天寥寥萬象清健
風開送羣飛翹大明帝居一氣傍春日照耀桐槐
翠勉思竒策當天心厚祿榮名時所貴時之所貴
亦外物君子存誠思遠至

聖泉寺松徑

徑中草不植

青松苒苒門前道根底堅牢顏色好鳴籟蕭森風
雨生紫鱗開動龍蛇老天若有意別畱種百年其
下無纖草雷霆時達雪霜重勁節支扶不顛倒野
姿峭拔已背時肯要藤花彊纏抱南方赤夏苦蒸
濕萬木無聲就僵槁忽經密蔭少休息肌骨便驚
秋氣早寄言匠者勿復顧畱作清涼除熱惱

題譙國評事壁

長峴隆雄來北邊勢到合下方回旋三世白士猶
醉眠山翁作善天應憐如彼發源今流泉子孫何
數鷹馬然有起家者出其間願翁壽考無窮年

送勤上人歸吳中

吳江水好吳岫靈吳人晷白神氣清當須比屋皆
佳器柰何儻有名公卿究觀是事見藏伏例學浮
圖超死生遂令才智蓄利澤若日不下霑四瀛勤
師內外久著力文字骨節初老成十年棲遲輦轂
下淵然淡薄無經營惜哉明了足見解獨擘迅翮
翻青冥殘秋忽別東南去塵土擺落衣裾輕西湖
勝處拂談席綠波畫舫吾其行

送石昌言知宿州

符離封城古云望扼控東南地形壯飛流金粟走
舟車鎮壓奸雄宿兵仗昌言才思老臺閣聲名遠
出風騷將倦直承明得守符詔書遣臨士民上萬
家裁製須得宜譬若梗楠迎大匠京師從遊日月
久送君酒酣益惆悵人生豈効鷄鶩羣意在糠梁
取甘養邊隅多故方急材往往稠人拔公相吾儕

有策空自竒皎皎丹衷亦誰亮欲隨戎馬僅勝衣
疆作文章還覆醬大都用置繫於時丈夫未死固
難量觥巡卷到君勿辭行看岸下船頭放我今聯
束若愁鷹注日青雲思遠颺一麾當復泛隋渠願
君加數爲公釀

荅葛公綽求猿

子求穉猿書至聞我說猿意持贈君吾州四面列
巖巘鉅木輻葛凌氛氲探窠栽檻走疾置十日可
至澄江濱嗟憐庶品各有性拘憂適喜無間分彼

猿之類宅丘壑愛戀深厚編前文戲禽雖傳古仙
者射臂未許今將軍朝棲喬木之蒼莽夕飲幽澗
之潺沅山空月明一長嘯商船海上迎風聞君家
東園豈不美檜竹翠密蘭茝薰斯猿儻憶故時侶
舉首斷隔千里雲縱之不遣乃得所推原此理惠
澤霽今吾郡邑決籠桫蹄者奔逸羽者粉因觀微
物通萬化譬諸獻鵠良有云

甲辰閏月初伏快雨涼風晝眠初覺庭前小
欄花木各有意氣戲效柏梁體

閏夏天氣熱燄烘崇朝快雨隨清風晝軒夢覺開
前櫳畫欄花草意氣雄側枕遙問數異同如子微
物煩化工盍各言爾之所從繁葩富艷生朱紅海川
棠枯條大蕊千萬重機絲修幹點綴赤日中蜀蠲去
憂忿誰與功草萱採摘烹煮祛煩胸百秋霜鉅實垂
如甕木橫柯遠引交加叢紅玫瑰葉抽綠劍端黃茸
山直立開披泉貨通錢金疊遶翠羽翻蚪龍薛荔誤入
畦町非余公項助滌渴肺思匪躬麥門冬物物自名
詞不窮願當我意乃汝容負汝不飲慙衰翁

和荅孫推官久病新起見過

去年大暑過京口惟子見過牛馬走氣溫貌古風
骨粹如入魏國逢軻叟前趨王事難少畱兀若洪
鐘未遑扣窮秋忽聞感疾恙鬪蟻在牀楊在肘天
生賢者固有待豈得數竒而不偶勿藥之喜旣和
平大嚼快噉飲幾斗神明復還方寸靜萬卷舊書
仍次部新年於已無職事雖欲耕田不盈畝輕舟
將覽吳中春獨信檣鳥泐霞藪知子玉趾遠臨訪
倒屣出迎惟恐後山堂永日接言詞楚萍色味兩

俱剖自云君命入巖幽顧此一身縈組綬病軀未
堪事刀筆野性如何屈杞柳寧甘貧薄且晦處終
歲窮經從皓首陶家埏埴以爲器其大如甕小如
缶昔人知命斯尙通動靜以時隨所有我聞子論
心惻惻儻或祭天必薪禋大篇短韻時見投開霽
清暘穿戶牖強抽鄙思荅長訶脂澤陋容益滋醜
錢塘風物湖山好與子相從頻載酒一水汪灣暮
日浴千崑轉側朝雲嘔放懷方外聊自適舉杯相
屬起爲壽美哉此樂世難得勿話歸期論子丑

和王學士水車

星鳥正中春事茸農夫入田布嘉種田中白水極
瀾漫鷺翅羣鴛魚鬣聳扶持水車倚塍畔翻翻龍
脊超雙踵日在天中人在野脫粟未逢心益恐婦
姑晚餉猶德色童稚伺餘窺饁籠夏苗欲長苦焦
枯又送微波上層隴傷哉作勞無早夜歲終羸饒
凡幾桶音甬 秦斛豐年遺秉尙或歉一有不登皆散冗
賦田無利從來遠索息嚴於公上俸富者不耕耕
者饑役民權枋雄豪總錢塘風俗本夸奢工商射

利尤加勇丁男恃壯走長街僕奴意氣金銜驟方
春遊女湖上行舉首惟愁釵插重笑汝田家弄水
車何不乘時作光寵

元日過浦城西陽嶺

逝者東流水情知無却迴遲留曾到處嗟苦不同
來誰道新年好風物忍將淚眼向春開

丙午二月十二日雜言

仲春一浹我生之辰紀歲之行五十有五慈親是
時九十二稱觴獻詩壽於膝下音協曾孫滿前侑以

詞慈顏強飲至酒所我今鬢髮白垂絲揮拂萊衣
輒起舞願親長年無窮已願兒強健典州府不富
不貧正得宜如我奉親難比數

五言律詩

和御製觀三聖御書

聖業存功德宸毫冠藝文勢開千里浪光動九天
雲法駕乘時至仙都與世分皇心欽寶訓求治益
精勤

附錄 同和御製

歐陽修

層構嚴清禁披圖爛寶文虹蜺光照物龍鳳勢
騰雲妙極功歸一真隨體自分孝思遵寶訓聖
業廣惟勤

溪行

秋氣已寥落清溪纔此行船移酒盞側魚得鱸刀
鳴日色浮兼動風痕滅又生從知隱者趣不獨傲
榮名

西郊

曉蓋西郊道春光極太虛村風香晚稻溪日曝寒
魚雀噪饑鷹下山空病木疎歸期侵杪歲東望是
吾廬

三月詣陳逋民

振衣凌曉色霽野縱遊韁莓澗溪雲重春深山露
香林幽風更細院靜日偏長曾是天皇外相從識
酒鄉

次韻翠崑寺

攬蔓嚴扃峻交繩寶界平斜峰約雲勢乾樹起秋
聲泉檻妨蛩響霜樓助月明冥筌兼灑落警句一

何清

夏晚南墅

夏竹侍前楹涼襟拆舊醒疊雲封日茜斜雨著虹
明魚動池開暈蟬移樹減清葭洲烟向暝鳧鷺自
相迎

蕪陰樓上

野馬沉寒氣神禽度細風斷霞天共紫斜日樹齊
紅山口橫虛榭江隈跋遠艘解窮千里目爭柰思
無窮

和丘提刑寄湖南賈度支

何處多離感山郵霽野光清吟貫騷雅遠意屬荆
湘霜樹呈秋色風蘭生晚香使輶偏倚望摛藻寄
迴腸

和丘提刑聞新鴈寄賈度支

翔鴈來江渚秋容在遠空幾聲疎樹外一字斷雲
中虛館垂簷月平臯敗葉風裁詩託幽思幽思更
無窮

嵩陽道中

千里動秋意縈迴上古原山樵斲晚日野火著寒
雲鍾磬出鄰寺牛羊下遠村振衣歸去好塵事莫
知聞

送別陳比部

祖帳西郊道川原畫閣臨燒痕經雨活樹色過溪
深斜日明春態孤雲減客心何人知別意重把酒
盃斟

城西金明池

曉出都門外名園連翠屏融怡春物動蕭灑宿塵

醒輕風送花信遠水涵空青舊遊無處問芳樹隔
重扃

題僧希元禪隱堂

院在蘇州城中

遊錫遍他方歸休靜默堂孤吟時有得諸念若爲
忘刪竹減庭翠煮茶生野香雲山莫騰誚心地本
清涼

題杉溪驛二首

宵行避酷暑山路乍縈迴明月正相向涼風時一
來幽林潛物怪秘洞蓄雲雷豈敢憚勞苦畏途誠

可猜

隘道臨深壑俯闌千仞彊驚禽忽獨去怪石偶成
行月下芙蓉色風前穉稭香反慙羣動息幽意更
傍徨

病中偶書

已感節候變物態舒陽春那復壯年意如今多病
身淨室焚香久烘鑪煮藥頻神歎百慮解消盡眼
前塵

發篋得亡友書札

宿昔重交義零落今誰存舊情留紙札永恨入丘
墳世味薄於水生涯空似雲撫孤無力及流淚復
何言

正月巡歷部郡侍親還家

養親方解郡奉使又還家遠岫鄉關近前旌父老
遮揮金貧自媿舞彩喜仍誇特地延賓友相期詠
白華

三月再還家

曉樹鄉關路春衣使者輶江眠聞落霰野飯撥新

苗入里威稜減寧親喜氣饒勤勤父師教民病若
爲消

題龍紀院僧室

山僧九五行是百年人焚香猶夜起喜酒見天
真生平持戒定老大有精神須知不變者那減故
時新

溫成皇后輓詞二首

紫極騰軒曜青春委薜顏雲輶何處去金殿幾時
還仗下編簫咽陵中夜燭間六宮哀送返疑是夢

魂間

翟綵開新禮金文易大名真遊上僊路故物感皇
情月落辭丹禁春前引素旌罡風吹挽鐸不是珮
環聲

宋宣獻公輓詞四首

重器摧隆棟馳光逐逝川人應騎尾宿歲亦在辰
年文思精天下忠謀盡帝前惟無豐室累清白是
家傳

申命增華袞遺忠動紫宸世風存令子暮哭有慈

親復辟前言在論兵密疏陳如何年不永無路問
蒼旻

懷道初名世乘時遂致君平分百年筭中据兩台
文行翼連寒樹疑笳上晚雲路人那得識揮涕指
幽墳

洛宅初開府非才辱顧隆遺思謠俗在餘論宴堂
空已矣蒼生望嗟乎吾道窮豈惟懷舊德一慟向
春風

謝杜相公

并引

伏睹宮傅相公精詞健筆輒然成詠敢觸冒戰
鋒但伸慙慙之至

謝政閑宮傅當年老相君詩情通造化筆力作風
雲是則經綸手施於淡泊文捧窺心感悸無路候
公門

汾陽夫人輓詞二首

福偶天家出賢名戚里推朱顏不待老萬事却成
悲宿露霑新隴秋風過舊帷誰歌均一德傳繼召
南詩

借有百年在都如一夢迴幻生還復滅僊去不重
來樂色開宵院衣香秘夜臺行人知令淑哭送侍
兒哀

過泗州嶺

衢州道中是年冬十二月
室家永嘉郡君郭氏亡逝

二十五年間三迴共往還那知臨白首相失向青
山想像音容在侵尋鬢髮斑平生多善行應不下
塵寰

寶月法喜堂

少悟浮圖去因傳法喜名於人無厚薄知己盡豪
英藥舍朝鑪暖碁窓夜燭明性懷元自得未用厭
逢迎

寓居興化轉運驛舍

病惱連春夏居閒意味長海風生永晝山雨送微
涼書帙梅蒸潤衣巾荔實香塵緣消遣盡物我久
相忘

仁宗皇帝輓詞六首

一首在七言律

向近千秋節何言七月期遺恩羣玉宴往事禰宮
祠仙路雲龍會秋風鼓角悲萬人瞻彩仗猶認告

行時

聲教中原泰恩仁萬國臨憂勤符帝夢付與得天
心簫吹凝寒氣雲山歛夕陰還期千載後歌頌莫
知深

儉薄畱遺詔遵行在繼承桐棺會稽冢瓦器孝文
陵關外秋螢度林端曉月澄須知無可欲終古不
騫崩

萬世威神在多方惠澤隆密音通虜壤行哭亦兒
童畫翬離丹闕幽堂對紫嵩孤臣空雨泣白首把

遺弓

儉勤追禹績恭讓體堯仁措枉朝多直除苛吏盡
循遵儒恩禮異左戚賞刑均立子知天意超然卽
上賓

攢宮開七月隧路閉千秋地帶三川拆天含萬國
愁烏雲知聖沒龍駕想神遊厚祿將無報慙恩更
白頭

洪澤阻風

今日風期惡遲迴一水濱村旗呈酒聖廟鼓賽河

神躍鯉曾驚網饑鳥不避人商工時借問何處卽
通津

遊金山寺

平日厭塵土今遊興味長波濤圍四際臺殿起中
央魚聽晨餐鼓雲和夕炷香薰風休遞吹襟袂不
勝涼

開州園縱民遊樂二首

風日朝來好園林雨後清魚遊知水樂蝶戲見春
晴草軟迷行迹花深隱笑聲觀民聊自適不用管

絃迎

節候近清明遊人已踏青插花穿戟戶酤酒向旗
亭日迴林光潤風迴海氣腥未知何處樂歸路已
嚴扃

夜雨病中

久雨曾無度陽和漸向闌雜香生衆木濃翠入孤
巒漏緩宵仍靜燈微曉更寒芳時猶臥病何日出
城看

寄來安孫推官

我愛孫公子安貧無所營相逢雖邂逅一見卽平生
黑電揮詩筆黃河瀉酒觥輕舟何處在別思苦
搖旌

唐彥猷輓詞二首

鯁亮馳名久孤高進路難富文平日業勸學晚年
官隧外春江靜林邊曉露殘惟應墳上土猶解長
芝蘭

舊德推當代新悲入故鄉直當冠獬豸清可濯滄
浪美研睛煤色文甌書茗香生平無復見流涕過

幽堂

七月二十四日射弓

破的心仍在爭毫力不堪開弓初覺顛盈貫未離
貪衰病先期老中年豈分其惟應罇酒在萬事一
微酣

冬溫

海曲封疆僻冬溫氣序差蟲蛇誰閉戶草木自開
花霧重朝迷日風號夕卷沙可憐天地雪偏解舞
京華

大湖驛寄建州同年賓職方

別驛臨溪曲清寒結曉陰灘聲生亂石雨意入閒
林登第年華久相逢禮愛深茶山春物近那得共
追尋

題嚴先生祠堂

遵養巢由志誰希公相權人瞻祠樹古天作釣壇
圓高節千秋外遺蹤一水邊孤風敦薄俗豈是愛
林泉

宋宣獻公夫人畢氏哀詞二首

世閥推台路嬪賢秉國鈞生緣隨迹化歸處覺空
真訓子清風在傳家令德新九原終一致悲喜盡
成塵

國賦雖千乘身期未百年箴圖遺舊机簫吹向新
阡行哭追前日超生定幾天寂寥原上樹薄晚起
寒烟

宴桃杏園

送客來仙館清遊處處尋薰風行酒面霽日到花
心獨厭歸期促難忘野趣深跨鞍更回顧檜栢自

森陰

遊靈峰院龍龕山

天柱支南極蓬山壓巨鰲雲崩石道險潮落海門
高客館聞鼙鼓秋風憶鱗螯凭闌望鄉樹千里楚
江臯

附錄

奉和遊龍龕山詩

董

淵

長樂縣令

礪砢彌沙界豁訝古洞天門鄰金布地橋枕玉
鳴泉庭鶴歸迷主龕龍去失年掃雲嫌俗駕題
壁記詩仙勝景無今古居人有後先不知遊者

馭誰見海爲田

七言律詩

上元進詩

并序

臣伏觀法駕特御端闈宣諭臣等上元觀燈不
爲遊賞蓋與民共樂也臣職在文字恭惟德音
宣布睿旨感詩人揄揚盛美輒成短章上干宸
覽臣無任惶恐戰越之至

疊聳青峰寶炬森端門初晚翠華臨宸遊不爲三
元夜樂事還同萬衆心天上清光留此夕人間和

氣閣春陰要知盡慶華封祝四十年來惠愛深

久寓悟空刹行而書之

寂寂精廬切半空古原高下稻花中蓮趺披素新
秋社華萼雕紅細雨宮孤鶴睡迷千樹月斷蟬吟
曉一樓風心縻尺組遙相謝歸馬南蹄疾似蓬

附錄

葛

密

字子發
江陰人

近造浮屠之悟空者覩君謨省主給事畱題詩
板列楣棟間粲然可識因撫方袍之意成拙句
一章以寄

昔年詩板著蓮宮筆力雄豪墨彩豐不日三階
平國政山僧應待碧紗籠

漳南十咏

龍臺

漸看初日照龍臺白玉高堂錦幃開樹色一番遞
鳥過溪光幾曲抱山來雲歸深洞天形瘦風落前
村笛弄哀擬結青樓遍題詠思王何吝斗量才

城東水閣

亭上芳樽惜別人亭前斜日欲歸輪傷心定是丹

楓樹拂面空來紫陌塵歲月暗驚山色古愁情長
與草芽新何時此地迴飛蓋寂寞欄干又一春

南溪

近郭溪光綠好裁雨晴波底做樓臺蔭堤佳樹千
圍合掠水輕舟一箭開驚釣寒魚拖糝去忘機閒
鳥信潮迴官餘擬欲祛塵意書遍平沙我獨來

滿月池亭

有客高懷脫世紛碧灣晴檻樂遊頻無心自合波
中月照影誰分鑑內人莎砌亂蛙爭噪雨杏梁雙

燕欲畱春長年老厭趨豪末來揖孤雲作上賓

西湖

湖上山光一抹青佛宮高下裹崑局煙收水曲開
塵匣春送人家入畫屏竹氣更清初霽雨梅英猶
細欲殘星吳船越棹知何處柳拂長堤月滿汀

圓山廟

風雅遺芬嶽有神此山靈祀越千春彩毫佳句言
猶在翠琰新詞意未真絕頂黑林長帶雨曲嵯飛
磴不畱塵瘴雲收盡秋田熟祓境殺漿再拜人

陳將軍廟

曾憑水柵誓長江報國全軀事不雙力屈已嗟關
羽死勢孤猶笑李陵降宿墳古劍龍腥匣壞壁靈
旗獸纏扛神理高高人意近楮錢祈福暗塵窓

白雲亭

雲擎暈檻翠崑巔石老松皴不計年舉世覺來空
白日幾人遊去上青天醉看絕壑都無地嘯倚清
風只恐仙花晚春殘無限意他時回首定依然

齊雲閣

紫閣青梯壓翠岑春情秋思共登臨雨嵐供眼橫
千掌星漢垂簷直半尋忍別朱欄真俗吏獨棲珍
樹祗仙禽當年人事多竒尚擬托巖扃息寸心

東郊

苒惹晴雲釀雨時東城無處不芳菲斜坡草短孤
麕臥平隴苗深雙雉飛照塢亂花驚客眼罨空輕
絮點郎衣年來意氣多羈束無復長楸帶酒歸

耕園驛佛桑花

溪館初寒似早春寒花相倚醉於人可憐萬木彫

零盡獨見繁枝爛熳新清艷夜霑雲表露幽香時
過轍中塵名園不肯爭顏色的的天紅野水濱

奉酬王知縣賞春不與以詩見贈

仙阪翠觀盡繁英朱白相兼照眼明池浸嵐光生
晚碧鳥驚人語斷春聲談諧遽喜開懷久骯髒終
慙走筆成佳致可能陶靖節庭柯斜眄獨忘情

喜弟及第

里開高高祖德新魯庭詩禮孟家隣連登桂籍青
袍客共拜萱堂白首親倚國精神明火玉照人清

節對霜筠童襟開慧盈書館漸喜芝蘭在處春

杪秋湖上

舊暑侵涼已分銷扶疎丹樹見斜橋千千露竹全
瀟灑一一風蟬共寂寥菰米熟汀來客燕芡絲分
水避歸橈月魂未上東城角誰向東城與下招

和陳殿丞南州新詠

寶坊高閣遍憑欄曾是芳辰得未閒日上天容低
接海風輕湖底倒搖山夜深佛火寒星外春過人
煙暗樹間無意孤吟採幽致異時行橐斷空還

過天津橋

日暖溪平水漸銷，水聲纔下內前橋。山川滿眼閒
宮殿，草樹迷人舊市朝。每向尋春偏有意，却成懷
古更無聊。洛陽平昔多豪傑，惆悵埋魂不可招。

讀離騷經

莫怪靈均戀楚濱，可能臣子外君親。精心獨去珠
無纈，飛語潛來箭有神。宋玉魂招推意遠，揚雄涕
掩著書頻。江邊自是修文路，嗟苦先生隕此身。

暮春登南門

麗譙高倚晚天霞，滿目平臯盡物華。十曲胡笳催
鼓，苔三重湘酎倩旗誇。連江急雨送歸燕，拂地輕
風移落花。彊凭欄干還自問，此情何處是邊涯。

聞福昌院春日一川花卉最盛

聞道春深多物華，遙憐春物思無涯。煙涵樹色相
依好，山擁溪流一帶斜。休問主人先看竹，只隨漁
叟便逢花。憑誰畫得當時景，持去江南細與誇。

金明池小飲

城西禁籞宿煙收，霜薄朝寒上蜀裘。佳樹得春生

意動平池受日翠光浮十年歌笑驚前世滿眼風
華是舊遊從此曲江芳物好定知重到更疑留

寒食樂詞

皇州令節已藏煙帝渥乘時錫廣筵和氣去添春
色重恩光來助日華鮮千聲鳳吹朱門裏一道花
香穀雨前更喜簪裳嘉宴日親逢干羽治平年

附錄

秣陵寒食有感
次蔡端明韻

無名氏

帝里于今不禁烟侯家人夜盛張筵雲移乳酒
傾杯辣風送河豚下筯鮮舞影嬌低燈焰外歌

聲細繞柳條前大東杼柚徵求急誰信頻書大
有年

喜歐陽永叔余安道王仲儀除諫官

御筆新除三諫官喧然朝野競相歡當年流落丹
心在自古忠良得路難必有謀猷俾帝右直須風
采動朝端人生萬事皆塵土畱取功名久遠看

送楊殿丞通判睦州

蒼崖中斷一溪來迤邐人家向水開盡日煙雲迎
旆去滿瀧鏡吹引船迴虛齋晝夢鳴禽下別塢春

遊畫角催莫怪杜郎題處少更畱佳致待清才

廣陵

廣陵歸客歎飛蓬懷古傷離向此中前世翻波那
復問十年彈指已成空樓頭畫角催殘日城上寒
鴉噪晚風井徑蕭條人不見又隨潮信度江東

馬奴周晬思之因成

馬奴今日方周晬昨夜迢迢夢到家盤裏應知心
所愛尊前惟祝壽無涯伊嚙弄語羣兒學踉蹌初
行乳母誇獨上揚州津館望江山搖落去鴻斜

江頭別杜殿丞

揚子江頭南北路木蘭船上往來人年華滾滾東
流水世事勞勞薄宦身回首天涯成遠別忘懷物
外自相親津亭共起憂時歎重記津亭淚滿巾

經錢塘故宮

廢院蕪城裹故宮行人苑外問秋風當時歌舞何
年盡此意古今無處窮往事蕭條隨敗葉客情迢
遞寄孤鴻扁舟欲去更回首寒樹蒼蒼夕照東

宿延平雙溪閣

鳴籟蕭森萬木聲濃嵐環合亂峰青樓臺矗處雙
溪會雷電交時一劍靈曉市人烟披霽旭夜潭漁
火鬪寒星畫屏曾指孤舟看今日孤舟在畫屏

附錄

賦雙溪閣屏參
君謨詩聲字韻

劉子翬

字彥冲
謚文靖

雄觀今古快幽情突兀層樓出市甍二水交流
何處盡孤舟不見亂山橫丹壚寂寞仙遊遠劍
氣蕭條客恨盈向晚移尊話流落可堪時聽鼓
鼙聲

晚上碧峰亭

城頭近晚忽開晴有色皆鮮景物清地勢四來州
午向山圖一罅水東行乘風歌吹無時已面日樓
臺觸處明不比兒曹誇衣錦自緣恩與養親榮

和王介夫遊西禪兼呈黃承制

山城只有四圍青海國都無一點塵荔子風標全
占夏荷花顏色未饒春水邊清吹傳觴久路上殘
陽立馬頻不是閒來誇景物欲將謠俗寄玉人
興化軍曹殿丞荔枝

厚葉纖枝新絳囊使君分寄驛人忙彩毫封處曾

留意筠籠開時不減香風色甚豪應少損路程差
近得分嘗閩州縱有千千樹未抵家園氣味長

和曹殿丞寄荔枝

荔子凝丹摘曉鮮江南來路與雲連託根曾是三
山下結實應歸萬木先鄉國遠携甘旨重宴堂分
翫色香全清才仍更傳新唱一一驪珠照眼圓

飲薛老亭晚歸

終日行山不出城城中山勢與雲平萬家市井魚
鹽合千里川原彩畫明坐上潮風醒酒力晚來巖

霧蓋鍾聲歸時休更燃官燭在處紗燈夾道迎

附錄

得福州蔡君謨
薛老亭詩并茶

梅堯臣

薛老大字畱山峰百尺倒插非人踪其下長樂
太守書矯然變怪神淵龍薛老阿誰果有意千
古乃與竒筆逢太守姓出東漢邕名齊晉魏王
與鍾尺題寄我憐衰翁刮青茗籠藤纏封紙中
七十有一字丹砂鐵顆攢芙蓉光照陋室恐飛
去鑱以漆篋緘重重茶開片鏤碾葉白亭午一
啜驅昏慵顏生枕肱飲瓢水韓子飲蓋居辟雍

雖窮且老不愧昔遠荷好事紓情悰

和許寺丞泊釣龍臺見寄

釣龍臺下艤行橈獵獵船旗待晚潮萬里征人應
悵望一川秋色正蕭條雨雲來去山明滅風浪高
低日動搖有志四方男子事莫懷鄉國便魂銷

寄荅汝州王仲儀待制

汝水閩山道路長行郵時復寄新章諫垣笑別三
年近病枕魂飛萬里疆烈火未應焚玉石埋輪曾
是問豺狼主恩未報頭生白羞見龍泉百鍊剛

吳屯驛曉起

殘月依山明朧朧長煙浮水白糝胡竹林繞舍啼
鴉白石井當窻下轆轤迎吏遠傳空狀小僕奴潛
報一錢無騶兵不啻晨炊絕呵叫籠頭意氣麤

晝寢宴坐軒憶與蘇才翁會別

投涼下馬臥僧家遶簾清風卷絳紗修竹滿前微
雨過遠山無際薄雲遮武侯舊隱人應到

京西提點刑獄

解字在鄧州粵國孤城日自斜解與塵心消百事更開

新焙煮靈芽

懷文雅儼上人

填填車馬走沙塵中有伊人離俗氛千里不逢京
下信五年虛斷海邊魂何窮世事秋林葉自在心
靈晚岫雲聞道西堂今睡穩暮鐘朝磬欲何云

耕園驛

并序

明道中予爲漳州軍事判官晚秋嘗至州西耕
園驛驛庭有佛桑樹十株開花繁盛念其寒月
窮山方自媚好乃作耕園驛佛桑花詩一首旣
而乘桴東下又作溪行一首慶曆元年予使本

路明年夏四月自汀來漳復至是驛花尚仍故
追感昔遊因紀前事并載舊篇龕於西壁

使輶迢遞到天涯候館遷延感歲華白髮却攀臨
砌樹青條猶放過墻花悲來惟見金城柳醉後曾
乘海客槎欲問昔遊無處所晚烟生水日沉沙

白蓮院東軒

并序

漳州白蓮院予爲郡從事時多所醺遊今十有
五年因使復來當時遊者零落殆半愴然成詠
寄題東軒兼簡宗要上人

昔年文酒自爲情身外鴻毛萬事輕暑醉每憐風
引夢夜歸多見月隨行重尋蘭若餘芳在却怪桑
門老態生點數朋遊今有幾拂塵看字淚先橫

別邵武長史朱照鄰

竊比君侯病馱馱時看雲路忽長嘶十年還此同
杯酒三驛剛來踏雨泥土行滿鄉元自好宦名當
世不勝低未霑釜粟榮新祿應上亨衢別有梯相送

三日

哭賈少卿

庚辰年白潭州謫所遷
少卿知廣州未行卒

畫旗南度謫長沙粵海新思路更賒子日鵬來知
主去辰年龍會爲賢嗟猶多婚嫁先捐館無復田
園可寄家曾是德公推獎厚一觴何處酹魂車

和杜相公謝寄茶

破春龍焙走新茶盡是西溪近社芽纔折緘封思
退傳爲畱甘旨減藏家鮮明香色凝雲液清徹神
情敵露華却笑虛名陸鴻漸曾無賢相作詩誇

附錄

和杜相公謝
蔡君謨寄茶

梅堯臣

天子歲嘗龍焙茶茶官催摘雨前芽團香已入

中都府鬪品爭傳太傅家小石冷泉畱早味紫
泥新品泛春華吳中內史才多少從此尊羹不
足誇

附錄

和梅公儀
嘗建茶

歐陽修

溪山擊鼓助雷驚逗曉靈芽發翠莖摘處兩旗
香可愛貢來雙鳳品尤精寒侵病骨惟思睡花
落春愁未解醒喜共紫甌吟且酌羨君瀟灑有
餘清

城西射弓挺之以病不至簡示新詩有惟應

欠我渭城歌之句謹吟一篇以荅佳意

雪後西郊物外清官閑乘興此行行出門疎樹無
塵色入內流渠帶野聲近臘酒醪香更釀得風弓
箭力還生知君病起心猶壯獨背船窻唱渭城

因書荅河東轉運楊樂道

前歲君提嶺外兵國門南路送君行由來成事多
天幸直向危時見世情勉力朝廷論大計甘心江
海就私榮

予請罷開封
府出知泉州

牢愁應解侵人骨未老先

教白頭生

過真慧素上人院見紅薇盛開因思西閣後
軒數株遂成短章寄翰林原叔八丈禹玉閣
長兼書真慧壁間以記所遇

八月吳天覺早涼翠叢初折碎朱房繁枝欲卧不
勝力落片將飛猶自香西閣二年臨晝夢金刀一
夕掩春芳嘗令花工以綵
爲之殊逼真也欄邊想像類回首漸覺
星垣迥漢傍

杭州訪吉祥璘上人追感蘇才翁同賞牡丹
曾乘春飲遶花畦花底餘香入燕泥剪處佳人傳

燭下歸時明月到雲西重來草樹驚秋色零落交
情感舊題若使他年逢勝賞一觴知復共誰携

丙午元日過浦城西陽嶺

曾侍天王玉几傍累年侍
執壽觴捲簾袍色殿中央重霄
未徹宮縣樂上宰初持萬壽觴曉日半臨幡影轉
春風偏送佩聲長今朝千里穿雲嶺喜奉親輿返
故鄉

丙申五月遊興化西門上溪

尋溪因過上溪遊雨後溪渾水亂流因傍堤松却

飛蓋爲聞山鳥輟鳴騶平田穰稔青雲合滿谷芭
蕉碧玉抽開濟無功須早去故時瓜隴有通侯

謝宋評事荔支 并序

伏蒙評事宋丈分貺家園丹荔世傳此樹已三
百年黃巢兵過欲伐之時王氏主其樹其媪擁
樹願并戮巢兵爲之不伐今雖老矣實益滋繁
味益甘滑真佳樹也因成短章用酬厚意

齋館從容接燕申每臨佳樹走觥巡兵鋒却後知
神物年壽高來况主人竝賞昔聞思故友 公嘗言
陳大監

方諫議及太
卿並曾會賞分甘今喜奉慈親豈惟特祝公難老
兼欲靈株比大椿

附錄

宋君介夫遺荔百顆并
蔡公墨跡一紙用原韻

盧

琦

字希
韓

病客愁懷鬱未申窮簷盡日幾迴巡多情故舊
偏憐我一種甘香最可人宋祖聲名傳耳底蔡
公墨跡喜躬親千年佳樹蟠根在莫怪莊周說
古椿

評事阮丈手授秘文輒以蕪音用投真賞

手授新書荷至情何時仙訣得真精高年轉覺面

顏少細字全由眼力明
藥籙謾勞分上下丹爐終
費候虧盈爭如一語醒
然悟獨葆天光不外營

和詩送茶寄孫之翰

北苑靈芽天下精
要須寒過入春生
故人偏愛雲腴白
佳句遙傳玉律清
衰病萬緣皆絕慮
其香一事未忘情
封題盡是山家寶
晝日虛堂試品程

詔貢士

星騎翩翩鶴詔來
旋聞歡語沸春雷
天閑未減真龍種
滄海還空老蚌胎
拂紙半毫含意勁
摩雲雙

翅待風開寄言商
頴辟榮客好致吾君
放首廻

福州堂下小欄花
草多是手栽今已繁
盛因

賞花有所感悼

愛花盡日傍花臺
點檢當年手自栽
前事已隨朝暮變
舊叢空見淺深開
山禽忽下還飛去
溪雨纔收又復來
只有春醪能遣恨
無人欄畔共持杯

登四徹亭

偶爾尋幽上翠微
遊人啼鳥似前期
花間行印露霑紙
山下放衙雲滿旗
艷艷舞衣朝日處
飄飄商

樽落潮時傳杯且與乘春醉身世悠然兩自遺

寄題張景山太卿園池

人仰公才世吏師更甘歸老舊林池門闌清似當
官處心力強於少壯時物理自冥非寄酒兵謀猶
在却因棋濠邊風月如招隱願拂塵裾從所之

仁宗皇帝輓詞

道德由來太古同生靈休養至仁中五兵不試歸
神武萬物無私是化工玉座忽逢春月盡金旌遙
指洛川窮年年翠輦長陪扈那向西城別梓宮

甲辰寒食遊公謹園池

二月名園翦鬱青爲憐佳節此閒行偶因觴咏心
還適暫離塵埃眼倍明風靜落花深一寸日遲啼
鳥度千聲主公高意何須道芳物於人自有情

重陽日有美堂南望

越邑吳封此地分華堂繁吹半空聞山峰高下抽
青筍江水東西臥白雲菊蕊芬芳初應節松林照
曜欲迎矐州人不見歸時醉未擬風流待使君

和答孫推官久病新起見過錢塘之什二首

於世無機是海翁容情醒醉任龍鍾廉纖雨意還
侵夜料峭春期未減冬寶氣上浮難掩玉歲寒中
立不凋松君王自結英雄網千載風雲定有從
病來安健賦詩誇甲子新移一歲加吾道所存惟
浩氣世緣何著但空花煙雲已過同歸鴈楊柳初
藏並宿鴉便擬尋山逐幽趣春泥隨馬不須遮

和夜登有美堂

忽聞乘月上層臺正值澄湖夜色開雲屋萬重燈
火合雪山千仞海潮來靜遊惟有詩情得獨笑應

無俗語陪縱使羈懷多感慨若逢清致少徘徊

和偶登安濟亭

津亭遙望草萋萋空曠清懷與物齊春水倒行潮
欲上晚雲平壓日先低高城覽古人何在遠渡傷
離客自迷好共山翁同出處不隨朝騎五門西

和江上觀潮

地卷天迴出海東人間何事可爭雄千年浪說鷗
夷怒一信全疑渤澥空寂靜最宜聞夜枕崢嶸須
待駕秋風尋思物理真難測隨月虧圓亦未通

和荅孫推官

擬將身計入扁舟縱得三公不黑頭病體已經休
賦鵬機心如動輒驚鷗強看吳野江山醉肯爲春
風花草愁所向乾坤皆客寓可能於我更遲留

和古寺偃松

古寺無人野蘚滋空庭永日雪風吹橫柯圓若張
青蓋老幹孤如植紫芝萬乘未輕蟠木器千年終
與大椿期須知才短爲天幸江上婆娑得所宜

和新燕

燕燕何來處處喧新從海上振輕翰卑飛不避春
泥重並語應愁夜雨寒寒舍暗窺吟筆健宴堂時
見酒杯乾雕梁信美多移主願爾將雛擇便安

遣興

苦竹生筍四五寸櫻桃開花千萬枝空濛野色當
樓處寂寞春寒帶雨時已放清歌逐瑤管旋篳新
釀行金卮衰翁酩酊自爲樂舉鞭不問并州兒

寒食西湖

山前雨氣曉纔收水際風光翠欲流盡日旌旗停

曲岸滿潭鈺鼓競飛舟浮來烟鳥疑相就引去山禽好自由歸騎不令歌吹歇萬枝燈燭度花樓

上巳日杭州東園

地上多於枝上花東樓凝望惜年華潮頭正對伍員廟燕子爭歸百姓家粉籜漸高山徑筍綠旗初展石巖茶流芳自與人兼老樽酒相逢莫重嗟

附錄

和蔡公上巳詩

鄭

俠

字介夫

愷悌侯藩修稷事風流草木薦天香使君喜爲民行樂擬築春花作舞場

四日清明西湖

千頃平湖綠一遭空城遊樂自奢豪畫船爭勝飛江鶻翠巘都浮戴海鰲芳草堤邊裙帶短柔柔陌上髻鬟高樓前盡日聞歌笑不啻秋風捲怒濤

十日西湖晚歸

清晨出郭又斜曛已見空枝嫩葉新爭得山頭能閣日且容湖上不歸春人隨百戲波翻海酒到三橋月滿身
三橋乃西湖歸路月中飲於橋上只有牡丹纔半拆未知何處可娛賓

十五日遊龍華淨明兩院值雨

垂楊修竹半藏山一徑紆回暮雨間
綠滿野田看渺渺白飛崑
溜自潺潺空村鮎背行歌去
古寺頭陀乞食還却美幽人在深僻
斷無來客扣禪關

十八日陪提刑郎中吉祥院看牡丹

節候初臨穀雨期滿天風日助芳菲
生來已占妙香國開處全烘直指衣
攬照儘從烏帽重放歌須遣羽觴飛
前騶不用傳呼急待與遊人一路歸

二十二日山堂小飲和元郎中牡丹向謝之

什

幾家園館見千枝白髮雖多意不衰
香澤最深風靜處醉紅須在月明時
已知佳節無餘日已過歲雨三日
更向殘芳卷一卮擬放春歸還自語
來年老信莫先期

荅孫推官

不是窮輪始問途肯將全壁混泥污
尚平婚嫁何時畢陶令田園先自蕪
羈旅且共家四壁牢愁須藉酒千壚
惟應竹素推文富落筆詞章氣象麤

和孫推官憶徑山遊

三十年前浙右行徑山纔稱愛山情油幢雙雙絲

杉翠

五山盡植絲杉

環珮涓涓石澗鳴

遶寺流泉

極峻只疑天

上遥遥臨初覺地東傾分符不得重遊賞喝石巖

邊記姓名

舊有記鐫喝石巖

奉荅孫推官南屏舊遊

已憐叢翠在湖邊最勝濃嵐返照前未省鬼工能
刻飾祇應山骨自清堅巖端下溜添春澗穴底來
風送野烟欲仗何人安屐齒更尋幽徑一攀緣

和登安濟亭

亭上風吹藤帽簷爲憐清勝得安恬驚濤觸岸層
瀾碎落日銜山半景尖遙認犀奔知露角忽逢龍

挂見胡顛

浙江時有龍起鄉人謂之龍挂

城南一去通滄海無限

春寒向晚添

和運使王學士舟次德清見寄

洛陽平昔誇文會君已勝冠我壯夫談道最先稱
賈誼憂時曾見哭唐衢

尹師魯兄弟多同會

敢將膠漆論同

志幸得湖山可共娛須向餘春迴馬足柳堤相逐

踏青蕪

和運使學士芍藥篇

密葉陰沉夏景新
朱欄紅藥自爲春
香於蘭芷偏饒艷
畫入縑綃未逼真
已恨芳華難駐景
可堪愁臥動經旬
三年想愛須畱戀
不爲江頭酒未醇

伏承躬侍安輿出遊煙霞洞拙詩奉呈運使學士

新晴特地入煙霞
道竝南山轉更賒
幽磬過隣溪口寺
衆鷄鳴午野人家
洞深隨瀑先如雨
石古籠

藤亂放花潘岳小園猶作賦
輕軒選勝樂無涯

和錢端明遊南屏山

新秋初變一天清
急雨仍添萬木聲
山勢若根空外起
湖光直際海東平
錦衣應有徘徊戀
金地聊開燕樂情
衰暮典城何所用
願公雲路羽翰生

清暑堂會同年

當年綠髮上天衢
三紀于今雪滿鬚
榮路風波多契濶
畫堂歌吹暫懽娛
杯中明月時搖動
草際飛螢乍有無
莫問更籌須劇醉
四翁同籍亦難俱

清暑堂中秋夜飲

江國初涼夕漏均青天無翳地無塵蓮花剪綵燈
光燦蕉葉傾金酒味新時節暗遷應不再歡娛難
得莫辭頻明年今夜中庭月依舊寒光別照人

宋君輔許當世陳彥謙蘇宣甫自遠還鄉上

元同飲

故國逢君慰喜偏清宵行讌重畱連山樓上火人
初合天漢無雲月自圓樂色時聞花院裏春風都
在酒旗邊莫辭徹曉須沉醉後會還應不計年

客有至自京師言諸公春間多會於元伯園

池因念昔遊輒形篇詠

綠渠春水走潺湲畫閣嵩巒映碧鮮酒令已行金
盞側樂聲初急翠裙圓清遊勝事傳京下多麗新
詞到海邊曾是罇前沉醉客天涯回望重依然

九日許當世以詩見率登高

霜雲明淨海山隈一歲登臨始此回堂上壽觴初
注滿欄邊佳菊似疑開故鄉情味人人好今日榮
恩節節來正是秋風洗煩暑力將衰颯上高臺

杭州璘上人以花栽數種見寄

名品參差十數窠商船千里犯風波土花分破根
株小春色隨來意氣多欲種更看移樹法將開須
與傍欄歌中年漸不勝杯杓紅翠他時柰爾何

庚子上元卽事

老去年華只自驚又逢佳節向山城春臨半夜寒
猶重月到中天色更清上客風流連宿醉遊人歌
調得新聲遙思鳳闕行時令紅繖朱欄萬燭明

安靜堂庭松

偏愛堂東砌下松三年瀟洒伴衰翁寒聲澹蕩潮
初上疎影孤圓月正中清徹紗帷延晝夢綠涵金
盞帶春風自緣多病饒歸思便覺山林野意通

四月池上

風下平池水暈開池邊露坐水風來草香苒苒生
吟席雲影飛飛度酒杯荷葉偶成雙翠蓋荔枝纔
似小青梅人間物靜兩相得月色蒼涼始肯迴

北園登高卽事呈諸同僚

江雲寒薄不成霜九月登高菊未黃飛鏑有聲弓

已力小槽分酒初嘗秋容行見丹楓老客意難

勝紫陌長時被召還都曾是禁園風物好故鄉時節可

能忘重陽賜宴外園

燕司封同年以詩見迎

寄問閩州明使君十年蹉跎路岐分帳前約束兼

嚴節福州乃案下文書接署雲福州知北去最先

趨畫戟老來應免醉紅裙新篇一覽空懷舊搔首

孤吟日又曛

題共樂亭

層巒高與赤霄通節歲歡娛衆庶同庭有美音非

獨樂岳會當炎暑自多風山川勝勢欄干下井徑

追遊月色中私幸編民居客右使君樽酒未應空

人日立春舟行寄福州燕二司封

清溪潮上送行船回望高城隔曉烟景色似看名

畫展前過君家醉魂猶憶壽杯傳君家世傳壽春

盤食菜思三九人日書幡誦百千南國逢君惟道

舊後時何處笑今年

又寄興化徐虞部

梅花狼籍拂輕舟人日溪行動客愁上國去程初
北首故山歸思滿東流垂垂朝雨隨雙槩草草春
蔬送一甌不獨懷鄉便多感看人難得似君侯

上元至南劍州大雨寄泉州許通判

路遶溪迴不計程行郵今復宿延平濃雲藏月不
知處急雨落天無數聲病起尚疑羣蟻鬪夢餘初
聽一鷄鳴泉山去歲同遊賞惟有之君識此情

寄題華藏院清軒

湖邊無地有塵埃况復虛明向此開山色每隨朝

氣變水光長共夕陽來船行天上遊人散樹沒雲
中宿鳥迴一到便應離火宅不須花雨拂金臺

過楊樂道宅西桃花盛開

城隈遶舍似山家舍下新桃已放花無限幽香風
正好不勝狂艷日初斜自憐馬上空愁望誰向樽
前與醉誇京國難逢春氣味莫隨塵事度年華

和張唐公約遊名園遇雪輒止

京塵官事日區區擬出芳郊佩一壺樓外陰雲迎
曉合陌頭霏霰與風俱翩翩珍騎曾來否種種名

花更在無若得縱遊休秉燭月中沉醉倩人扶

和楊龍圖蘆鴈屏

何事高堂秋思生野蘆寒鴈畫工精風前挺立孤
根老雲外相從去意輕不似丹青能借色若逢霜
月定聞聲研桑心術都無取回望江鄉計未成

附錄

次蔡君謨前題

趙

抃

字閱道謚清獻

省宇屏圖哲匠成寫傳蘆鴈筆尤精斜依風葦
叢叢裊遠颺烟波渺渺平弋者定嗟何所慕鵬
搏莫怪不能鳴公看羽翼飛騰處有意青雲萬

里程

和楊龍圖麋猿屏

畫莫難於工寫生麋猿移得上幽屏相逢平野初
驚顧共向薰風適性靈引子晝遊新草綠嘯羣時
望故山青可憐官省沉迷處每到中軒頓覺醒

附錄

前題

前人

猱狎猿馴遂性情恍然疑不是丹青豈憂夜獵
林中去只欠秋吟月下聽舉目便同臨澗谷此
身全恐寄郊垆山容野態窮微妙造物爭工六

幅屏

和吳省副北軒湖山之什

誰於素壁寫江流雲樹疎疎映荻洲盡日清虛全
却暑一川搖落似經秋暫逢明畫心猶在終向扁
舟老去休只有遊儵能自適莫懷香餌重遲留

送仲庶待制知澤州

十年臺省獻嘉謀新總兵符鎮上游琴有薰絃多
舜俗地連沙尾舊湘州江邊行色船千丈塞外威
聲馬萬頭宣室夜談思賈誼未應鄉國久遲留

送子真給事出守常山

安得長材護北州暫煩儒將擁輕裘聲名不啻一
敵國勳業何須萬里侯設館高牙延永晝獵場飛
騎入清秋天樞嚴近恩榮重歸夢應思帝所遊

送程刑部出守洪州

何事名郎出計臺鍾陵都會久須才江山不是人
間有旗鼓初從日下來列郡五符歸總制故鄉三
組少徘徊勿嗟南國多懷感寶氣還應徹斗魁

蔡忠惠詩集全編卷下之下



宋端明殿學士莆陽蔡襄君謨父著
明南京國子生同里後學宋珏編輯
南京太常寺博士龍溪顏繼祖較訂

五言排律

羣玉殿賜宴

并序

臣蒙恩宣召再至龍圖閣觀書羣玉殿曲宴伏
以數千年間無此盛事臣忝職翰墨榮遇非常
謹賦拙詩一首備載本末上千聖覽無任戰越

之至

治道承炎曆皇基亘萬年深仁涵海嶽至德著坤

乾文物歸元首臣鄰悉巨賢蓼蕭思及下奕葉力

追先昕色方羣進臚音忽四傳衣冠紛雜選臺殿

鬱螭娟嘉祐七年十二月二十三日詔宰臣以下龍圖天章閣觀三聖御書寶字藏

三聖瑤圖秘九天榮河祥氣徹昭漢曉光旋磊砢

珠璣在崢嶸歲月遷家聲終卓越上意益恭虔書

觀開鋪首又幸寶文閣作飛白字召臣寮觀人賜一軸兼賜紙筆墨各有差宸毫

落彩牋煙雲初不定鸞鳳互相鮮拜賜兼金重珍

藏尺璧全人人皆自得事事獨超前睿藻敦風教

賜御詩一首令羣臣次韻和進冥搜出化權來從玉山府遠過栢

梁篇廻馭臨高館賜宴羣玉殿推恩錫廣筵迷魂遊帝

所休應動星躔申命嚴樽俎二十七日幸寶文閣召宰臣以下觀太宗

游藝集瑞物十三種仍賜御書宴羣玉殿宣論太平無事令羣臣盡醉新章被管絃

千齡叨際會瞻古絕黃綠大施難論報精神第祝

延惟應歌盛美藥石可磨鐫

附錄龍圖閣觀三聖御書

歐陽修

至治臻無事豐年樂有成圖書開秘府宴飲集

羣英論道皇墳奧貽謀寶訓明九重多暇豫八
體極研精筆力千鈞勁毫端萬象生飛牋金灑
落拜賜玉鏘鳴盛際崇儒學愚臣濫寵榮惟能
同舞獸聞樂識和聲

序賓亭

師律先憂寄朝家此得人門庭環劍佩胸膽貫星
辰今已閑戎略疇能卜宴申樓高休暇日臺迥厭
登春珍館瑤甍舉璇題寶篆新鴨欄迴鬪頸龍壁
活盤鱗夾幕寒波顛前峰古黛皴始知仙有路盡

恐世無塵武馭來金虎儒簪下石麟機分榮辱主
解序去留賓揖讓盈三魄雌雄競一神氣橫飛客
箭歌協大夫蘋萬古浮雲片勞生斷梗身卽時懽
未已往事夢非真席久疑枯海琴么似隔隣釭花
明雨暮甕耐壓霜晨鷓動殘絲柳鱸肥滑線蓴晴
霞上丹葉熟粉護青筠賦景呵吟筆揮談密醉茵
流年祗容易嘉會可因循

陪尹子漸申安禮宿香山寺

二月已強半尋春登石樓山光侵雨變草色到雲

休歸鳥沉巖際行人過樹頭剝苔看石碣因火認
漁舟漸夜灘聲怒憑虛屋勢浮乘閒聊自適觴詠
屬吾流

遊龍門香山寺

彩閣縈林轉蒼崖隔水開龕明千像日波起一灘
雷綠淺春前草香餘臘後梅背人驚鷺去將雨好
風來雲氣隨衣袂嵐光入酒杯清遊知不屢欲下
更徘徊

登府店福昌山閣

危磴通高閣登臨境迥清雲開千岫出雪霽一川
明斷鴈來孤影遙泉落細聲野烟依竹見溪樹與
橋平已助騷人思空搖遠客情扁舟如可泛歷歷
是江程

登三鄉寺閣

歷覽宜陽道披軒臨朔風地疑塵世外在畫圖
中巖曲疎鍾苔村前小約通水煙寒更白山氣曉
微紅遊宦真浮梗流年似轉蓬長懷無所寄盡目
送歸鴻

題福州釋迦院幽幽亭 并序

東陽沈子山前此十年爲侯官縣政閒頗自娛
於登臨之適得院之東北隅地方數丈誅草茅
而列樹石時遊哦於其所因命曰峻青臺今復
爲郡太守其僧曰吾使君倘一來執事者可暴
露乎並臺作亭以除風雨子山至其下又名之
曰幽幽亭邀予題榜以揭之遂作詩以賦山川
之美而序以紀其始焉

路盡得佳賞川原何淨明周圍地象壯灑落世塵
清背郭千峰起涵空一水橫風帆人共遠潮嶼歲
重耕曉市炊烟合孤庵汲道縈俯窺巖鳥過微認
野雲生香氣林端出秋容物外呈表閒幡弄影覺
靜磬傳聲官舍今稀訟轡車此駐行唱篇知寡和
君世負詩名

題何僊人大隱閣

萬井連交道中天敞靜軒由來隱鄜市全勝賁丘
園目極無留賞心閒不避喧沼光搖屋動花艷出
欄繁雨霽山容靜潮生海氣昏幽人披彩檻永日

對芳樽素業名家久通醫與義存丹圖環八卦仙
訣遁三元造化今爲友懼憂本聚門應須超世累
宴坐此忘言

寄題處州朱山人幽居

之子適所遇愛此山林居禪心庭下樹仙訣枕中
書溪明暑醉後洞暗春遊初逢痾藥籛補得意琴
聲徐人生隨樂住世事與閒疎勿用掛雲網孤鴻
翔太虛

崇德夜泊寄福建提刑章屯田思錢塘春月

並遊

夙昔神都別于今浙水遭故情彌切到佳月事追
邀太守才賢重清明土俗豪犀珠來戍削鉦鼓去
啾嘈湖樹涵天濶舩旗罨日高醉中春渺渺愁外
夕陶陶新曲尋聲倚名花逐種褒吟亭披越岫夢
枕攬胥濤論議刀矛快心懷鐵石牢淹留趨海角
分散念霜毛鱸膾紅隨箸予之瀧波綠滿篙君往
試思南北路燈暗雨蕭騷

哭石曼卿

仕宦晚益困忽驚朝露晞嗟嗟命不偶事事志多
違直節未嘗屈英魂何所依有材真國器無悶卽
天機前日猶言笑今亡果是非城南春滿路空見
素旌歸

四月十七日奉安仁宗皇帝御容於景靈孝
嚴殿是日舟次陳畱感懷述事十六韻

先帝傳基固真人嗣統平餘恩華夏在高誼古今
傾漢法原爲廟仙居別有京海中金闕見天上玉
樓成睿意懷不烈宸豪薦大名孝惟將舜擬嚴亦

與周并龍向朝雲起奎和晝日呈流光俄洊歲發
號慶重明令節千秋過端儀萬衆迎謹呼山嶽動
驅拂鬼神驚縹緲來佳氣雍容下太清旛旌多異
制歌吹自新聲琳館初停御鑿輿始此行盥孚通
至感福澤被羣生往事時兼遠孤臣淚獨橫晨興
西嚮久悽斷老年情

十九日奉慈親再往吉祥院看花

天意應偏與春工已盡歸來如從月下去似逐雲
飛艷絕聲名遠清多香氣微輕陰資潤澤斜照動

光輝劇飲千鍾酒相鮮五綵衣曾非重芳物庶以
奉慈闈

中秋夕獨坐望月

萬里淒凝魄幽深在處通清流河漢盡寒入水雲
空踰久方全白彌高適正中開書還自卷把酒復
誰同泫葉溥宵露吹衣變暑風更看庭樹影漸過
粉墻東

提刑司封以鄰霄臺佳什垂示輒成拙篇以
荅厚貺

峭拔幾千仞孤高無四鄰低回傾北斗突兀起東

閩締結青雲上登臨滄海濱溪山來面勢歌吹徹

穹旻子夜先看日陰崖得後春三韓空瑣碎

福人云高

峰晴海見新羅洲島萬落自埃塵使者風流在詩人格調新
驪珠忽投我神筆動驚人平昔持州契於今識路
津去天知不遠咫尺仰威神

自漁梁驛至衢州大雪有懷

大雪迷空野征人尚遠行乾坤初一色晝夜忽通
明有物皆遷白無塵頓覺清只看流水在却喜亂

山平逐絮飄飄起投花點點輕玉樓天上出銀闕
海中生舞極搖溶態聞餘浙瀝聲客鑪何暇煖官
酤未能醒薄吹消春凍新陽破曉晴更登分界嶺
南望不勝情

七言排律

城南春會

陰雲薄薄地無塵清曉城南集畫輪睢苑卽時裁
雪霰潁川連夜聚星辰山眉帖漢晴光擬鶯舌尋
風碎語真芳草有情迷謝客落花無處問秦人樽

前莫厭歌醒耳世上偏饒淚滿巾嘉意未闌繁盛
減東皇底事惜殘春

送張太傅還鄉

置器功成佚退身故園南望整車茵青冥直上無
餘事白首歸來有幾人門外離筵晴日曉江邊行
路雜花春橐金均散心如水冢樹重攀淚滿巾盃
酒相逢耆舊少山川不改歲華新從公几杖何由
去更祝天年比大椿

送錢端明還京

禁墀初別紫霄端故國生光里俗懽二世家聲聯
將相百年廟貌儼衣冠躬臨州戟迎門下
每至州解客次
下人喜曾孫夾道觀石照老苔封舊迹錦溪喬木
涕清瀾東趨越嶺興懷遠夕聽胥濤入夢寒江上
馳心思魏闕日邊歸路指長安香深離渚花重疊
涼滿行舟酒半闌應念非才持虎契平時相繼侍
金鑿

五言絕句

偶作

作墨本誰氏研磨有強弱磨盡不見墨此處元非
著

晚色

晚色在何處樓高天宇低閒雲無去住歸燕自東
西

福州寧越門外石橋看西山晚照

寧越門前路歸鞍駐石梁西山氣色好晚日正相
當

別顏慥下第

四上不登第漂流二十年依依去國恨杯酒春風
前

孫武篇

入宮無所解因笑得君憐豈知孫武子自欲逞威
權

西施篇

越國無雙艷吳宮未始知誰言勾踐黠不自愛西
施

秋日登郡樓二首

秋色已復漕秋風初怒號天容霜後淨山勢北來
高

落葉隨飛鳥疎砧砑暮蟬悠悠戍樓角悽切萬家
傳

七言絕句

夢中作

年十八時入京就進士
舉過舒州相城夢中作

白玉樓臺第一天琪花風靜彩鸞眠誰人得似秦
王女吹徹雲簫上紫煙

別宋判官

縷縷青陰拂去鞍
雨花狼藉顛春寒
年光別緒侵人鬢
莫向離亭子細看

望春詞

霏霏細雨勒梅黃
一望春容十斷腸
平蕪古柳青
青遍獨使潘郎兩鬢霜

落花

何事蒼苔數點紅
曉來花片落春風
可憐春色兼
花盡今古幽情無處窮

淨衆院嘗荔枝

霞樹珠林暑後新
直疑天意別畱春
京華百卉爭
鮮貴誰識芳根著海濱

正月四日

今朝纔見雪泥乾
日薄雲低又作寒
家山千里何
時到溪上梅花正好看

春晚

瞳瞳初日注窻明
窻外鷓鴣乳燕聲
東風氣味濃
於酒曉夢魔人似宿醒

福昌院

山前溪上最宜春千樹夭桃一雨新爭得扁舟隨
水去亂花深處問秦人

雪中不見女兒山

宜陽南路是仙山雪擁雲埋杳靄間洗眼來看無
處覓不知可復在塵寰

訪陳處士

橋畔修篁下碧溪君家元在此橋西來時不似人
間世日暖花香山鳥啼

題建造寺奉先院

日照溪山生翠光春深花草雜幽香登臨誰會
遲留意門外塵埃去路長

宿揚州

瓜洲堰埭阻行橈更等江頭後信潮獨背殘燈數
歸路風傳寒柝夜迢迢

聞鴈

霜風吹鴈入南雲千里征人枕上聞欲問梁園近
消息月沉星轉五更分

題金山寺

畫梁詩板暗流塵水石魚龍萬句新誰識高僧最深意慈航長護過江人

經林逋舊居二首

修竹無多宅一區先生曾此隱西湖詩言不喜書封禪亦有遺書補世無

逋詩云茂陵異日求遺草猶喜曾無封禪書

山色凝嵐水色清山雲長與水雲平先生來舉持竿手釣得人間亢俗名

離錢塘

迎潮小舸滿旗風迴首津亭暮靄中惆悵今宵歸

去夢迢迢直至海門東

至睦州

一帶滄波兩面山扁舟中去幾時還浮生多半在離別此意明知未肯閒

呈沈子山二首

遞字子山時知福州

荷葉新詞天下工玉人垂手倚秋風一聲清唱穿雲去斜日烘簾曲未終

六月閩溪荔子丹新秋猶喜薦雕盤自嗟千里歸程遠不得繁枝雨後看

題漁溪驛

昔年同向臘中迴，曾遶欄干折早梅。
今日獨來攀舊樹，風翻黃葉下蒼苔。

春潮

納納春潮草際生，商船鳴鴈趁潮行。
封書欲寄天涯意，海水風濤不計程。

十一月後庭梅花盛開二首

迎臘梅花無數開，旋看飛片點青苔。
幽香粉艷誰人見，時有山禽入樹來。

日暖香繁已盛開，開時曾遶百千迴。
春風豈是多情思，相伴花前去又來。

正月十八日甘棠院三首

上元纔過去，尋春紅白山花粲粲新。
似喜使君初病起，隔欄相向笑迎人。

天氣和柔酒更醇，緩歌花底正初春。
狂花有意憐狂客，撩亂飛紅滿一身。

無奈閒情著物歡，更愁花草便闌珊。
天紅嫩翠宜燈燭，放散笙歌靜裏看。

夢遊洛中十首 并序

九月朔予病在告晝夢遊洛中見嵩陽居士畱
詩屋壁及寤猶記兩句因成一篇思念中來續
爲十首寄呈太平楊叔武

天際烏雲含雨重樓前紅日照山明

夢中兩句

嵩陽居

士今安否青眼看人萬里情

司門員外郎王益恭年四十餘致政居洛

中自號嵩陽居士

修竹蕭蕭曲檻前清泉灑灑小池邊琴中一弄履

霜操人靜當庭月正圓

予爲畱守推官新作綠竹堂王勝之劉伯壽多會宿

彈琴于此

過雨池塘涼氣早落花門戶亂紅多松亭石上題

名處誰剝莠苔看

王相宅號史館園嘗與府僚遊宴題名石上

廟下春行香霧合觀中朝茹藥芽尖故人別後無

消息荒草生墳白露霑

嘗與尹子漸遊嶽廟寺觀今子漸亡矣

霜後丹楓照曲堤酒闌明月下前溪石樓夜半雲

中笑驚起沙禽過水西

從尹師魯宿香山石樓

韓王宅裏酒千榼范帥園中花萬株行樂主人今

已矣春風還是舊時無

趙韓王宅有藏酒百千器范太尉宅花最多

名花百種結春芳天與穠華更與香每憶月陂隄

下路便開圖畫覓姚黃

月陂張家牡丹百有餘種姚家黃爲第一

草白霜晴鵲眼開原頭遊騎四邊來枯叢鷓鴣休

驚噪日暮分持走兔廻

曾權洛陽縣屢陪諸君出獵

履道園池竹萬竿竹間池際笋斑斕當時酒所誇

文戰今日誰登上將壇

普明寺乃自樂天履道第水竹最佳數爲文字飲

白馬寺前冠蓋盛送行賓友盡英豪耿丞血染邊

場草畱得聲名日月高

罷官時交遊送餞白馬寺耿大監丞今死西事

方山渡口占

江上行人空自愁壯年雙鬢已驚秋不知風裏千重浪何事無情也白頭

江村

黯淡江村春日斜汀洲芳草野田花孤舟橫笛向何處竹外炊煙一兩家

宿海邊寺

潮頭欲上風先至海面初明日近來怪得寺南多語笑蛋船爭送早魚廻

建溪桃花

何物山桃不自羞，欲乘風力占溪流。仙源明有重來路，莫下橫枝礙客舟。

王臺驛見晚李花有感

玉京仙子愛春芳，弄遍瓊枝嗅盡香。祇有此花知舊意，又隨風色過東墻。

漳州白蓮僧宗要見遺紙扇每扇各書一詩

共十首

山僧遺我白紙扇，入手輕快清風多。物無大小貴適用，何必吳綾與蜀羅。

野老尋山剪白雲，欲將清吹助南薰。不堪便面張京兆，恰稱能書王右軍。

徑尺規圓比雪霜，昔人何事恨秋涼。珍藏篋笥未爲失，更有明年夏日長。

武侯白羽麾三軍，帳前甲馬生風雲。憐君才地亦疎薄，相伴書牀至夜分。

薄似蒲葵質更圓，忽疑明月落罇前。南堂暑氣生煩濁，一座清涼直幾錢。

澆白新牋卷線稜，刮青織竹纏紅藤。可憐子夜書

帷下一片圓光得未曾

堂陰壁罅蚊蚋都指麾
四向先驅除山翁一夜穩
眠睡若或論功誰勝渠

老去將携只要輕况臨炎暑
曉風清兒童愛把承
簷溜未識山家質素情

不掩歌唇向畫堂不須多筆
作花房直應携去林
泉好轉覺林泉興味長

虛堂永晝來風長石枕竹簟
寒生光文園肺渴厭
煩熱更要夫君在榻傍

後舍緋桃

十年樹底折香葩
蔌蔌浮光弄曉霞
只恨無情是
風雨直將紅片入西家

宿黃蘗聽彬長老談禪

一圓靈寂本精真
誰向滄浪更問津
欲說西來無
覓處奈何言語亦生塵

南劍州芋陽舖見臘月桃花

可笑天桃耐雪風
山家墻外見疎紅
爲君持酒一
相向生意雖殊寂寞同

士安飲我數杯至觀音院纔醒聞灘聲泉響
因畱短闕

林外灘聲砌下泉冷冷幽響靜中傳朝衫却染京
塵去爭得夫君醒醉眠

華嚴院西軒見芍藥兩枝追想吉祥賞花慨
然有感寄呈才翁二首

辛卯四月

吉祥亭下萬千枝看盡將開欲落時却是雙紅有
深意故畱春色綴人思

烘簾微照自生光吹面輕風與送香誰把金刀收

絕艷醉紅深淺上釵梁

的的名花對酒樽欄邊沉醉月黃昏今朝關外尋
蘭若忽見孤芳欲斷魂

嘉禾郡偶書

盡道瑤池瓊樹新仙源尋到不逢人陳王也作驚
鴻賦未必當時見洛神

讀宿州天慶觀門扉仙篆有感

玉骨霞衣帝所遊案前香氣與星浮無端醉語落
塵土一過人間四十秋

送張處士二首

垂垂秋雨沒韉泥，經書門前無馬嘶。
靜因題送行什，江南歸思已淒迷。
梁園塵土著人腥，不似淮山照眼明。
愛君心迹曾無繫，一片孤雲去就輕。

銓舍後軒

秋欄疎索水蒨花，坐見花邊日向斜。
莫問幽人超世訣，卽心無累是仙家。

閣下晝眠

急雨初收宮殿明，紅薇花落暑風清。
忽傳午漏驚殘夢，寂寂西軒喜鵲聲。

戲荅王仲儀

零落黃花動節辰，送行杯酒感風塵。
誰知最恨張京兆，畫徧修眉不示人。

銅雀妓

十五燒香總帳前，幾多幽怨入危絃。
誰知千載臺傾後，何處西陵有墓田。

泰靈院書事二首

檻外珍叢砌下泉祥符天子奉靈仙忽逢野老臨
池水自剪殘花趁歲錢

上元天仗欵琳房靈圃遙傳玉殿香要識年年桃
李色不關春力是恩光

讀太平告身

綾紋金彩射星霞潤墨新騰玉署麻不用著心驚
寵辱去來元是現空華

楚州聞晚角有懷

欽天門外警場開

郊宮有
欽天門

畫角千枝疊鼓催今日

淮邊孤壘畔晚風時送數聲來

宿漁梁驛

庭樹疎疎河漢低瓦溝霜白月平西寒鴉不柰單
樓苦落泊驚飛到曉啼

過南劍州芋陽舖見桃花

七年相別復相逢墻外千枝依舊紅只有蒼顏日
憔悴柰緣多感泣春風

見勻親抄書涕悼卷末

得汝抄書心自喜古來清白紹家難誰知向老秋

燈下一見遺蹤不忍看

泉州安靜堂

庭松永晝轉春禽天氣初晴又半陰惆悵此生多
病惱正堪行樂獨傷心

泉州北藏院見初荷華

初花纔過小荷身曉露霑紅點點勻莫爲愁心偏
倚重清江元有未歸人

登清風樓

郭外清溪溪外山溪雲飛上破山顏晴明天氣疏

璃色何處峰頭帶雨還

榴花洞

洞裏花開無定期落紅曾見逐泉飛仙人應向青
山口管却春風不與歸

寄南海李龍圖求素馨含笑花

二草曾觀嶺外圖開時嘗與暑風俱使君已自憐
清福分得新條過海無

昭陵行

宮人上臨候昏鍾簾外香煙燭影紅庭栢飛霜陵

漏永可憐今夜月明中

復葛通議

并序

天聖八年寄居悟空院留詩僧壁今三十五年
人事變遷存沒懷感子發遠惠新編語及曩舊
披攬數過悽惻之極輒復短章少伸懃懇

空梁詩板歲年多惟有秋蟲占作窠聞道故人時
拂拭此生無柰舊情何

有遺梅花枕前者因成

誰寄梅花置枕傍怪來枕上有清香因香夢徹江

南路江水浮天月似霜

至鑠外

旗聲不斷鼓聲催堤柳陰濃野色開今日客衣何
事淨京塵不肯出城來

五月宿江陰軍葛公綽草堂

曾解征衣寄草堂枕邊泉石自生涼休論仙訣能
延壽暫得身閒夢亦長

七月過孤山勤上人院

青林藹藹日暉暉薄晚涼生暑氣微湖上清風如

可載畫船十隻不空歸

韓玉汝山堂會別梅花已盛至蘇州示諭水鄉天寒未開

遙知畫舫艤江隈寒勒梅花未得開惟有山堂紅燭下至今繁艷傍罇罍

梨園小部

并序

梨園法部更置小部音聲三十餘人帝幸驪山楊貴妃生日命小部張樂長生殿因奏新曲未有名會南方進荔枝因名荔枝香

傾宮晨起傅輕粧山殿生風夏日長小部新聲落天上無人知是荔枝香

丙午年正月邀葛公綽宿杭州山堂公綽遺詩有爲是山堂似草堂之句因以荅之

山堂爭似草堂清俗事隨人百種名賴有西窻春茗在甌中時看白雲生

公綽示及生日以九龍泉爲壽因以荅之

多謝山人遠祝延壽杯仍是九龍泉

九龍惠山別名餘生

事事無心緒直向清涼度歲年

度南澗

隱隱飛橋隔野煙石磯西畔問漁船桃花盡日隨
流水洞在清溪何處邊

十二日晚

欲尋軒檻倒清尊江上煙雲向晚昏須倩東風吹
散雨明朝却待入花園

此首洪氏誤收入唐詩

十三日吉祥探花

花未全開月未圓看花候月思依然明知花月無
情物若使多情更可憐

十三日出趙園看花

水際開花千萬窠初鶯時逐麗人歌欲知太守行
春樂只向東城得最多

十六日會飲駱園

名園何事却居鄜永晝游蜂乳燕喧不計陰晴與
風雨卷簾花蘂在尊前

又往鄭園

小小園亭細細風千枝淺白間深紅誰知狹徑無
人到畱得青春向此中

寄錢塘春遊詩呈南陽郭待制

一春遊攬足詩歌寄與南陽遠思多若憶錢塘曾
到處西湖仍是舊煙波

段家堤西望晚山

月下西山千萬重日光山氣鬱葱蘢鮫綃數幅須
移得惆悵如今少畫工

六月八日山堂試茶

湖上畫船風送客江邊紅燭夜還家今朝寂寞山
堂坐獨對炎暉看雪花

李閣使新種洛花二首

堂下朱欄小魏紅一枝濃艷占春風新聞洛下傳
佳種未必開時勝舊叢

園館春遊只帝京可憐衰悴海邊城縱然得酒心
猶在若也逢花眼亦生

秋日

城頭蔓草受新霜天外孤鴻叫夕陽送客懷情楓
樹老著人襟袖菊花香

七月二十四日食荔枝

絳衣仙子過中元別葉空枝去不還應是天人知
憶念再生朱實慰衰顏

醉後

醉後歸來月滿衣重重花影帽簷歌行人路畔休
相笑未似山翁倒接離

朱樓

朱樓燈燭一聲歌臘後天街月色和平昔黃公酒
壚下誰知跬步邈山河

一百五日開千葉間金

西園花蘂過中春微雨初晴不受塵莫怪芳叢開
發早欲將紅艷送行人

乞雨題西方院

并序

嘉祐三年七月某再領泉山是歲春夏不雨祈
禱陽廟明年旱請靈嶽祠又明年五月復來三
次皆晝寢於是頻年不稔豈非郡守不德之致
乎

年年乞雨問山神羞見耕耘隴上人太守自知才
德薄彼蒼何事罪斯民

送馴鹿與東禪長老

二年馴擾傍山家欲領東還道路賒送汝給孤園裏去此生長伴大牛車

畫生李維寫予像今已十年對鑑觀之因題其側

清眸綠髮十年前朴野風神不易傳今日青銅莫相照白髭垂頷面雙顴

將赴京畱題山莊西壁

禁林京尹荷恩光三上螭頭乞郡章貧薄奉親須

仰祿此心安敢繫軒裳

徐虞部以龍尾石硯邀予第品仍授來使持

還書府

玉質純蒼理緻精鋒鏘都盡墨無聲相如間道還

持去肯要秦人十五城

辨歛石以此法若端石則不然

過囊山題宏師室

三十年間登第初青衫羸馬叩禪居鬢毛白盡猶奔走慚愧高人得自如

嘉祐辛丑蒙召還京二月八日道過陸氏之

門因觀小欄花卉

風色微和日晝明小欄花卉新芽生行人不是愛
春物一見芳叢似有情

杭州過璘上人花園

封培剪剝奪天工欄下長年見萬紅投老暗知心
力少自開還落信春風

雪

六年守郡在天涯冬暖無因見雪華今日復看千
里白強憐寒色作詩誇

和龐公謝子魚荔枝

霜鱗分不登枯肆丹實全應勝木奴欲効野芹羞
獻去敢期佳什墜驪珠

和宋次道宴日不赴有懷

殿中佳氣帶春容天上雲謠落晚風獨向下陳露
醉筇羨君清卧寄詩筒

春日

東風吹雨濕鞦韆紅點棠梨爛欲燃擬買芳華贈
年少紫榆春淺未成錢

張唐公以公累出知濠州

湛湛清渠風力微濠梁行客布帆歸到官應過莊
生廟試問鷓鴣孰是非

桃李園

上有繁葩下落英紅波動蕩逐風行夕陽開處猶
光艷何況今宵值月明

三月出城別張唐公會玉仙觀

隴麥青青溝柳新春歸聚落少逢人如何試與持
鞭手拂却來時身上塵

玉仙池

洞府花飛不減春輕雲成片玉成塵香輶縹緲知
何在無限池頭再拜人

凝祥池上晚歸

綠徑陰陰落景微楊花零亂上人衣長烟似愛滄
波面風色雖豪不肯飛

通源驛別顏茂才

躍馬東來不記時酒醒寒色入征衣垂楊官道連
天去落日郵亭別我歸

入天竺山留客

山光物態弄春暉莫爲輕陰便擬歸縱使晴明無
雨過入林深處亦霑衣

此詩誤入萬首唐詩

遊九鯉湖

何嶺巍峩欲插天回頭人與白雲連桃花不點尋
常路從此依稀度九仙

錢塘題壁

綽約新嬌生眼底侵尋舊事上眉尖問君別後愁
多少得似春潮夜夜添

附錄

次壁間韻

無名氏

長垂玉筍殘粧臉背落金釵露指尖萬斛閒愁
何日盡一分真態爲誰添

洛陽詩帖

洛陽風景實堪誇幾處樓臺處處花盡是齊王修
種得如今惆悵似無家

洛陽風景實堪珍到此經今三紀春無限歡娛榮
樂事一時迴施少年人

稼村詩帖

隱居何事可謀生
堯舜難周畝畝情
若得一犁膏雨足
石田茅屋起歌聲
布穀聲中雨滿籬
催畊不獨野人知
荷鋤莫道春耘早
正是披簑叱犢時



蘇東坡詩集
卷下




國家圖書館, NATIONAL CENTRAL LIBRARY, TAIWAN, R.O.C.

再刻蔡端明別紀序



蔡公以文章氣節著於仁英兩朝與
歐陽文忠友善文忠評其文清遒粹
美舉世寶之王龜齡先生謂後之人
雖有善文辭好議論者莫能改是評
也其集凡三十六卷龜齡守泉日刻



於學宮自南渡後屢遭兵燹遂湮沒
不傳只荔枝譜茶錄二卷行於世晉
安徐興公謝在杭好古君子也編搜
遺稿不可得興公姑撫公遺事刻爲
別紀在杭爲水部時意秘府中有之
因潛隨福唐相公入閣翻閱但檢得

其書目而無其書僅抄劉後村集三
十冊以歸則知蔡集不存已五百餘
年矣近盧觀察鉉卿忽得抄本于豫
章喻氏雖錯雜無首尾如千年神劍
一旦出獄卽土花繡澀光芒動世鉉
卿授其本於敝門人宋珏令讐較分

緝將梓之於莆未幾而陳四游刻於
南昌蔡五嶽刻於溫陵皆依喻氏本
任其錯雜不遑叅訂也宋生抱善本
入金陵將依向歲歐陽四門黃侍御
二集故事而搏沙作塔竟不能成遂
請先刻詩集全編及別紀補遺二冊

以公海內同好且以伸五百餘年湮
沒不彰之氣詩集旣分體編輯復附
入諸公和韻之作而別紀搜括諸書
殆無剩義比興公創始不啻倍之是
集出不獨補吾閩之缺典寔以表宇
內之竒觀予甚壯焉而因述其所以

再刻別紀之意如此

清漳蔣孟育道力題



蔡端明別紀序

蘇黃米蔡宋稱四名家者也遺言佳事傳播後世
未可僂指王長公有東坡外紀矣范長康有襄陽
志林矣端明之德行與夫書法之工政事之異名
與三公雁行但恨遺稿散逸不得其傳予生同桑
梓夙負恭敬之念迺蒐厥陳言彙爲別紀自世系
本傳以及荔譜茶錄分門別類爲卷十二公之生
平悉其大都至與六一先生侃侃立朝號慶曆四
諫其風稜凜乎不可犯千載猶有生氣別紀瑣屑

蔡忠惠別紀序
又不足以盡公萬一也近聞亦有作黃豫章志林者余之別紀其可已乎若曰端明蓋臣則吾豈敢萬曆己酉春日後學徐燂與公題

蔡端明別紀序

余曩見弇州先生所輯蘇長公外紀竊歎如黃如米如蔡三家者皆不可闕嗣聞黃米二公亦有志林而忠惠公竟寥寥也暇思采摭遺事以成四家盛美愧考索旣薄復半羈于經生帖括不遑及此亡何余友徐興公輯之名曰蔡端明別紀間以相示余不勝其愉快也夫古之名流高品其德行政事文章雖昭昭史冊而膚學者迺侈談漢晉以前人物遽至于宋一切略之矣故公雖閩人而居人

過客不經楓亭道溫陵者猶未知有路旁之墓橋
左之祠也諸好事家輒稱其荔譜茶錄及數紙遺
墨于世試叩以德行政事文章輒相顧自失誰能
旁蒐獵秘彙成一書俾五百年之遠披閱如見乎
公集古律詩三百七十首奏議六十四首雜文五
百八十四首昔王龜齡刻而序之興公復殫厥力
采掇遺文錄于別載其得與別紀竝傳不朽興公
固端明之功臣也豫章璩君攜拾長公事以足外
紀曰逸編則是書也興公引其始將來必有如璩

君者爲公竟其全矣

萬曆己酉秋日懷安馬欽季聲撰

蔡端明別紀序

宋蔡忠惠先生閩產也而宦於閩最久蓋嘗再知福州一知泉州一爲轉運使所至興利除病政教敷暢而流風餘韻至今村畝婦孺猶能道說之也先生立朝忠孝大節具在史乘乃其軼詩時見於他書丰神軌度爲世隆尚千載之下猶想見其爲人云先生曾譜荔枝吾舅徐興公因之而成通譜私心謂異代有知己也因而蒐剔載籍旁及猥穉撫其行事而論次之取裁於蘇之外紀米之志林

釐爲十則而以荔譜茶錄附焉述而不作文獻犁
然夫士顧所豎立謂何耳苟其懿行芳躅足以流
聲百代卽稗言瑣事皆附之而不朽以先生之風
流文采才名志節便當頡頏眉山而端方俊整似
或過之至於吟賞高標毫楮剩技與夫方外流攬
之踪色香意興之寄不過其尺度之餘而豈襄陽
所敢望哉先生有集向行於世自莆陽兵燹之後
梨棗爲灰余足跡半天下覓之不得也興公是編
出四方同志之士或有讀而會心因而出壁間之

藏發帳中之祕者不佞將拜而受之

萬曆庚戌秋日晉安謝肇淛撰

蔡端明別紀序

聞細人之行若閱枯魚見一鯢輒欲吐棄聞君子
之行若覩珍竒於武庫惟恐其將盡余讀黃憲列
傳每恨范曄搜羅不廣不能盡叔度之爲人劉向
少慕東方朔數問長老賢人通於事及朔時者朔
固通儒足喜向亦好善若渴博聞君子哉蔡君謨
朗節瓌才爲宋名臣而旁游於菀顯名今昔揮塵
操觚之士多稱之獨以貢茶爲儒者不滿然君謨
固癖於茶者至老病不能飲則烹而玩之野芹曝

背之敬遂不覺與丁謂異情同行蓋亦觀過知仁
矣管宄者徒以名字賞譽風聽者又以他人怪誕
事附之余友徐興公蘊藉二酉無所不覽嘗彙君
謨三百七十餘事其目有十興公博踰王儉余卽
有意爲陸澄無以復加也第謂君謨詩文三十六
卷今存者獨數十篇與貢茶錄荔枝譜耳於是乃
終以譜錄而詩文則別爲集焉荔枝閩產也興公
嘗續譜之視君謨尤詳君謨有茶癖而與公有書
癖薄飲食節衣服盡以其贏購書書克棟宇過於
生產日夕手一編煮武夷北苑名茶且飲且讀何
減君謨風致是編也真如子政之博訪滑稽生不
類蔚宗之傳牛醫兒者矣

萬曆庚戌冬日侯官陳鳴鶴書于柯山之泡菴

蔡忠惠別紀補遺目錄

卷上之上

志行

凡九則

政術

凡二十五則

卷上之下

書法

凡一百三十七則

卷下之上

談菴

凡四十五則

鑒賞

凡二十五則

茶事

凡三十二則

卷下之下

荔品

凡一十六則

恩遇

凡九則

遺蹟

凡二十八則

述異

凡一十五則

逸編

凡三十一則

徐興公之刻別紀蓋惜蔡集之不傳而寓存
求野意耳今集既出矣別紀附焉則集之所有
不當重複集之未補不當遺失且諸賡和之什
業已附錄復當刪汰諸散佚之作既得續收復
當增入今去本傳而載逸編且以荔品茶事分
爲二卷以見公克勤小物之意也余藏此集十
餘年叅訪稽訂不遺餘力比乃遇同心同好之
顏奉常相與反覆商榷經營授梓可謂難矣雖
未能盡刻文集卽此二種已備全觀後之敬桑

梓而仰高山者能無流濕就燥之思哉
天啟壬戌仲冬大雪日宋珏謹記

蔡忠惠別紀補遺卷上之上

明晉安徐

煥興公初編

莆陽宋

珏比玉增補

龍溪顏繼祖繩其攷定

志行

蔡端明襄與屯田員外郎劉昇約婚厥後端明登禁從而屯田既沒家益落劉世爲福州侯官人端明出知福州就尋前約其家力以非偶爲辭端明曰古人挂劍尚有心許吾與劉君氣義相求兩家

之好雖在髻鬪媒娉未行然一言豈可食耶今其所不足者不過謂奩具耳凡女家資遣乃悉自爲治辦遂使其子旬受室以歸

端明遺事

宋人論歐公長于文學蔡公長于政事蓋其天性然也然襄豈徒所在而治爲世吏表哉矯矯登朝俱直引是非當仁宗時不書温成后父碑封駁除授非人其執如此竟不究其用而累葉載德世稱名族彼蔡京非公鴈行輩耶久據相位未幾覆敗澌盡子孫且耻稱之矣君子褫身可不慎歟

興化志

蔡端明襄作四賢一不肖詩作三諫官詩才名表表亦因以預增置四諫之一權幸畏歛裨益爲多唐介論文潞公罷公獨論其忠呂景初等論梁丞相罷公不草其制其升也或推之其墜也或援之公又諫官之都護歟一不勝于陳執中執中旣相公遂歛惠福州興經術禁浮圖巫妖蠱毒之患爲絕其後治開封治三司皆號精明惟知泉州罪章拱之卒爲士論所少豈朝端風采施之外服或過耶然公能文章尤工于書不肯爲仁宗寫温成碑

此其介然于中者何如也

宋名臣言行錄

景祐中范文正公黜知饒州余靖尹洙以論救各坐貶歐陽修貽書責高若訥不能辨其非宰若訥大怒繳其書修降夷陵令蔡襄因作四賢一不肖詩傳播中外永叔復與師魯書曰五六十年來此輩沈默畏怖在世間忽見吾輩作此事下至竈間老婢亦爲驚怪

浪齋便錄

帝初召夏竦爲諫官歐陽修蔡襄等交章論竦不忠王拱辰亦言竦經略無功帝未省遽起拱辰前

引裾畢其說帝乃悟襄有退邪進賢良醫之喻

綱目

朱晦翁跋蔡端明獻壽儀云蔡忠惠公書蹟徧天下而此帖獨未布今歲南來始得見于其來孫誼之家乃知昔之君子所以事其親者如此其愛且敬也孤露餘生無所爲孝捧玩摧咽不能仰視遂請其真本摹而刻之以視世之爲人子者庶以廣蔡公永錫爾類之志非獨以其字畫之精而已然又偶得善工且屬諸生黃榦臨視知書者亦以爲不失用筆之微意云紹熙庚戌臘月旣望丹陽朱

熹書于漳浦郡齋

朱子大全

蔡君謨弟君山爲開封府太康主簿時予與君謨皆爲館閣校勘君山數往來其兄家明年君謨南歸拜其親夏京師大疫君山以疾卒于縣享年二十八今年君謨又歸迎其親自太康取其柩以歸且謂予曰吾兄弟始去其親而來京師欲以仕宦爲親榮今幸還家吾弟獨以柩歸甚矣老者之愛其子也何以塞吾親之悲子能爲我銘君山乎乃爲之銘

歐陽文集

陳烈先生幼嘗與蔡君謨同研席後君謨鎮福唐勵精爲郡嚴肅吏治毫髮不容合境大化一日先生往見焉維舟庭下聞公之嚴察不往謁留詩曰溪山龍虎盤溪水鼓角喧中宵鄉夢破六月夜衾寒風雨生殘樹蛟螭喜怒瀾殷勤祝舟子移棹過前灘庭吏錄詩以呈公公見遽命以記謝過曰先生旣以詩誨之不若耳提面教之也先生竟去公爲之霽威

興化府志

歐陽公與謝景山書云與君謨往還書不如此何

以發明然何必懼人之多見也若欲銜長而耻短則是有爭心於其中有爭心則意不在於謀道也荀卿曰有爭氣者不可與辯此之謂也然君謨旣規景山之短不當以示人彼以示人景山不當責之而欲自蔽也願試思之

歐陽文忠集

政術

慶曆中余靖歐陽修蔡襄王素爲諫官時謂四諫四人者力引石介而執政亦欲從之時范仲淹爲叅知政事獨謂同列曰石介剛正天下所聞然性

亦好爲竒異若使爲諫官必以難行之事責人君以必行少拂其意則引裾折檻叩頭流血無所不爲矣主上雖富有春秋然無失德朝廷政事亦自修舉安用如此諫官也諸公服其言而罷

東軒筆錄

杜正獻公爲相蔡君謨孫之翰爲諫官屢乞出仁宗云卿等審欲得郡當具所欲乞奏來於是蔡除福州之翰安州正獻云諫官無故出終非美事乞且仍舊上可之退書聖語時陳恭公爲執政不肯書曰吾初不聞正獻懼遂焚之由此遂罷相議者

謂正獻當俟明日審奏不當遽焚其書也正獻言
始在西府時上每訪以中書及爲相中書事不以
訪公因言君臣之間能全始終者蓋難也

浪齋便錄

始蔡襄爲諫官宰臣晏殊罷政因薦富弼代殊仁
宗怒以爲進用宰相臣下不宜有所指陳遂相陳
執中旣極言不聽則相與求罷爲外官時杜衍奏
諫官無故出終非美事乞且仍舊上可之不得請
遂自陳上曰卿等言一不聽則求去令朕有逐言
者名自爲計則善也襄亦以養親爲言先是襄嘗

乞告至莆田迎親而親不果來至是上乃曰卿昨
迎親不來何不遂留侍養襄皇恐不能對孫甫徐
進曰襄所以辭親遠來事陛下者冀萬一有裨補

今言旣不行襄是以須却思歸

南豐雜志

辨蔡襄異議三司使給事中蔡襄除端明殿學士
尚書禮部侍郎知杭州初上自濮邸立爲皇子中
外欣然無間言旣卽位以服藥故慈壽垂簾聽政
嘗爲中書言仁宗旣立皇子因追思鄂王等悲傷
涕泣宦官宮妾爭相熒惑而近臣亦有異議者可

怪者一二知名人也因言執政數人不顧家族以定社稷之計而小人幾壞大事又云近臣文字只在先帝臥床頭近日已于燒錢鑪內焚之矣然莫知爲誰也中書不敢問其姓名但唯唯而退已而外人亦稍稍言蔡襄嘗有議論而莫知虛實旣而上疾愈親政數問襄如何人一日因其請朝假上變色謂中書曰三司掌天下錢穀事務繁多而襄十日之中在假者四五何不別用人韓公已下共奏曰三司事無缺失罷之無名今更求一人材識

名望過襄者亦未有修奏曰襄母年八十餘多病况只是請朝假不趑起居耳日高後便却入省亦不廢事然每奏事語及三司未嘗不變色襄亦不自安見上必厲色詰責其職事其後諒祚攻劫涇原西邊日有事宜上遂督中書以邊事將興軍須未備三司當早選人韓公等初尚揮上意不回因奏待其陳乞可以除移初傳者多端或云上在慶寧已聞蔡異議或云上入宮後親見奏牘尚在至是因蔡陳乞罷劄子韓公遂質于上上曰內中不

見文字然在慶寧卽已聞之韓公曰事出曖昧若虛實未明乞更審察苟令襄以飛語獲罪則今後小人可以構害善人人難立矣曾公曰京師從來善造謗議一人造虛而衆人傳之便以爲實前世以疑似之言陷害忠良者非惟臣下被禍兼與國家爲患修曰陛下以爲此事果有果無上曰雖不見其文字亦不能保其必無修曰疑似之謗不惟無迹可尋就令迹狀分明猶須更辨真僞只如先朝夏竦欲害富弼撰廢立詔草賴仁宗聖明弼得

保全又如臣至和末丁母憂服闋初至闕下小人中有嫉忌臣者僞撰臣乞沙汰內官奏稿傳布中外家家有之內臣無不切齒只判銓得六日爲內臣楊永德以差船事罷知同州亦賴仁宗保全未久知其無罪遽却畱住至今以此而言就令有文字猶須臾辨真僞况此無迹狀陛下幸不致疑韓曾又各進說上曰數家各有骨肉

意謂異議若行則執政被禍

又曰造謗者因甚不及他人據此似聖意未解也

歐陽文集

襄爲閩漕日禁絕蓄蠱甚嚴凡破數百家自後稍
息八年仁宗閱福建奏獄多以蠱毒殺人者福建
醫工林士元能以藥下遂詔錄其方又令太醫集
方法之善治蠱毒者爲一編命叅知政事杜履爲
序頒之嘉祐六年郡守范師道乃牒諸縣各以其
方雕板揭于縣門今碑猶存云應中蠱毒不拘年
代遠近先煮鷄子一枚將銀釵一隻及熟鷄子內
口含之待一飯久取出釵及鷄子俱黑色是中毒
也可用一方五焙子三兩木香丁香各一十文其

草三寸一半炮出火毒一半生用糯米二十粒輕
粉三分硫黃末一錢重麝香一十文右八味入小
砂瓶內用水十分同煎七分通口服須平旦仰臥
令頭高其藥須三度上來鬪心卽不得動如吐出
則用桶盛之若魚脬類乃是惡物吐後用茶一盞
以止如瀉亦不妨瀉後用白粥補忌生冷油膩鮓
醬十日後服後藥解毒丸三二丸補之更服和氣
湯散十餘日平復解毒丸者如人中毒十日以前
則此藥可療五焙子半斤甌中蒸炮令熟丁香三

兩焙黃焦色預知子半斤一半蒸令熟一半焙令
黃色木香三兩一半炮令黃色一半焙過麝香三
文甘草二兩一半炮黃色一半生用水銀粉一盂
子朱砂一兩細研爲末右八件搗罷爲細末用陳
米爛飯爲丸如彈子大用藥時研令細同酒一盞
溫服紹興二年秋連江古田民有查佐等蓄蠱殺
人其家來訴張守爲帥依條斷遣仍榜十二縣委
保正副結五家爲保互相覺察知而不糾其罪與
均仍頒勅令賞格散榜要處

八閩通志

慶曆六年十二月公知福州事作太平聖惠方後
序親書于碑時在府宅堂之右希彭家太平公輔
坊有寶墨軒藏蔡公真蹟

三山舊志

慶曆以前福建廂軍差在廣南諸州屯駐及軍回
人數比之去時大半死損公知福州乞廂軍屯駐
廣南係宣差者只于比近軍州節次那移對替年
歲計之存救人命不可勝數其後本軍只差廂軍
於福州屯駐合泉州邵武軍共一百五十人今罷
又熙寧八年以福建廂軍駐泊邕州一千候邕州

招填澄海土兵替換五百人令轉運就整差撥替
換今後福建承例差赴廣西屯戍更不差撥曾師建記
及長編

蔡密學知福州日令諸邑道傍皆植松自大義渡
夾道達于泉漳人稱頌之云夾道松夾道松問誰
栽之我蔡公行人六月不知暑千古萬古搖清風
三山志

嘉祐元年蔡襄知福州奏本路建劍汀邵地連兩
湖江南乘舟下水至州城不過二三日東南邊海

溫莆泉漳諸郡船皆可至城墻高止數尺盜賊可
窺合行修築須至科點丁夫酌約物件收拾備足
一兩月間便要了當若候兵士功役空延歲月乞
降指揮檢計如重惜民力亦係朝旨詔許之三山志
慶曆六年六月福州火旱蔡公齋戒自爲文禱于
善溪廟禱文讀徹大雨乃命知縣賈太冲新其廟
文學范宗暉作記三山志

蔡公守泉郡甃石爲橋在府城東三十八都名萬
安橋亦名洛陽宋蔡若水詩云石架長橋跨海成

蔡忠惠別錄
論功直得萬安石

八閩通志

蔡君謨知開封府事日不下數千每有日限事棟
三兩件記之至其日問人不測如神

晁氏客語

泉州惠安縣昭惠廟在萬安橋北蔡忠惠作橋時
卽建是廟以奉茲橋香火或云其神乃白衣叟永
春樂山絕頂卽其所居今廟尚存

惠安志

蔡襄字君謨僊遊人天聖中進士治平二年知杭
州累官知諫院正色讜言精于吏事下不能欺所
至有聲能文章尤工于書爲當時第一官至端明

殿學士卒謚忠惠

湘江通志

泉州萬安渡水濶五里上流接大溪外卽海也每
風潮交作數日不可渡劉鋹據嶺表畱從効等據
漳泉恃此以負固蔡襄守泉州因故基修石橋兩
岸依山中託巨石橋岸造屋數百楹爲民居以其
僦直入公帑三歲度一僧掌橋事春夏大潮水及
欄際往來者不絕如行水上十八年橋乃成卽多
取蠣房散置石基益膠固焉元豐初王祖道知州
奏立法輒取蠣房者徒二年

泊宅篇 按公記皇祐五年至嘉祐四年

計八年而庚寅辛未乃月建也此云十八年未攷其實

閩中橋梁甲天下蓋閩水怒而善崩故以數十重木壓之中多設神像香火甚嚴然無如泉州萬安橋蔡端明名與此橋不朽矣

閩部疏

潤州城西有嶺入江號曰北顧梁武帝升之乃曰此嶺不足顧須固守京口實乃壯觀遂改曰北固蔡君謨起樓其上因書曰北固樓

米襄陽志林

蔡襄字君謨興化僊游人仁宗時以龍圖閣直學士知開封府精于吏事談笑剖決破奸發隱吏不

能欺

中州志

余少聞洛陽橋以爲閩地何以是名後讀程泰之小說有曰泉州北二十里有溪溪通海每潮來人輒病涉蔡端明君謨守泉時伐石跨溪而橋知潮力豪大徒柱不能勝遂出新意累石以爲壯趾其制中濶首銳銳故不與潮鬪濶故能勝鋪架也橋成蔡公自書橋旁石曰萬安渡橋而又別爲一記以載首末今猶巋然矣然蔡公自命爲萬安而土人以及他方皆以洛陽冠名爲是橋實在閩而名

蔡忠惠別錄 卷之七
以洛陽見者多不解或曰洛客有經此橋者樂其
山水寬敞有似洛陽故以名此恐不然也閩故多
山然至興化以及泉南則平夷之地甚多此地雖
濶不能廣于他處何以獨擅洛陽之名耶予按元
和郡縣志洛陽天津橋本維舟爲梁後以洛漲壞
船正觀十四年始令石工累石爲脚則是不止用
獨石爲柱而累衆石以爲之趾趾濶而力厚卽萬
安橋之所取則也然則橋名洛陽其必以此也哉
天都載

蔡襄在昭陵朝與歐公齊名一時英宗卽位韓魏
公富公首薦二公同登政府先是君謨守泉南日
晉江令章拱之在任不法君謨按以賊罪坐廢終
身拱之望之表氏同胞也至是旣訟寃于朝又撰
造君謨乞不立厚陵爲皇子疏刊板印售于粗籃
中人得之遂干乙覽英宗大怒君謨幾陷不測魏
公力爲營救事見司馬公齊記及歐公奏事錄甚
詳君謨終不自安乞補外出官杭州已而憂去故
魏公與君謨帖云尚抑柄用此當輔者之愧也親

筆今藏呂子和平叔處

宋王明清玉照新志

杭州每年八月十八日潮生郡人聚觀善泅者泝
濤出沒謂之弄潮宋治平中郡守蔡襄作戒弄潮

文

杭州府志

歐陽公自右正言知制誥知諫院除龍圖閣直學
士爲河北諸州水陸計度都轉運使兼西路營田
都大制置屯田本路勸農使替張昷之時方歸自
河東諫官蔡襄孫甫請留公不許上面諭公勿爲
久居計有事第言之公曰諫官乃得風聞今在外

使事有指越職罪也上曰事苟宜聞不可以中外

爲辭

王伯芻跋歐陽奏草

宋嘉祐二年蔡襄知福州命三縣疏通渠浦百七
十六計二萬一千九百七十四丈均用民力凡八
萬九千溉田三千六百餘頃侯官河浦六十九延
袤一百二十五里田主以四分佃戶以六分開洵
借盤水利者亦四分助之仍令民以時修治不用
命者有罰

三山志

公又作山頭齋會戒曰使州體問自來風俗被喪

之家言有靡用破賣產業置辦酒食齋筵名爲孝行至有亡歿之人舉家不敢哭臨先將田屋出帳典賣得人就頭商量打了定錢方敢舉殮外徇人情中抑哀毀是不孝之人也出殯之夕隣里識與不識盡來弔問恣食酒肉包携歸家至使喪家費用無極其于人情隣里當有贈遺以資喪家慰吊之際豈可恣食酒肉以爲宴樂是無禮之人也山頭齋筵僧俗之中本非知識齋食不足每人散錢二百文如有少闕便卽忿怒送塋之禮雖出于古

豈有本無哀情只趁齋食喪家竭力不給此與乞丐何異是無耻之人也若不斷絕民間轉見不易禮義之日遠右仰喪塋之家喪夜賓客不得置酒譙樂山頭不得廣置齋筵聚會并分散錢物以克齋價如有輒敢罪在家長并城外僧院不得與人辦置山頭齋及坊處候者長常切覺察

三山舊志

公又作教民十六事一應有無徒輩欺誑是知州親知於州縣打索關節乞取財物許人告二市買買物虧減價例及不盡時還錢仰行人陳告三行

人于諸官廳幹當厨庫公人及市買等處每月若有行用錢物罪在行人四巡欄告稅不得擅入人家搜檢稅物須申州取候旨揮五市行見行銅錢如有夾雜砂蠟新錢許人告六銀行輒造吹銀出賣許人告捉七人戶居停賭錢本非科斷外必定折屋納官八僧人不得止宿俗家婦人不得聽講及非時入僧院九諸官除依條本廳并轉轄處科決外不得擅行決罰十巡檢使臣非承使州指揮不得帶甲領兵搜圍人家檢索違禁服包若窩藏

強劫并殺人賊明有踪跡許收捉十一諸縣擅行科取修造及諸色鄉人歛掠人戶錢物入已許人陳理十二在州坊虞候所由并外縣公人所受情弊放散公事不送州縣許人告十三推司當直司并外縣公人因勘公事廣有所受許人因事報覆十四諸坊只許管本地內爭鬪火燭姦盜嗜錢殺牛公事十五在城裏外喪葬之家喪夜不得置酒肉宴樂以虧孝道山頭不得廣置齋筵違者罪在家長十六士庶家不肖子弟盜賣家產并轉肩出

利買客人貨貴買賤賣如本人無錢勒牙保人賣
業填還 二二山舊志



國家圖書館, NATIONAL CENTRAL LIBRARY, TAIWAN, R.O.C.

蔡忠惠別紀補遺卷上之下

明晉安徐 焞與公初編

莆陽宋 珏比玉增補

龍溪顏繼祖繩其攷定

書法

蔡君謨既爲余書集古錄序刻石其字尤精勁爲世所珍余以鼠鬚栗尾筆銅綠筆格大小龍茶惠山泉等物爲潤筆君談大笑以爲太清而不俗後月餘有人遺余以清泉香餅一篋者君謨聞之歎

日香餅來遲使我潤筆獨無此一種物茲又可笑也
歐陽公歸田錄

歐陽文忠論書云蔡君謨獨步當世此爲至言君謨行書第一小楷第二草書第三就其所長求其所短大字爲少疎也天資旣高又輔以篤學其獨步當世宜哉余評近歲書以君謨爲第一而論者或謂不然殆未易與不知者言也
蘇集外紀

書法當自小楷出而世或有未能正書而以行草稱也君謨年二十九而楷法如此可知其本末矣

東坡評書

國初李建中號爲能書然格韻卑弱猶有唐末以來衰陋之氣其餘未見有卓然追配前人者獨蔡君謨書天資旣高積學深至心手相應變態無窮遂爲本朝第一然行書最勝小楷次之草書又次之大書又次之分隸少劣又嘗出意作飛草自言有翔龍舞鳳之勢識者不以爲過
東坡評楊氏所藏蔡書

東坡跋君謨飛白曰物一理也通其意則無適而不可分科而醫醫之衰也占色而畫畫之陋也和

緩之醫不別老少曹吳之畫不擇人物謂彼長於是則可也曰能是不能是則不可世之書篆不兼隸行不及草殆未能通其意者如君謨真行草隸無不如意其遺力餘意變爲飛白可愛而不可學非通其意能如是乎

坡仙集

慈雅游北方十七年而歸退老於孤山下蓋十八年矣平生所與往還略無在者偶出蔡公書簡觀之反覆悲歎耆老雕喪舉世所惜慈雅之歎蓋有以也

東坡題君謨帖末

子瞻跋蔡君謨書海會寺記君謨寫此時年二十八其後三十二年當熙寧甲寅軾自杭來臨安借觀而君謨之歿已六年矣明師之齒七十有四耳益聰目益明寺益完壯竹林橋上暮山依然有足感歎者因師之行又念竹林橋看暮山乃人間絕勝之處自馳想耳

坡仙集

荆公書得無法之法然不可學無法故僕書盡意作之似蔡君謨稍得意似楊風子更放似言法華

東坡跋王荆公書

茶錄余凡數本此本與臨真草千文唐太宗哀冊
頃屢同方孚若借觀主者出於袖中卷舒纔畢急
袖之去其秘惜之如此後三十年乃爲方君所得
始君之求之也不得不止及旣得之也則又大喜
巾襲扃鑰若恐有負之而走者噫君可謂好之篤
矣余聞異書名蹟天所靳固人欲以區區智力擅
爲已有自昔及今未有能久者蔡邕藏論衡於帳
辨才栖穉帖于梁皆爲盜去是猶曰匹夫不足于
力爾虬鬚帝絕重鍾王筆蹟貯以玉匣石函入陵

中後爲溫韜所發諸帖遂傳人間甘露宰相捐厚
貨或官爵鉤取名書畫鑿垣納之禍作爲人剔取
奩軸金玉而棄書畫于路此一主一相以天下之
力而不能守而世之篤好必取者尚自以爲可傳
萬世子孫而不失幾于惑矣或曰守之有道歟余
曰惟得之無愧者差庶幾昭陵諸帖皆懸金帛而
得惟穉序以譎取然賜蕭翼銀瓶一金鏤瓶一碼
璫碗一並實以珠內廐馬二第一區賜辨才物三
千段穀三千石固非虧價矣劫陵之厄殆不可曉

王廣津以摧茶政宰輔以權力聚玩好身與家且不能庇惡能庇書畫耶君有好古博雅之名無巧偷豪奪之謗不但廣求以足所好又能積善以永其傳然則雖久而不失之矣

劉后村文集

劉后村題蔡端明臨真草千文云藝未有不習而工者右軍書稷帖至數十本智永臨千文凡八百本辨才年八十餘日臨蘭亭數過忠惠蔡公書法爲本朝第一然二王帖真草千文樂毅論皆有臨本而千文尤爲妙絕豈非備衆體而後能成一家

歟 劉后村集

劉后村題蔡端明三司日錄云西川絹汾州石州虢州木植延州修橋坊解州鹽荆湖茶皆入思慮微而麥麵亦爲經畫蔡公本以名節翰墨著名而勤於吏職如此蓋先朝擢材必責實用往往由翰林學士判省府然後輔政士大夫亦不肯以清談自高如歐蔡皆臺閣名臣及主計尹京有健吏所不能及近世喜吏事者多爲名勝不與號爲名勝者例不屑細務非委事於儂佞少年則受成鴈鷺

行而已使見蔡公此帖必以爲絮

劉后村集

蔡公歿將二百年宅相子孫寶其遺墨雖寸紙隻字亦補綴成帙如龔珠璧公之擇婿與婿之貽後皆不可及矣世傳第五倫搥婦翁張延賞輕子婿惜其未見此帙也

劉后村集

右蔡公書唐人四絕句劉禹錫一李白二杜牧一後題慶曆五年季冬廿有九日其棠院飲散偶作新字是歲公年三十五以右正言直史館知福州初疑其棠院在何處而歲除前一日觴客結字其

間後訪知院在郡圃會稽亭之後公集中別有飲其棠院三詩則在郡圃無疑矣此一軸大字極端勁秀麗不減洛橋記冲虛觀詩在普照會飲帖之上劉詩二十八字濃墨淋漓固作大字常法及季詩則筆漸瘦墨漸淡至牧詩愈瘦愈淡然間架位置端勁秀麗與濃墨淋漓者不少異在書家惟公能之故公自云蓋前人未有又云珍哉此字墨林君藏蔡字多矣小楷以茶錄爲冠真草以千文爲冠大字以此帖爲冠內淮水東邊舊時月今作惟

有淮東舊時月雲想衣裳花想容今雲作葉解釋
東風無限恨脫恨字往往飲後口熟手誤爾劉后村集

韻語陽秋云本朝書米元章蔡君謨爲冠餘子莫
及君謨始學周越書其變體出于顏平原元章始
學羅讓書其變體出于王子敬君謨泉州橋柱題
記絕遍平原元章鎮江焦山方丈六板壁所書與
子敬行筆絕相類藝至于此亦難矣東坡志林

近歲蘇黃米芾書盛行前輩如李西臺宋宣獻蔡
君謨蘇才翁兄弟書皆廢此兩軸君謨真行草隸

皆備石在仙井可寶也淳熙元年九月八日蜀州
手裝陸放翁集

萬安天下第一橋君謨此書雄偉迥麗當與橋爭
勝結法全自顏平原來唯策法用虞永興耳弁州山人稿

余得蔡忠惠安樂扶護二帖蘇文忠久上人一帖
黃文節眉州畢大事二帖於柘湖何良俊氏又得
米海岳古詩於長洲張鳳翼氏提舉帖于華亭張
某氏最後得文忠送梅花帖趙文敏騎從帖於嘉

禾盛氏弭節帖於吾州周應元氏後先以善價購之不敢作米顛據駭狡僮也千狐粹腋知爲裘者苦心子孫其善藏之勿落俗眼

弇州山人稿

記與君謨論書作字要手熟則神氣完實而有餘韻於靜中自是一樂事然患少暇豈於其所樂常不足耶自蘇子美死遂覺筆法中絕近年蔡君謨獨步當世往往謙讓不肯主盟往年予嘗戲謂君謨言學書如泝急流用盡氣力不離舊處君謨頗諾以爲能取譬今思此語已四十餘年竟如何哉

坡仙集

本朝書法蔡襄如少年女子訪雲尋雨體態嬌嬈行步緩慢多飾鉛華

海嶽名言

福州大都督府門慶曆中蔡公方欲新之俄詔爲本路轉運使以是年六月始事九月告成額扁公手書也

三山志

僞閩時明威殿舊基闢初改爲設廳至是頽弊蔡公重創今梁間有公自書慶曆六年歲次丙戌春正月壬午朔二十有七日戊申新作使廳二十五

字後太守許公懋臨摹公書爲錢碑板立新堂右
三山志

福州雙松亭在花園秀野亭之東北蔡公隸書額
後太守重公書法刻石日新堂右蓋亭公所創也
三山志

君謨書如蔡琰胡笳十八拍雖清壯頓挫時有閨

房態度

黃山谷集

張敬夫云蔡端明書如禮法之士盛服齋居不敢
少有野肆之意見者自是起敬

事文類聚

歐陽永叔牡丹記跋尾云右蔡君謨之書八分散
隸正楷行押大小草衆體皆精其平生手書小簡
殘編斷稿時人得者甚多惟不肯與人書石而獨
喜書余文也若陳文惠公神道碑銘薛將軍碣真
州東園記杭州有美堂記相州畫錦堂記余家集
古錄目序皆公之所書最後又書此記刻而自藏
于其家方走人于毫以模本遺余使者未至于閩
而凶訃已至于毫矣蓋其絕筆于斯文也於戲君
謨之筆旣不可復得而予亦老病不能文者久矣

於是可不惜哉故書以傳兩家子孫

歐陽文忠集

韓魏公以上相作畫錦堂于相州時歐陽文忠以
參政爲之記而蔡忠惠以三司使書之時稱三絕
又謂忠惠每一字必寫數十赫蹠踈合作而後用
之以故書成特精絕世所謂百衲碑者是也今觀
其用筆特遒勁偉麗出入清臣誠懸間而不無段
師琵琶之誦然自宋書家當以襄爲首云
弇州山人稿
宋元墨蹟一卷其後乃元人跋虎兒書耳中間虎
兒差有家風致能亦自適爽惟蔡忠惠奕奕神令

得晉人筆名所以冠四家不虛也

弇州山人稿

歐陽永叔求蔡君謨書集古錄序與書云修啟彝
在河朔不能自閒嘗集錄前世金石之遺文自三
代以來古文奇字莫不皆有中間雖罪戾擯斥水
陸奔走顛危困踣兼之人事吉凶憂患悲愁無聊
倉卒未嘗一日忘也蓋自慶曆乙酉逮嘉祐壬寅
十有八年而得千卷顧其勤至矣然亦可謂富哉
竊復自念好嗜與俗異馳乃獨區區收拾世人之
所棄者惟恐不及是又可笑也因輒自叙其事庶

以見其志焉然顧其文鄙意陋不足以示人既則
自視前所集錄雖浮屠老子詭妄之說常見貶絕
于吾儒者往往取之而不忍遽廢者何哉豈非特
以其字畫之工邪然則字書之法雖爲學者之餘
事亦有助于金石之傳也若浮屠老子之說當棄
而獲存者乃直以字畫而傳是其幸而得所托爾
豈特有助而已哉僕之文陋矣顧不能以自傳其
或幸而得所托則未必不傳也由是言之爲僕不
朽之託者在君謨一揮毫之頃爾竊惟君子樂善

欲成人之美者或聞斯說謂宜其不能却也故輒
持其說以進而不疑伏惟幸察

歐陽文忠集

歐陽文忠公於世俗所嗜一無留意獨好古石刻
自岐陽石鼓岱山鄒嶧之篆下及漢魏以來碑刻
山嵯川谷荒林破冢莫不采取以爲集古錄可以
正史學之闕謬昭傳後世跋尾多公自題復請蔡
君謨書序真一代之絕筆也

浪齋便錄

劉后村觀蔡忠惠家墨蹟詩云維蔡郡之望過者
必式閭巖巖端明廳遺像猶肅如頗聞手澤富倘

蔡忠惠別集卷之十一
許窺珍儲主人命發笥棊几同卷舒比顏倍秀麗
眎柳加敷腴毫楮兩記在妙與蠟本殊洛橋字尤
佳其大徑尺餘斑斑名臣帖煌煌昭陵書坐令承
學士若覩慶曆初向來故家物聚散何忽諸祭器
抱他適玉軸棄路隅端明夢奠時應門惟一孤厥
裔日以蕃廟院蜂房居寸紙惜如命不博明月珠
乃知儒澤遠浮榮無根株勗哉守視者巾襲防蠹
魚

劉后村集

東坡云遇天色明暖筆硯和暢便宜作草書數紙

非獨以適吾意亦使百年之後與我同病者有發
之也張長史懷素得草書三昧聖宋文物之盛未
有嗣之惟君謨頗有法度然而未放心與東坡相

上下耳

曲洧舊聞

元章以書學博士召對上問本朝以書名世者數
人元章各以其人對曰蔡京不得筆蔡卞得筆而
乏逸韻蔡襄勒字黃庭堅描字蘇軾畫字上曰卿
書何如曰臣書刷字

趙子固評

沈文啓南藏蘇滄浪蔡端明蘇文忠文定山谷海

蔡忠惠別集卷之十一
岳諸賢遺墨共一冊蔡端明自書絕句詩又蔡蘇

黃米真蹟一卷

都玄敬寓意錄

吳江史明古藏蔡端明八帖洪興祖范大年跋胡

理等題名

寓意錄

松江曹涇楊氏藏蔡蘇黃米真蹟一卷

寓意錄

君謨渴墨帖髣髴似晉宋間人書乃因倉卒忘其

善書名天下故能工耳

黃山谷集

頃年觀廟堂碑摹本竊怪虞永興名浮于實及見
舊刻乃知永興得智永筆法爲多又知蔡君謨真

行簡札能入永興之室也

黃山谷集

黃魯直云李西臺出羣拔萃肥而不剩肉如世間
美女豐肌而神氣清秀者也但摹本或失其筆意
可恨耳宋宣獻富有古人法度清瘦而不弱此亦
古人所難蘇子美蔡君謨皆翰墨之豪傑也歐陽
文忠公頗于筆中用力乃是古人法但未雍容耳
徐鼎臣筆實而字畫勁亦似其文章至於篆則氣
質高古與陽冰並驅爭先也

山谷集

蔡君謨行書簡札甚秀麗可愛至于作草自云得

蘇才翁屋漏法令人不解近見陳懶散草書數紙
乃真得才翁筆意寒溪寢堂待飯不至饑時書板
殊無筆力

山谷集

蘇子美似古人筆勁蔡君謨似古人筆圓雖得一
體皆自到也

山谷集

蔡君謨行書世多毀之者子瞻嘗推宗之此亦不
傳之妙也

山谷集

本朝承五季之後無復字畫可稱至太宗皇帝始
搜羅法書備盡求訪當時以李建中字形瘦健姑

得時譽猶恨絕無秀異至豐熙以後蔡襄李時雍

體製方入格律欲度驂駟終以駸駸不爲絕賞繼

蘇黃米薛筆勢瀾翻各有趣向然家鷄野鷓識者

自有優劣猶勝泯然與草木俱腐者

宋高宗翰墨志

晁氏曰皇朝蔡襄記建安荔枝味之品第凡三十
餘種古今故事一卷陳振孫曰君謨爲此書且書
而刻之與牡丹記並行闕無佳石以板刊歲久地
又濕皆蠹朽至今猶藏其家而字多不完可惜也

文獻通考

歐陽文忠公撰蔡君謨墓誌稱其工于書畫頗自
惜不妄爲人作故殘章斷稿人皆珍藏其名重于
當時如此後世咸不稱其善畫豈爲書名所掩耶
閩畫記

宋宣獻公綬作參政傾朝學之號曰朝體韓忠獻
公琦好顏書士俗皆學顏書及蔡襄貴士庶又皆
學之王文公安石作相士俗皆學其體自此古法
不講 海嶽名言

南宮眉山豫章莆陽檀聲宋室近時學者寡師王

氏宗祖必先事四家

祝枝山集

本朝字書惟東坡魯直元章然東坡多臥筆魯直
多縱筆米老多曳筆若行草尚可使作小楷如黃
庭樂毅洛神則不能矣其他如蘇子美周越近世
如吳說輩皆不免于俗獨蔡君謨行書既好小楷
如茶譜集古錄序頗有二王楷法若大小楷法則
亦不免俗而氣骨不滿散有美堂記畫錦堂記及
荔枝譜諺所謂厚皮饅頭是也大抵楷法貴於端
重又要飄逸難于兩全不可以瞞人故善書尤以

爲難也

倪正父評書

蔡君謨書法絕倫衆體皆備極爲坡公所推重平生不與人書石惟歐公文則樂書之若陳文惠神道碑薛將軍碣東園記牡丹記有美堂記畫錦堂記集古錄皆君謨所書近見畫錦堂記墨本方整古雅真奇筆也劉克莊所謂比顏倍秀麗眎柳更敷腴非虛語矣宋初善書者四家曰蘇黃米蔡愚竊以爲蔡當居三公之上

龍江夢餘錄

運筆柔則無芒角執手寬則多緩弱點掣短則法

臃腫點掣長則法離漸畫促則字摸畫疏則形慢拘則乏勢放或少則純骨無媚純肉無力少墨浮澀多墨笨

甲衮切笨尊草叢生也

鈍書病如此其衆惟積學

漸成者當求擺脫入究竟三昧此宜有墨池筆塚終身于是然書法須得天然至功力亦不可棄王僧虔曰宋文自謂不減王子敬時議天然勝羊欣功夫不及便知力學所至不可廢也蔡君謨妙得古人書法其書畫錦堂每字作一紙擇其不失法度者裁截布列連成碑形當時謂百衲本故宜勝

人也 廣川書跋

朱晦翁跋蔡端明寫老杜前出塞詩云蔡公大字蓋多見之其行筆結體往往不同意以年歲有早晚功力有淺深故耶岩壑老人多見法書筆法高妙獨稱此爲勁健奇作當非虛語慶元三年十月戊寅朱熹 朱子大全

蔡公書備衆體此卷評書一紙獨有歐虞筆意甚可愛也慶元己未三月八日雲谷老人觀縣大夫張侯所藏爲識其後 朱子大全

歐陽文忠公與蔡忠惠公手帖前輩交情篤厚語意真實于此可見慶元己未三月八日新安朱熹仲晦父書 朱子大全

蔡公節槩議論政事文章皆有以過人者不獨其書之可傳也南來多見真蹟每深敬歎朱熹題 朱子大全

跋永城縣學記云嚮時蘇子美兄弟以行草稱自二子亡而君謨書特出於世君謨筆有師法真草惟意所爲動造精絕世人多藏以爲寶而予得之

尤多若荔枝譜永城縣學記筆墨尤精而有法故
聊誌之俾世藏之知予所好而吾家之有此物也

嘉祐八年歲在癸卯中元日 歐陽文忠集

畫舫齋記末云舫者宴嬉之舟也姑以名予齋奚
日不宜予友蔡君謨善大書頗怪偉將乞其大字
以題于楹懼其疑予之所以名齋者故具以云又
因以置于壁 歐陽文忠集

宋渤云前輩文章字畫無不楷謹精密者正若生
平大節余嘗見昌黎韓公福先寺下題名歐陽文

忠公集古跋尾司馬文正公日曆東坡論語解易
說皆起草時冊子雖旁註細書一一端正可讀至
圈改行間悉可見其先後用意處今觀梅屯田公
自書詩兩章較其同時諸人若一軌轍又用筆作
方澗法李西臺蔡端明然 宛陵集

蔡君謨所摹右軍諸帖形模骨肉纖悉具備莫敢
踰軼至米元章始變其法超越規矩雖有生氣而
筆法悉絕矣玉峰陸友題 研北雜志

鎮江府望海樓額蔡襄所題後改爲連滄觀 米襄陽志

林一見府志

德晝堂在高郵州治宋政和間郡守毛澤民建以蔡襄所書四榜十二字刻之石以置堂上一統志

東園在儀真縣東宋皇祐間施昌言許元爲發運使作此園歐陽修爲記蔡君謨書嘗謂人曰吾用顏筆作褚體故其字道媚異常後人因名園記爲三絕園有澄虛閣清宴堂共樂堂拂雲臺一統志

楊用修云解縉紳學士春雨齋續書評鍾繇而下凡二十八人評皆當惟評蔡端明爲士偶蒙金珠

失之蔡之字有晉韻在蘇黃米之上也墨池瑣錄

鳥系闌者蔡襄所傳鋒正則兩旁如界也字體指南

宋之名家君謨爲首齊範唐賢天水之朝書流砥柱李蘇黃米邪正相半總而言之傍流品也後之書法子昂正源鄧俞伯機亦可接武妍媚多優骨氣皆劣君謨學六而資七子昂學八而資四休哉蔡趙兩朝之脫穎也元章之資不減褚李學力未到任用天資觀其纖濃詭厲之態猶夫排沙見金耳子昂之學上擬陸顏骨氣乃弱酷似其人大抵

宋賢資勝乎學元手學優乎資使秉元章之睿質
勵子昂之精專宗君謨之遒勁師魯直之懸腕不
惟越軌三唐超宗宋元端居乎逸少之下子敬之
上矣

書法雅言

逸少一出會通古今書法集成模楷自是而下優
劣互差試舉顯名今世遺蹟僅存者拔其美善指
其瑕疵庶取舍旣明則趨向可定矣智永世南得
其寬和之量而少俊邁之竒歐陽詢得其秀勁之
骨而乏溫潤之容褚遂良得其鬱壯之筋而鮮安

閒之度李邕得其豪挺之氣而失之疎窘顏柳得
其莊毅之操而失之魯獷旭素得其超逸之興而
失之驚怪陸徐得其恭儉之體而失之頽拘過庭
得其逍遙之趣而失之儉散蔡襄得其密厚之貌
庭堅得其提衄之法孟頫得其溫雅之態然蔡過
乎嫵重趙專乎妍媚魯直雖知執筆而伸脚懸手
體格掃地矣

書法雅言

陸友仁研北雜誌云蔡君謨摹放右軍諸帖形模
骨肉纖悉具備莫敢踰軼至米元章始變其法超

規越矩雖有生氣而筆法悉絕矣予謂君謨之書宋代巨擘蘇黃與米資近大家學入旁流非君謨可同語也朱晦翁亦謂字被蘇黃寫壞併筆法悉絕之言兩語皆刻矣數公亦有筆法不盡寫壞體格多有踰越蓋其學力未能入室之故也書法雅言畫錦堂記歐陽文忠爲丞相韓魏公琦作蔡襄真書在彰德府格古論浩生晚不及識蔡公公之宰木旣已合抱方於錢濟明家見遺墨四軸浩雖不能書然當世士大夫

能書者咸先之固知其筆妙與人稱也鄒道卿集

本朝書如蔡忠惠以前皆有典則及至米元章黃魯直諸人出來便不肯恁地要之便是世態衰下其爲人亦然陳景元評書

慶曆丙戌孟秋八日蔡君謨同邵去華蘇才翁郭世濟同遊靈源洞題名洞石楷書徑二尺筆畫端重效魯公體大勝洛陽橋記鼓山題刻宋代爲盛而書法古雅絕倫以君謨爲第一又書忘歸石三字國師岩三字于靈源洞左徑三尺許皆奇品也

榕陰新檢

蔡端明帖藏餘于舒氏後有趙忠定公題字讀之
如見兩賢面目真可寶哉

真西山集

歐陽公作蔡君謨墓志云公工書畫頗自惜不妄
與人書仁宗尤愛稱之御製元舅隴西王碑文詔
公書之其後命學士撰溫成皇后碑文又勅公書
則辭不肯曰此待詔職也國史傳所載蓋用其語
比見蔡與歐陽一帖云勳者得侍陛下清光時有
天旨令寫御撰碑文宮寺題榜至有勳德之家干

請朝廷出勅令書襄謂近世書寫碑志則有資利
若朝廷之命則有司存焉待詔其職也今與待詔
爭利其可乎力辭乃已蓋辭其可辭其不可辭者
不辭也然後知蔡公之意旨如此雖勳德之家請
於朝出勅令書者亦辭之不止一溫成碑而已其
清介有守後世或未之知故載于此

容齋三筆

朱子嘗曰字被蘇黃胡亂寫壞了近見蔡君謨一
帖僅僅有法度如端人正士

朱子大全

歐陽永叔學書詩云蘇子歸黃泉筆法遂中絕賴

有蔡君謨名聲馳晚節醉翁不量力每欲追其轍
人生浪自苦以取兒女悅豈止學書然自悔從今
訣 歐陽文集

歐陽公花譜蔡君謨所書至今流傳熙寧元年公
跋云君謨絕筆於斯文也 歐陽文集攷證

前日辱訪別但多愧荷以昭陵虞主未還在禮不
當飲酒無由會話少時益以爲恨承已登舟節氣
遂爾寒凝惟希加愛爲禱集古錄序鄙文無足采
第君謨筆法精妙近時石刻罕有也薄酒四品聊

助待賓不罪輕浼皇恐皇恐

歐陽公與王勝之書

梅聖俞以鼠鬚鼠尾筆遺君謨後石昌言學士來
求以松管代之仍贈詩云江南飛鼠拔長尾勁健
頗勝中山毫其間又有蒼鼠鬚入用不數南鷄毛
二物緩急豈常獲捕刺徒爾操鸞刀舊藏已贈蔡
夫子報君松管可蕭騷 宛陵集

歐陽永叔與馬著作啟云牡丹記荔枝譜久欲附
呈以候刻跋尾數十字以是稽遲不怪不怪病目
故不能書然君不肯爲他人書而獨爲修書此朋

友間自是一事不可不記故勉自書取笑取笑
歐陽

文忠集及尺牘

乙未七月十二日見蘇東坡禱雨帖阿育王宸奎
閣碑文蔡端明郎中帖東坡潤筆帖黃山谷維清
道人帖米南宮寶先生帖又米南宮臨蘭亭皆真
蹟項玄度所藏妮古錄

余於項氏見蔡君謨手蹟其前後二柬卽停雲館
刻宋澄心堂紙帖也妮古錄

王介石虎臣所藏東坡書蔡君謨一小詩

雲烟過
眼錄

福州鼓山靈源洞蔡君謨刻字趙子直刻詩于石
淳祐戊申新安鄭江詩云石揭君謨椽筆健詩留
子直翠珉斑鼓山志

宋人皆稱蔡忠惠書爲本朝第一頗自珍惜不妄
與人流傳五百餘年得公真蹟者不數家王弇州
最號博收僅得安樂扶護二帖秀水項氏亦廣蓄
前代法書亦只二帖文太史臨刻停雲館則公之
真蹟不啻龜鬚兔角矣公吾閩人閩人得公書尤
少此帖草書二詩神采筆鋒一見奪魄宋紙御印

觸手如新卽停雲所摹遠不及也歐蘇二公意不
可一世而獨推轂君謨善書載觀此帖名下無虛
信哉謝在杭多藏墨妙此又爲謝家第一寶

紅雨樓集

嘉祐二年龍圖學士梅摯出守杭州仁宗御賜詩
云地有吳山美東南第一州取有美二字名其堂
歐陽永叔爲記蔡君謨楷書于石今堂廢碑亦不
存而搨本故家猶有藏者

青箱集

王順伯藏昔賢墨帖至多蔡忠惠公帖亦有其二
一曰襄奉候子石兄起居朔日講謁一曰襄別洪

州少卿學士蓋又在前帖三十年之先也

容齋三筆

韓魏公云先君寫真得歐陽永叔爲之贊而蔡君
謨書其側崔公孺國博以詩稱美次韻荅之遷筆
褒揚逸少書孤風拂拂起襟裾孝心如覩英靈在
世系元承福慶餘永向淨居同相好

真置墳寺

任從深

谷改丘墟君詩意主稱人善義節軒然到古初

安陽集

韓魏公觀君謨書孝親崇福院牌詩云欲護親塋
薦福殊僧藍營葺幾年餘名因先帝鴻恩錫碑得

君謨大字書佛宇增輝良自爾鄉廬傳美孰加余
須知體法多奇處深造鍾王奧妙墟

安陽集

蔡忠惠題沙隨程氏歛硯曰玉質純蒼理緻精鋒
鋸都盡墨無聲此正謂石理堅潤鋒鋸盡而墨無
聲矣安能損筆而坡仙乃謂硯發墨者必損筆此
不知何謂

清暑筆談

王敬美云靈源洞左右皆勒遊人名字多篆隸古
雅可愛最前者宋嘉祐間知福州燕度偕其僚佐
來遊字作蔡端明體

王奉常集

古人以散筆作隸書謂之散隸近歲蔡君謨又以
散筆作草書謂之散草或曰飛草其法皆生于飛
白亦自成一家

夢溪筆談

集錄金石於古初無蓋自歐陽文忠公始今順伯
嗜古無厭又有甚于公之所為而復得此序真蹟
藏之其不偶然矣淳熙壬寅襍飲會稽西園暮歸
書此朱熹仲晦父

朱子大全

蔡君謨茶錄石刻小楷為平生得意書劉后村去
君謨未遠家有數本而其一為方氏得之不啻重

寶當時珍貴如此況五百載之後乎斯刻自君謨時置之建州治爲土掩瘞不知年歲近重修府藏掘地得之守識其古物洗刷仍置庫舍後附刻茶詩六首字稍大于茶錄亦頗缺蝕聞其石在公署無從印搨萬曆丁酉屠田叔爲閩轉運副使乃托田叔移書建州守索之才得此本守去今復棄置無有貴重之者惜哉巳亥春日三山徐燠與公跋

紅雨樓集

歐陽文忠作畫錦堂記蔡君謨書君謨書甚重于

當時刻石四方多矣今余家獨有此碑得之錢習

禮檢討云

楊東里文集

烏石山蔡端明題幽幽境三字于石嘉靖辛酉秋

建州楊應詔遊記云落落埋沒荒榛中雖欲探之

而無所攷今歷五十餘載愈不可問矣

竹窻雜錄

杭州府治舊在鳳凰山之右至和元年郡守孫沔

重建蔡端明襄撰記并書刻石于門之右今石刻

在和寧門內

咸淳臨安志

聖俞詩屢見許甚渴見何必自寫小兒輩可錄其

亦厭書字因思學書各有分限殆天之稟賦有人力不可彊者往年學弓箭銳意三四年不成遂止後又見君謨言學書最樂又銳意爲之寫來寫去却轉不如舊日似逆風行船著盡氣力祇在舊處不能少進力竭心劬遂已身老矣安能自苦如此耶乃知古人好筆蹟真可貴重也 歐陽文忠集

今日得蔡大書言久病近方就安人生聚散憂患百端相見何時況開年決求南去遂益爲胡越也惟以時自重臨紙區區 歐陽公與王仲儀

傳興化送蔡端明集報以溫公文因求端明帖云迂叟遺文整頓初寄君聊當報瓊瑤南隣尚有無厭意更覓皇朝第一書東坡謂君謨書爲本朝第一也 王十朋梅溪集

杭州清暑堂治平三年郡守蔡襄建自爲記及書今重建于恕堂後 臨安志

解大紳題蔡君謨真蹟汴水東流宋社移二絕句及諸公題跋向在鹿城張氏楊修齡侍御購求之不得張氏後遭燒掠書畫盡散此卷不知所在矣

鄧肅跋蔡君謨書云觀蔡襄之書如讀歐陽修之文端嚴而不刻溫厚而不犯太平之氣鬱然見于毫楮間當時朝廷之盛蓋可想而知也自崇寧以來以文章字畫爲天下主盟者校之仁廟之時賢否如何人才盛衰信乎其可卜治亂也事至今日但可慟哭耳建炎三年己酉

栞欄集

本朝評書以君謨爲第一信嘉祐之間可以魁也蘇黃繼出文妙天下而書又能張其軍於君謨若

無甚愧者然君謨如杜甫詩無一字無來處縱
上下皆藏古意學之力也蘇黃資質過人筆力天
出其太白詩乎深得其旨趣者自當見其優劣矣

栞欄集

杜祁公與人書曰衍老來多病不能書故信筆亂
寫耳而君謨過以草聖推許使人懷愧無已近見
梅庄新詩益竒歎服何窮

浪樓襟記

正獻公嘗和孫秘丞詩曰老來楷法不如初試向
閒齋習草書落筆何曾見飛動雕章早已過吹噓

公楷法端勁暮年始學草書而歐蔡蘇黃諸公皆盛許之豈非大本先立則縱橫造次無往不合耶

寶慶元年冬十月魏了翁題

浪樓襟記

米元章與人書曰吾友何爾易草體想便到古人也蓋其體已近古但少爲蔡君謨脚手爾餘無可道也比稍用意若得大年千文必能頓長愛其有偏側之勢出二王外也

浪樓襟記

膠城曹吉甫家藏蔡公離都帖雲間俞彥直有稼邨詩帖吾邑方伯文有河豚帖皆用松竹厚牋書

墨色黑如漆隱起紙上卽殘缺處亦有古香可觀離都帖更完好也吳江周敏仲博物善收藏云有蔡公真草千文在其家紙墨完好屢約余過觀且許摹入蔡帖中大是快事

浪樓襟記

文徵明龍茶錄考云蔡端明書評者謂其行草第一然宣和書譜載御府所藏獨有正書二種豈不足于行草耶歐公云前人于小楷難工故傳于世者少而難得君謨小字新而傳者二謂集古錄及龍茶錄也端明亦云古之善書必先楷法漸至行

草襄近年粗知其意而力已不及觀此則其行草雖工而小楷尤爲難得當時御府所收僅有三種而茶錄在焉蓋此書尤當時所貴嘗刻石傳世數百年來石本已不易得況真蹟乎侍御王君敬止不知何緣得此間以示余蓋希代之珍也按公以慶曆四年爲福建轉運進小龍茶時年三十有四後三年爲皇祐三年入修起居匡選進此錄後知福州失去存稿懷安令樊紀購得刊行當是至和二年再知福州時至治平元年始定正重書相距

皇祐又十餘年公年五十有三晦菴評蔡書歲有早暮力有深淺公書至是蓋無遺法矣元人盧貴純跋云余按歐公云集古錄序橫溢飄發而茶錄勁實端嚴結體雖殊各臻其妙則此書必嘗入其品題矣卽後題治平甲辰卽元年重書之歲也又按劉后村云茶錄凡見數本則當時所書宜不止此二帖南渡後嘗爲蔡修齋所藏修齋永嘉人名範字遵甫幼學尚書之子仕終吏部侍郎嘗官闕中與端明家通譜因得此帖不知卽御府藏本或

后村所見諸本今不可考矣元人題語二十餘皆記修齋之孫宗文授受收藏之故而不及書之本末余因疏其大略於右其詳則俟博雅君子

甫田集

余始得蔡君謨字二紙恨不見所跋唐搨賜蘭亭本可稽始末越數年僚友石德興見之愕然曰吾家有此二本而無蔡跋乃取遺余拆而復會其有數耶紹興辛亥余守會稽刻之郡齋重陽前二日括蒼王信

蘭亭考

近得唐搨賜侍臣蘭亭本卷尾三印有蔡君謨跋

刊之郡齋甫畢而游君少遠持所藏定武本來余見而喜既不去手因并書之王信

蘭亭考

龍圖馬公遵字仲塗吾郡之樂平人至和間爲諫官御史言時政多聽用國史有傳今其家藏蔡忠惠帖用金花箋十六幅每幅四字玩其波畫令人起敬真竒物也世南嘗屢得觀之云梅三馬五蔡大皇祐壬辰中春寒食前一日會飲于普照院仲塗和墨聖俞按紙君謨揮翰過南都試呈杜公歐陽九評之當處在何等馬五諾我詩婢潤筆皆是

奇事凡六十四字今前一紙四字不存南軒先生
嘗跋云蔡端明此書大得顏平原涪溪磨崖刻筆
意世人但知其端嚴有法度而不察其操縱運用
妙處何異趙括讀兵書乎前輩評端明正書爲本
朝第一蓋不誣也

宋張世南游宦紀聞

方時舉觀蔡忠惠墨蹟詩云宋朝書法誰第一端
明蔡公妙無敵百年遺蹟落人間片紙猶爲人愛
惜公書方整八法俱荔譜茶錄絕代無當時石刻
今已少況復筆蹟真璠璵此書飄逸尤絕品風度

不殊僧智永粉箋剥落神氣全夜夜虹光穿藻井
蔡公乃是莆名臣慶曆四諫才無倫堂堂事業在
青史詞翰聊以娛心神公今九原不可作三復遺
篇淚交落荒祠華表倚空山月明定有歸來鶴

莆陽
文獻及方氏譜

泉州九日山有墨妙堂自晉以來士夫避世氛多
遊息賦咏于此至唐益盛筆墨與茲山並傳今訪
求無幾也獨歐陽詹書屋在焉蔡君謨之刻巍然
並存君謨人物風流不居王顏下共行書亦今日

第一此所以獨傳

陳知柔墨妙堂記

大抵宋人書自蔡君謨以上猶有前代意其後坡谷出遂風靡從之而晉魏之法盡矣

道園學古錄

林希逸跋蔡端明遺建康杜君懿行草四帖云蔡忠惠正字爲本朝第一行草俱妙然得者絕少此卷尤當寶之

唐齋續稿

李彌遜書蔡端明帖後云李陽冰云逸少十五年攻永字訣其後書入神品本朝以書名家得八法之妙者前輩獨推蔡是帖真可貴也

竹溪集

李彌遜跋蔡君謨白蓮帖後云書家論永字法滉澀峻疾要使筆鋒行字畫中如人骨骼旣立雖豐瘠不同各自成體近時臨書方盡力點畫間圓銳斜直惟恐失之奚暇議筆行何如耶持此爲驗真僞不足辨矣蔡君謨公白蓮四帖久歸李正臣家後人得贗本珍重印可更相傳玩至今不悟如貧家子見他寶器不知其所可寶也是非之能亂人乃爾嗟夫

竹溪集

公爲三司使本朝極盛時也公因陝西亢旱奏各

路蠲貸三復蔡公遺墨而有感焉男帖宋書十二
行記啖趙陸三家春秋解卷帙類例惜其缺亡而
欲求善本以祛惑公方貴盛而究心麟史過于專
門世言公對客不談政事而談文章者淺淺乎知
公矣

后村集

虎丘千人石上爲可中亭卽生公講堂宋蔡君謨
篆四字于石

田子旻集

劉克莊題蔡公書朝賢送行詩序此帖與余所藏
三略字體無毫髮異三略乃寶元己卯筆也時年

二十八序乃慶曆壬午筆也時年三十一字雖精
麗未免矜持視晚守錢唐書清暑堂記時信有老
少之異然欲學公楷法必自三略自此序始余謂
古之善書者由楷以入行草非由行草而入楷也
羲獻虞褚皆然本朝惟蔡公備此能事米無楷字
蓋行草易而楷難故藏帖之家有贗米無贗蔡敬
則十襲此序客來求觀立數丈外示之可也

后村集

劉克莊再跋朝賢送行序云一太常博士出倅而
朝賢餞以詩者八十三篇師回之賢可知也按師

回名鑄亦莆人序書字而不書名曰陳某而已陳以天聖五年公以天聖八年繼擢甲科與陳輩行耳而卑下之如此可爲後生法

后村集

孝嚴殿記凡一百六十有一字在公衆書中筆畫差瘦蓋公暮年得意書與清暑堂皆從心不踰矩之筆也

后村集

蔡公尤自珍其所作散隸此數紙二斷裂文義不全二翻覆書背書之譬如珪璋雖復殘缺尤可寶也

后村集

余所見茶錄凡數本暮年乃見絹本豈非自喜此作亦如右軍之于稊帖屢書不一書乎公吏事尤高發奸摘伏如神而掌書吏輒竊公藏稿不加罪亦不窮治意此吏有蕭翼之癖與其他作奸犯科者不同耶可發千古一笑淳祐壬子十月望日克莊書時年六十六

后村集

蔡帖惟觀書記真行草諸體皆備當爲公遺墨之冠此軸若使靈寶見之必穴厨後竊去使東學究見之必設計豪奪使米顛見之必作贗本脫換敬

則其善藏之無落諸人奸便

后村集

世人臨書全如崔琰假作魏武元溫貌類劉司空亦可遮瞞俗眼第恐爲匈奴使及劉家舊婢勘破耳蔡公臨轉授訣九分逼真使率更見之不能辨也嗚呼可謂藝之至者矣

后村集

右蔡公十帖雖或止半幅或止數行皆有義味可研尋如云至杭未嘗遊覽足以見其勤于政也云忝知制誥家世孤貧母氏思歸足以見其難于進也云造宅已畢田未有涯又足以見其貴而貧也

至于論瘞鶴銘諸葛漸筆唐供奉墨問歛郡墨工姓字皆翰墨家所願見也于時杜丞相唐彥猷與公皆以書名世杜餉公鼠鬚筆公歎其精妙故相以十筆遺從官私覲之禮止此今人寄毛錐子少亦百枝安得有佳筆哉墨似廷珪法者竟不知其爲何人十帖中或有可疑者然真蹟要非贗筆所能亂又先賢言語自有一種意度後人彊學之不能也內卜葬帖云地理家說無了期但無風水免鄉人言可矣通人之論也近世尤等用葬書魏元

履葬于平坡穴地三丈六尺梯而下，棺蔡季通所
卜也。既而元履之後遂絕，古人所以行營高燥者，
高則遠水燥則避風。魏公之窆無乃太卑濕乎。莆
人重黃涅槃，厲伯韶兩墓師如神。其所點穴或在
高峰或在廣野，有鳳凰展翅玉帶，出匣之說爲其
學者無二師。眼力塊守死法，高則入雲下則及泉，
惜無以公之說藥之。論樂帖云：欲古樂必由胡部，
乃能通世。儒謂刪後無詩之于樂，雖胡部亦不廢，
皆學者所當知也。此帖隸法尤妙。

后村集

此十帖雖一時試筆游戲，然備真行草隸之體，內
一帖云：顧少連以笏擊奸臣裴延齡，段秀實以笏
擊朱泚，蓋公正大至剛之氣發于翰墨者如此。段
太尉名上一字與公父名同，偏傍故不書。公于書
法無所不學，如鍾紹京歸登輩皆常習玩，所以書
爲本朝第一。昔桓溫見簡文謚議曰：此安石碎金
也。余于此十帖亦曰：此蔡公碎金也。

后村集

此十二條以公奏議攷之，諸疏皆不著年月，但去
冗篇稱仁宗廟號，則知其治平間爲三司使時。

所上也公在諫省方三十餘立節而持論峻及此則年事高世故練其所條畫字字忠實以養兵百二十萬爲自古所未有以磨勘法行能否無辨爲大弊以阿附爲邪佞又以邀虛名賣直譽爲巧詐蓋此十二條非獨先朝與今日之通患實千萬世國家之藥石人主之龜鑑也夫子之履魏公之笏後代寶之况公諫草乎况其行草妙絕不減羲獻乎余借觀累年以還墨林

后村集

廡嘗讀端明集所載謝賜御書詩一首并答詔詔

當在其家類集者故并得之今此詩真蹟當在宋秘府不知何時復流落人間考其歲實仁宗皇祐四年壬辰距今永樂四年丙戌春秋三百五十有五年矣中間宋元叔季四方之亂極矣鼎遷社屋海潰山移而一紙之書世傳寶之翰墨騰騫光輝如昨夫豈獨以其書之善也哉侍郎黃公請予題識爲作詩二首

詩見前集

廬陵解縉紳書

浪齋便錄

芾於舊翰林院曾觀謝賜御書刻石今四十年於大丞相天水公府始覩真蹟書學士米芾

跋賜字帖

忠惠博古尚氣節工字學大字鉅勢尺小字如豪
髮筆力位置大者不失結密小者不失寬綽至於
科斗篆籀正隸飛白行草章草顛草靡不臻妙而
尤長於行在前輩中自有一種風氣筆甚勁而姿
媚有餘

書史會要

或問懷素草書隣於長史君謨有奴僕之譏過乎
曰人無百歲之壽而有千歲之信豪傑復起相知
於異世之下齟初畱反然若合符節蔡君謨曰長史
筆勢其妙入神豈俗物可近哉懷素處其側直有

奴僕之態况他人所可擬議

衍極古學篇

此卷應以蔡密學爲最而小米次之范石湖金橘
帖亦蒼勁可喜然同觀容有進米于蔡者謂予狗
情桑梓予不敢也予蓋從蘇長公語

浪士書評

蘇黃米蔡宋時以蔡京爲殿已見之爲君謨當云
蔡蘇黃米

董玄宰跋語

蔡蘇黃米爲宋四大家而蔡書世不多有此卷風
骨秀逸天真爛熳尤爲佳絕雖奕奕饒姿韻而結
法出二王殆無一筆失度余以爲心入山陰壺奧

不涉此途終是門外人耳

焦弱侯評蔡帖

蔡端明帖妍媚適儻之致溢出楮墨中所謂字裏
金生行間玉潤者殆此類也觀其結行取態似以
柔翰而發之勁腕故姿顏綽約而鈎勒婉健有駿
馬轉韁之勢米元章評公書謂如張春女子體態
妖嬈訪雲尋雨豈自負刷書作此謔語邪余謂宋
人書得晉唐法者惟公爲然雙井猶堪中郎之虎
賁至眉山天中外史雖規倣前人不免別開世界
矣

顧麟初評蔡帖

蔡忠惠書爲趙宋法書第一此玉局老語也今觀
此帖藹然忠敬之意見於聲畫又不可與茶錄牡
丹譜同日言也鮮于樞獲觀謹題

浪齋便錄

余嘗在祕府讀君謨文集閱其所上謝賜御書詩
深歎其君臣相遇之盛也及觀所書荔枝譜字畫
臻妙每與同列歎其博物之精而又惜其與武第
粟粒同一用心之勤耳雖然君謨嘗自珍愛其書
謂有翔龍舞鳳之勢觀此書其言當不虛也識者
解之豫章胡儼題

浪齋便錄

蔡忠惠公集

卷一

四



蔡忠惠公集
卷一

國家圖書館, NATIONAL CENTRAL LIBRARY, TAIWAN, R.O.C.

蔡忠惠別紀補遺卷下之上

明晉安徐 焞興公初編

莆陽宋 珏比玉增補

龍溪顏繼祖繩其攷定

談稅

蔡君謨娶余祖姑清源君而赴漳南幕余曾祖通
議嘗贈之詩曰藻思舊傳青管夢哲科新試碧鷄
才乍依仲寶蓮花幕更下溫郎玉鏡臺可謂佳句
矣

葛立方韻語陽秋

蔡君謨嘗書小吳箋云李及知杭以日市白集一部乃爲終身之恨郎基清慎無所營嘗曰任官之所木枕亦不須作况重于此乎惟頗令人寫書樊宗孟遺之書曰在官寫書亦是風流罪過基答曰觀過知仁斯亦可矣

韻語陽秋

范仲淹貶知饒州余靖上疏論掾尹洙請與同貶歐陽修移書責司諫高若訥皆坐貶蔡襄作四賢一不肖詩以記其事四賢謂淹靖洙修不肖謂若訥也其詩播于都下士人爭傳寫之鬻書者市之

頗獲厚利契丹使至密市以還後張中庸使北幽州館舍中有寫襄所作詩并歐陽修書于壁者

仁宗政要錄

慶曆中蔡君謨自福建轉運使召爲諫官時王逵知福州作詩送行不記其破題後六句云好將公道口去沃聖君心民困魚思水兵驕隼在林天涯一尊酒不爲別離斟

呂原明雜記

王禹玉曰蔡君謨咏草詩有時平生戰地農情入春田之句其言關教化非野火燒盡春風吹又

生之比

八閩通志

蘇子容云歐公不言文章而喜談政事君謨不言政事而喜論文章各不矜其所能也

蘇氏談訓

慶曆初歐陽永叔張安道王素俱除諫官君謨以詩賀之三人以其詩薦于上尋亦亦諫官號爲一棚鶻

王鞏見聞近錄

閩俗立春以蔬餅爲節物蔡公襄立春寄福州燕司封詩云春盤食菜思三九羅源林迥云青韭供盤餅面圓

三山志

福州花園在牙門之西所謂春臺館是也歲二月啟鑰縱民遊賞常閱一月與民同樂也蔡密學襄爲郡日有開花園詩

三山志

福州之俗春日州民踏青東郊尤盛多拾野菜煮臠亦唐人杏粥榆羹之意也太守以假日招僚屬登臨蔡密學襄有寒食遊西湖詩

三山志

福州四月八日州民慶佛生日居民所在與僧寺共爲慶讚道場蔡密學襄爲州日有四月八日西湖觀放生詩此風蓋久矣

三山志

福州九仙山有四徹亭蔡公襄賦詩後建九仙觀

亭始廢 三山志

長樂靈峰院有石洞嘗見龍乘雲而歸號龍龕山
蔡密學題詩有雲崩石道險潮落海門高之句縣
令董淵和之有庭鶴歸迷主龕詭云失年掃雲嫌
俗駕題壁記詩仙五言排律凡六韻 三山志

寵示寄君謨唱和詩并梅書豈勝珍荷梅君窮困
晚遇真知不爲否也某此苟活但葬事未有涯大
事惟此固難容易自秋來忽患腰脚醫者云脾元

冷氣下攻遂勉從教誨食肉古人三年不食鹽酪
誠有愧也不孝不孝 歐陽公與杜世昌書

福州東山有榴花洞唐永泰中樵者藍超遇白鹿
逐之渡水入石門始極窄忽豁然有鷄犬人家主
人曰吾避秦人也留卿可乎超云欲與親舊訣乃
來遂與榴花一枝而出恍若夢中旣而尋之不知
所在蔡公襄爲郡日尋其故址效南陽劉子驥故
事竟覓不得題詩而去 閩中實錄

慶曆六年蔡正言襄荆春野亭自書亭額題詩後

有蘇舜欽劉瑾范伯玉吳拭陳粹詩各一篇有曰翰林遺剞久傾隤又曰鏤額竒蹤蔡翰林知亭公所剞額公所書也

三山志

韓獻肅公守成都時蔡君謨與之書曰襄啟歲行甫新魯鈍之資日益衰老雖勉就歲務其于精力不堪勞苦念君之生相去旬日如聞年來補治有方當愈強健果如何哉襄于京居尚畱少時佇君還軫伸眉一笑傾懷之極今因樊都官西行奉書問動靜不一一襄上子華端明閣下此帖語簡而

情厚初無寒溫之問寢食之祝頌德之佞也今風俗日以偷薄士大夫之猥浮者于尺牘之間益出新巧習慣自然雖有先達篤實之賢亦不敢自拔以速嘲罵每貽書多至十數紙動稱某號又稱某翁官階僭獵恬不以爲耻言語不恂誠意掃地觀此其少愧虐

容齋隨筆

公爲福州守偕蘇才翁遊靈源洞洞中題名石壁各有詩

三山志

蔡君謨嘗書小吳箋云李及知杭川市白集一部

乃爲終身之恨此君殊清節可爲世戒張乖崖鎮
蜀當遷時士女環左右終三年未嘗回顧此君殊
重厚可以爲薄夫之檢押此帖今在張乖崖之孫
堯夫家予以爲買書而爲終身之恨近于過激苟
其性如此亦可尚也

沈存中夢溪筆談

晏元獻公作相因雪設客歐陽文忠公輩在坐時
西方用兵歐公有詩云可憐鐵甲冷徹骨四十餘
萬屯邊兵次日蔡襄遂言其事晏坐此罷相公曰
唐裴度作相亦曾邀文士飲如退之但作詩云園

林窮勝事鍾鼓樂清時幾曾如此合開

五侯鯖

沙隨先生嘗畜一歛硯後有蔡忠惠題詩云玉質
純蒼理緻精鋒鋸都盡墨無聲相如間道還持去
肯要秦人十五城後以送汪書季路又汪書寓三
衢以五千得一硯後刻東坡銘云東坡硯龍尾石
開鵠卵見蒼壁與居士同出入更寒暑就燥濕今
何者獨先逸同參寥老空寂二硯皆佳物也

游宦
記聞

莆陽古囊山寺石壁上有蔡公大書絕句禪堂後
又有立碑二十字有石上坐忘歸之語字差小

編

欲倩東風吹散雨蔡公吉祥寺探蕊詩也洪氏誤
收入唐詩入深林處亦霑衣亦誤刻萬首唐詩中
今詩集全編皆改正之

浪樓襍記

蔡君謨自諫省出守福唐梅聖俞賦古劍篇送之
云生銅夜夜鳴剡鍔未嘗缺主人久提携何事贈
離別借問豈酬恩請看鐔上血休慙補履功出處
異施設

宛陵文集

仁宗正月十四日御樓遣中使傳宣從官曰朕非
好遊觀者與民同樂蔡襄有應制詩同時賦者紛

紛惟蔡爲絕倡

西軒詩話

呂夏卿子通直君有歐陽詢草書千文蔡襄跋爲
智永通直出示余欲跋荅以必改評乃跋君欣然
遂於古紙上跋正通直君失其名字

米元章書史

李泰伯謝蔡十八丈相示詩卷云昔年多幸枉高
軒示我新詩累百篇使者卽時還趙璧夢魂今尚
憶釣天據鞍馬援誰云老陋巷顏回始是賢桂樹
寒山風景好近來應更有長篇

盱江集

蔡君謨以古大弩牙示梅聖俞聖俞詩云黃銅弩

牙金錯花銀闌線齒如排沙上立準度可省括箭
溝二道前直窠其度四寸寸五刻漆光歷歷無纖
差蔡侯出此問誰得往年客遺來瑯琊瑯琊築城
穿原壤既獲磨洗爭傳誇莫知歲月孰製作精妙
近世應難加發機高下在分刻今人妄射巧仍賒
願侯擬之起新法勿使邊兵死似麻

宛陵集

蔡公詩律五言者宗李杜七言者出入王孟如鑪
灰寒更畫燈炮落仍挑摹寫北堂夜話之景真畫
工手也其與唐人凍餅黏柱礎宿火陷鑪灰語可

頡頏矣若五言古之姑胥行鄴陽行有晉魏六朝
遺致非唐之淺近者可及

浪齋便錄

蔡公三賦弘博典兩有江鮑徐庾之致其序記襍
文簡練高古尺牘題跋亦如之若奏疏則以批鱗
直氣寓引喻曲譬之中使人主讀之明白感動陸
宣公後不多見也謚不曰文而曰惠豈真爲政事

所掩耶

編

劉后村跋蔡端明書太宗哀冊云文皇帝除亂致
治功德儘可形容使班馬秉此筆必甚奇偉斯作

稍似不稱然沙場鏖箭斗極咸羈獵山入圍瀚渚
歸池東旌若木西旆條支龍鄉委賚烏服來儀亦
佳語也今人恐不能道

劉后村集

晁氏曰蔡君謨集十七卷君謨興化人天聖中舉
進士在慶曆四諫官選中累遷至翰林學士權三
司使嘗知福泉杭三州文章清遒粹美工書爲宋

朝第一

文獻通考

蔡興宗五代宋人傳竒作蔡襄父傳竒雖爲戲事
然使初學小生習見稔聞誤亦不淺

瑯琊代辭篇

陳振孫曰蔡襄集二十六卷近世始刻于泉州王
十朋龜齡爲序余嘗宦莆至其居去城三里荔子
號玉堂紅者正在其處矮屋欲壓頭猶是當時舊
物歐公所撰墓志石立堂下真蹟及諸公書帖多
有存者京卞同郡晚出欲自附于名閥自稱爲族
弟襄孫佃唱名第一京時當國以族孫引嫌降第
二佃終身恨之

文獻通考

蔡君謨一帖云襄昔之爲諫臣與今之爲詞臣一
也爲諫臣有言責世人自見疎今無是焉世人見

親襄之于人未始異之而人之觀故以有異也觀此帖乃知昔時居臺諫者爲人所疎如此今則反是方爲此官時其門揮汗成雨一徙他局可張雀羅風俗偷薄甚矣

容齋隨筆

莆有紫霄巖九華別山也唐涅槃祖師卓錫茲峰因開山焉師馴一虎自馭圓寂同日虎骼至今猶存巖有天台橋雷轟石羅漢石石室二洞其穴通海每潮時水輒上溢蔡端明襄嘗登臨留題長句迨至正寺燬故老相傳止四句云十里迢迢上紫

霄山尖海角盡來朝雷轟羅漢峰前石雲鎖天台

洞裏橋

浪齋便錄

建茶向未入詩自君謨北苑十咏歐梅賡和幾至百篇後膏茶之製不傳而世之咏草茶者亦用雲脚乳華語可發一笑

瓚編

泉州治內舊有中和堂初名愛松堂蔡襄詩云偏愛東堂砌下松三年瀟洒伴衰翁寒江蕩蕩潮初上疎影孤圓月正中

泉州志

蘇東坡有墨蹟書蔡公三詩天際烏雲含雨重樓

前紅日照山明嵩陽道士今何在青眼看人萬里
情此蔡君謨夢中詩也僕在錢塘一日謁陳述古
邀余飲堂前小閣中壁上小書一絕君謨真蹟也
綽約新嬌生眼底侵尋舊事上眉尖問君別後愁
多少得似春潮夜夜添又有和云長垂玉筋殘
粧臉背爲金釵露指尖萬斛閒愁何日盡一分真
態爲誰添二詩皆可觀後詩不知誰作也已上東坡語
丹丘柯敬仲多蓄魏晉法帖至宋人書始百十函
隨以與人弗留也他日獨見此軸在几格間集怪

之及取觀則吾坡翁書蔡君謨夢中詩及守閣中
舊題也第三詩不知何人作其軒轅彌明之流歟
敬仲求集作詩識其後賦此四首是日試郭岷墨
目疾轉深不復能作字又知年歲後雖若此者亦
尚能作否臨楮慨然至順辛未二月望日蜀人虞
集書道園學古錄

漳州齊雲閣在府治開元寺之西蔡襄詩有紫閣
青梯壓翠岑春情秋思共登臨句淳祐間郡守黃
朴更新之扁其門曰紫閣青梯取蔡詩語也

漳州志

君謨以詩寄歐公公荅云先朝楊鶴風采聳動天下至今使人傾想世謂公尤惡楊劉之作而其言如此豈公特惡其碑板奏疏磔裂古文爲偶儷者其詩之精工律切者自不可廢歟又云近時蘇梅二窮士耳主張風雅人士歸之自二窮士死文士滿朝而使斯道寂然不但近歲祖宗盛時固已然矣歐帖在鄭子敬左司家

劉克莊后村集

跋清暑堂會同年詩云蔡公不以詩名然草際飛螢乍有無詩家要渺之音也有王右丞韋蘇州之

風 后村集

蔡公與珏八世祖評事長子堂友善荔枝譜所稱宋公誠卽評事此稱宋丈卽堂字仲構天聖五年進士也評事與太原縣君王氏年皆九十六及見玄孫公嘗有賀句云堂中偕老百年婦膝下含飴五代孫聯板國初猶存宋珏謹識

宋氏家譜

晉安徐興公旣刻歐陽四門黃裏行二集復緝蔡端明別紀余友宋比玉徧訪蔡軼集銘兒時曾有所聞懼其隕也爲賦二十韻紀之越國開風雅歐

陽黃蔡三孤飛非有待鼎立更無慚末躅推持後
前荒賴指南世疎疑滅沒力短廢追驟笏在子孫
守珠迷象罔探物華終自寶書癖可辭婪錯以黃
金檢裝成碧玉函旁搜窮琬琰雜出間朱藍帙就
猶遺恨詩亡頗不甘曾聞密學秘乃在東門慙黻
濕供箱蠹緘滕入繭蠶君懷誠比渴吾憶亦方醜
恐遂樵薪妬終焉塵土諳禁書龍久比識字鶴須
銜事有千秋合禪非一路叅騷招惟宋玉玄賞獨
桓譚汲乘訛何補齊諧幻未堪楚材惡良史蔡女

真竒男桑梓高山仰芻蕘委巷談從來文字障將
與問瞿曇

鄭邦衡拙存稿

公嚴重切至人也任諫官直史館侃侃論天下事
無忌諱大率以進賢才退不肖伸國威柄治法爲
主兩守泉福二州去舍直百餘里而泉又爲公母
家唯其用夬肅宰化如秋霜烈日以故能行之父
母之邦莫敢干撓推而及於字書皆體方畫勁不
作姿媚旖旎之態故其發爲文章簡潔深厚辭載
其道之所當生而語畢於意之所欲出如峻岱

嶽無待陂陀迤邐之餘觀其詩亦與壯渾古質勝其文蓋予論公爲人如鄭子產而其文如韓退之何匪我集

鑒賞

歐陽永叔與蔡忠惠公書云某啟辱惠櫻寧翁墨多荷多荷佳物誠爲難得然比他人尚少其二幽齋隙寂時點弄筆硯殊賴于斯雖多無厭也煩聒不爲嫌矣諸留面叙

歐陽文忠集

某啟前夕承惠紅絲研誠發墨若謂勝端石則恐

過論然其製作甚精真爲几格間佳物也昨日以有文書不敢致簡爲謝李駁還又承惠水清泉香餅數十枚聊報厚貺吾儕日以此等物爲事更老應當澹死租庸遂更作一程無由頻面聊當一笑歐陽修頓首白三司給事

歐陽文忠集

壺山有栢木一株長數寸半化爲石半猶是堅木蔡君謨見而異焉因運置私第余至莆陽日親見之

墨客揮犀

閑中不曾作文字祇整頓了五代史成七十四卷

不敢多令人知深思吾兄一看如何可得極有義類須要好人商量此書不可使俗人見不可使好人不見奈何病愈新篇幸多爲寄此小簡立焚勿漏史成之語惟道意於君謨同此也

歐陽公與梅聖俞書

劉原甫在永興得古銅簋銘寄歐陽文忠蔡君謨跋其後曰禮家作簋傳其說不知其形故名存實亡此器可以正其謬也甲辰正月十二日襄集古錄歐陽永叔硯譜云紅絲石硯者君謨贈余云此青州石也得之唐彥猷云須飲以水使足乃可用不

然渴燥彥猷甚奇此硯以爲發墨不減端石君謨又言端石瑩潤惟有銛者尤發墨歛石多銛惟膩理者特佳蓋物之奇者必異其類也此言與余特異故并記之

歐陽文忠集

蔡君謨水精枕中有桃花一枝宛如新折

眠古錄

開皇仁壽以來碑碣字書多妙而往往不著名氏惟丁道護所書常自著之然碑石在者尤少余每與蔡君謨惜之自大業以後率更與虞世南書始盛既接于唐遂大顯矣治平元年正月七日歐陽

修書

廬陵別集

歐陽永叔跋啟法寺碑云啟法寺碑丁道護書蔡君謨博學君子也於書尤稱精鑒余所藏書未有不更其品目者其謂道護所書如此隋之晚年書學尤盛吾家率更與虞世南皆當時人也後顯於唐遂爲絕筆余所集錄開皇仁壽大業時碑頗多其筆畫率皆精勁而往往不著名氏每執卷惘然爲之歎息惟道護能自著之然碑刻在者尤少余家集錄千卷止有此爾有太學官楊褒者喜收書

畫獨得其所書興國寺碑是梁正明中所藏君謨所謂楊家本者是也欲求其本而不知碑所在然不難得則不足爲佳物古人亦云百不爲多一不爲少者正謂此也治平元年立春後一日太廟齋

官書

集古錄

蔡君謨常評李超墨超易水人唐末與其子庭珪渡江至歙州以地多美松因畱居遂以墨名家本姓奚江南賜姓李氏珪或爲邽弟廷寬男承宴孫文用皆有名又有朱君德柴成務李文遠張遇陳

贊亦著名江南當時其制有劍脊屬餅拙墨進貢
墨供堂墨其面多作蛟龍其基有宣府字今人間
已少傳者仁宗宴賜近臣墨其文曰新安香墨皆
庭珪雙春龍樣尤爲佳品

浪齋便錄

柳誠懸云子敬洛神賦人間合有數本今世所見
惟自嬉至飛十三行耳蔡君謨云子敬放肆豪蕩
與右軍差異臨學之家必謹其辨矣

虞伯生集

晉人謂臨禊序唐人稱蘭亭詩或言蘭亭記歐陽
公云修禊序蔡君謨云曲水序東坡云蘭亭文

谷云禊飲序通古今雅俗所稱俱云蘭亭至高宗
宸翰題曰禊帖於是蘭亭有定名

珍珠船

右漢秦君碑首題云漢故南陽太守秦君之碑秦
君不知爲何人碑在南陽界中字已磨滅不可識
獨其碑首字大僅存其筆畫頗奇偉蔡君謨甚愛
之

集古錄

南鄉太守碑陰將吏三百五十人官屬何其多耶
蓋通從史而盡列之當時猶於其間以取士人故
吏亦清修其勢然耳右南陽蔡君謨書今十年矣

嘉祐八年九月二十七日書

集古錄

蘭亭修禊序世所傳本尤多而皆不同蓋唐數家所臨也余今所得皆人家舊所藏者其一得於三司蔡給事君謨世所傳本不出乎此其或尚有所未傳更俟博采

集古錄

滁山醉翁題范文度摹本蘭亭序云書雖列于六稅非如百工之稅也蔡君謨以書名當世其稱范君者如此不爲誣矣

集古錄

吳廣碑不著書撰人名氏而字畫精勁可喜余嘗

爲蔡君謨言書雖學者之餘事而有助於金石之傳者以此也治平元年八月八日書

集古錄

伯父君謨水精枕中嘗有桃花一枝宛如新折茶甌十兔毫四散其中凝然作雙蛺蝶狀熟視若無動每寶惜之

錢圍山叢談

公題後漢秦君碑首云漢碑今存者少此篆亦與今文少異勢力勁健可愛蔡君謨題

集古錄

漢秦君碑熹平中在南陽界中字已磨滅不可識獨其碑首字大僅存其筆畫頗奇偉蔡君謨甚愛

之此君謨過南都時所題乃皇祐三年也今一紀矣嘉祐八年九月十七日歐陽修書

集古錄

永福縣東南八十里羅漢寺之仙巖有篆書十字形體奇怪環布巖石不著姓名人所未識號曰仙篆歐陽公永叔嘗得之喜其無鐫刻之迹如指畫成文欲以番夷金書字圖號譯之未暇也蔡端明時守三山以道家書釋之曰貧道守真一中有不死術亦莫得其據政和三年之夏邑宰陳武祐好竒之士也訪求其詳知篆有三一在安仁寺仙人

山寺僧憚墨蠟之費燎斷而瘞之二在中和寺黃坑之崖今存焉字皆竒怪亦不可識安仁者掘而得之僅完三字又於土生院僧景純所得藏本四餘不復有遂再鋟諸木列岩之堂今聞亦有不存者余嘗見碑本字勢夭矯洒落竒妙枝葉不屬而脈絡皆通信是竒怪不知蔡忠惠觀道家何等書而識之此字恐子雲未必識也

游宦紀聞

薛稷書刻石者余家集錄頗多與墨蹟互有不同由摹刻人有工拙昨日兗楊褒家所藏薛稷書君

謨以爲不類信矣

集古錄

唐有道先生葉公碑李邕撰并書余集古所錄李邕書頗多最後得此碑於蔡君謨君謨善論書爲余言邕之所書此爲最佳也

集古錄

唐安公美政頌房璘妻高氏書余嘗與蔡君謨論書以謂書之盛莫盛于唐書之廢莫廢于今非余錄之將遂泯于後世矣余於集古不爲無益也

集古錄

宜興尹氏藏模襖帖中縫折處鈐墨寶小印後有

翰林學士承旨中書舍人蘇易簡詩云有若象夫子尚興闕里門虎賁狀蔡邕猶傍文舉尊昭陵自一闕真蹟不復存予今獲此本亦可比璵璠後有范文正蔡君謨裴煜馮當世跋富鄭公梅都官呂汲公蘇氏兄弟米海岳諸公題名小米鑒定此卷後歸陳祭酒緝熙祭酒歿燬于火

寓意錄

茶事

世言團茶始於丁晉公前此未有也慶曆中蔡君謨爲福建漕使更製小團以克歲貢元豐初年建

州又製密雲龍以獻其卬高於小團而其製益精
矣曾文昭所謂莆陽學士蓬萊仙製成月團飛上
天又云密雲新樣尤可喜名出元豐聖天子是也
唐陸羽茶經於建茶尚云未詳而當時獨貴陽美
茶歲貢特盛茶山居湖常二州之間修貢則兩守
相會山椒有境會亭基尚存盧仝謝孟諫議茶詩
云天子須嘗陽羨茶百草不敢先開花是已然又
云開緘宛見諫議面手閱月團三百片則團茶已
見于此當時李郢茶山貢焙歌云蒸之護之香盛

梅研膏架動聲如雷茶成拜表貢天子萬人爭噉
春山摧觀研膏之句則知嘗爲團茶無疑自君謨
製建茶入貢陽羨不復研膏祇謂之草茶而已

陽秋

韻語

梅聖俞有荅建州沈屯田寄新茶詩云春芽研白
膏夜火焙紫餅價與黃金齊包開青蒻整碾爲玉
色塵遠及蘆底非一啜同醉翁思君聊引領又謝
人惠茶詩云山色已驚溪上雷火前那及兩旗開
采芽幾日始能就碾月一罌初寄來以酪爲奴名

價重將雲比脚味甘迴更勞誰致中冷水况復顏
生不解杯

宛陵集

後唐天成四年五月七日度支奏朝臣乞假觀省
者欲量賜茶藥文班自左右常侍至侍郎宜各賜
蜀茶三斤蠟面茶二斤武班官各有差以此知建
茶以蠟茶爲上供自唐末已然矣第龍鳳之制至
本朝始備而君謨爲獨精耳

浪樓礫記

張芸叟云有唐茶品以陽羨爲上供建溪北苑未
著也貞元中常袞爲建州刺史始蒸焙而研之謂

之膏茶其後始爲餅樣貫其中故謂之一串陸羽
所烹惟是草茗耳迨至本朝建溪獨盛丁晉公爲
轉運使始製爲鳳團後又爲龍團歲貢不過四十
餅至蔡君謨又爲小團其餅過加於大團熙寧末
神宗有旨下建州置密雲龍其餅又加於小團

錄

書

茶之品莫貴于龍鳳謂之團茶凡八餅重一斤慶
曆中蔡君謨爲福建路轉運使始造小片龍茶以
進其品絕精謂之小團凡二十餅重一斤其價值

金二兩然金可有而茶不可得每因南郊致齋中
書樞密院各賜一餅四人分之官人往往縷金花
其上蓋其貴重如此 歐陽公歸田錄

故事建州歲貢大龍鳳團茶各二斤以八餅爲斤
仁宗時蔡君謨知建州始別擇茶之精者爲小龍
團十斤以獻斤爲十餅仁宗以非故事命劾之大
臣爲請因畱而免劾然自是遂爲歲額 石林燕語

論者謂君謨學行政事高一世獨貢茶一事比于
宦官宮妾之愛君而閩人歲勞費于茶貽禍無窮

蘇長公亦以進茶譏君謨有前丁後蔡之語殊不
知理欲同行異情蔡公之意主於敬君丁謂之意
主于媚上不可一槩論也後曾子固在福州亦進
荔枝未可以少之也 興化志

丁晉公爲福建轉運使始製鳳團後又爲龍團不
過四十餅專擬上供雖近臣之家徒聞之未嘗見
也天聖中蔡君謨又爲小團其品迥加于大團賜
兩府然止于一斤惟上大齋宿兩府八人共賜小
團一餅縷之以金八人初歸以侈非常之賜親知

瞻玩賡唱以詩

畫墁錄

建茶盛于江南近歲制作尤精龍團茶最爲上品一斤八餅慶曆中蔡君謨爲福建運使始造小團以克歲貢一斤二十餅所謂上品龍茶者也仁宗尤所珍惜雖宰相未嘗輒賜惟郊禮致齋之夕兩府各四人共賜一餅官人剪金爲龍鳳花貼其上八人分蓄之以爲竒玩不敢自試有佳客出爲傳玩歐陽文忠公云茶爲物之至精而小團又其精者也嘉祐中小團初出時也今小團易得何至如

此珍貴

澠水燕談錄

余觀東坡荔枝歎注云大小龍茶始于丁晉公而成于蔡君謨歐陽永叔聞君謨進龍團驚歎曰君謨士人也何至作此事今年閩中監司乞進鬪茶許之故其詩云武夷溪邊粟粒芽前丁後蔡相籠加爭買龍團各出意今年鬪品克官茶則知始作偏者大可罪也

冷齋夜話

蔡君謨善別茶後人莫及建安能仁院有茶生石縫間寺僧采造得茶八餅號石岩白以四餅遺君

謨以四餅密遣人走京師遺王內翰禹玉歲餘君
謨被召還闕訪禹玉禹玉命子弟于茶笥中選取
茶之精品者碾待君謨君謨捧甌未嘗輒曰此茶
極似能仁石岩白公何從得之禹玉未信索茶帖
驗之乃服

墨客揮犀

王荆公爲小學士時嘗訪君謨君謨聞公至自取
絕品茶親滌器烹點以待公冀公稱賞公于夾袋
中取消風散一撮投茶甌中併食之君謨失色公
徐曰大好茶味君謨大笑且歎公之真率也

墨客揮犀

蔡君謨議茶者莫敢對公發言建茶所以名重天
下由公也後公製小團其品尤精于大團一日福
唐蔡葉丞秘教召公啜小團坐久復有一客至公
啜而味之曰非獨小團必有大團雜之丞驚呼童
曰本碾造二人茶繼有一客至造不及乃以大團
兼之丞服公之明審

墨客揮犀

晁氏曰試茶錄二卷皇朝蔡襄撰皇祐中修注仁
宗常面諭云卿所進龍茶甚精襄退而記其烹試
之法成書二卷進御世傳歐公聞君謨進小團茶

驚曰君謨士人何故如此

文獻通考

自入夏間巷相傳以爲今秋水當不減去年初以爲訛言今乃信然兩夜家人皆屏水并廼翁達旦不寐街衢浩渺出入不得更三數日不止遂復謀逃避之處住京况味如此奈何奈何蔡君謨寄茶來否悶中喜見慰人還怱怱

歐陽文忠集

晁氏曰東溪試茶錄一卷皇朝朱子安集拾丁蔡之遺東溪亦建安地名

茶書

梅聖俞和杜相公謝蔡君謨寄茶有吳中內史才

多少從此尊羹不足誇句因茶而薄尊羹是亦至論陸機以尊羹對晉武帝羊酪是時尚未有茶耳然張華博物志已有真茶令人不寐之語

瀛奎律髓

陸羽茶經裴汶茶述皆不載建品唐末然後北苑出焉宋朝開寶間始命造龍團以別庶品厥後丁晉公漕閩乃載之茶錄蔡忠惠又造小龍團以進東坡詩云武夷溪邊粟粒芽前丁後蔡相寵加吾君所乏豈此物致養口體何陋邪茶之爲物滌煩雪滯於務學勤致未必無助其與進荔枝桃花者

不同然克類至義則亦宦官宮妾之愛君也忠惠
直道高名與范歐相亞而進茶一事乃儕晉公君
子之舉措可不慎哉 鶴林玉露

北苑茶焙在建寧吉苑里鳳凰山之麓咸平中丁
謂爲本路漕監造御茶歲進龍鳳團慶曆間蔡襄
爲漕使始改造小龍團茶尤極精妙邑人熊蕃詩
云外臺慶曆有仙官龍鳳才聞製小團蓋謂是也
其後則有細色五綱第一綱曰貢新第二綱曰試
新第三綱曰龍團勝雪曰白茶曰御苑玉芽曰萬

壽龍芽曰上林第一曰乙夜供清曰承平雅玩曰
龍鳳英華曰玉除清賞曰啟沃承恩曰雪英曰雪
葉曰蜀葵曰金錢曰玉華曰寸金第四綱曰無比
壽芽曰萬春銀葉曰宜年寶玉曰玉清慶雲曰無
疆壽龍曰玉葉長春曰瑞雲翔龍曰長壽玉圭曰
興國岩鏤曰香口焙鏤曰上品揀芽曰新收揀芽
第五綱曰太平嘉瑞曰龍苑報春曰南山應瑞曰
興國揀芽曰興國岩小龍曰興國岩小鳳曰大龍
曰大鳳其粗色七綱曰小龍小鳳曰大龍大鳳曰

不入腦上品揀芽小龍曰入腦小龍曰入腦小鳳
曰入腦大龍入腦大鳳此茶之名色也北焙之名
極盛于宋當時士大夫以爲珍異而寶重之北苑雜述
天台竹瀝水斷竹梢屈而取之盈甕若雜以他水
則亟敗蘇才翁與蔡君謨比茶蔡茶精用惠山泉
蘇劣用竹瀝水亦能取勝此說見江鄰幾所著嘉
祐雜志雙井因山谷迺重蘇魏公嘗云平生薦舉
不知幾何人惟孟安序朝奉歲以雙井一盞爲餉
蓋公不納苞苴顧獨愛此其亦珍之耶清波雜志

武夷喊山臺在四曲御茶園中製茶爲貢自宋蔡
襄始先是建州貢茶首稱北苑龍團而武夷之石
乳名猶未著也宋劉說道詩云靈芽得春光龍焙
收竒芬進入蓬萊宮翠甌生白雲坡詩咏粟粒猶

記少時聞

武夷志

惠山泉久貯未免瓶盃氣用細沙淋過則如新汲
時號折洗惠山泉蔡君謨生日葛公綽以九龍泉
爲壽卽此九龍惠山別名浪齋便錄

蔡君謨謂范文正曰公米茶歌云黃金碾畔綠塵

飛碧玉甌中翠濤起今茶絕品其色甚白翠綠乃
下者耳欲改爲玉塵飛素濤起如何希文曰善

珍珠

蔡端明守福州日試茶必取北郊龍腰泉水烹煮
無沙石氣手書苔泉二字立石泉側

三山志

蔡君謨湯取嫩而不取老蓋爲團餅茶發耳今旗
芽鎗甲湯不足則茶神不透茶色不明故茗戰之
捷尤在五沸

太平清話

東坡云茶欲其白常患其黑墨則反是然墨磨隔

宿則色暗茶碾過日則香減頗相似也茶以新爲
貴墨以古爲佳又相反也茶可于口墨可于目蔡
君謨老病不能飲則烹而玩之呂行甫好藏墨而
不能書則時磨而小啜之此又可以發來者一笑
也

春者紀聞

北苑連屬諸山茶最勝北苑前枕溪流北涉數里
茶皆氣弁然色濁味尤薄惡况其遠者乎亦猶橘
過淮爲枳也近蔡公作茶錄亦云隔溪諸山雖及
時加意製造色味皆重矣又云北苑鳳凰山連屬

諸焙所產者味佳慶曆中歲貢有會坑土品一斤
叢出于此氣味殊薄而蔡公茶錄亦不云會坑者
佳 東溪試茶錄

君謨論茶色以青白勝黃白余論茶味以黃白勝

青白 黃儒品茶要錄

杭州妓周韶有詩名好畜竒茗嘗與蔡君謨鬪勝
題品風味君謨屈焉 詩女史

聖俞有宋著作寄鳳茶詩云春雷未出地南土物
尚凍呼噪助發生萌穎強抽其團為蒼玉璧隱起

雙飛鳳獨應近臣頌豈得常察其顧茲實賤貧何
以叨贈貢石碾破微綠山泉貯寒洞味餘喉舌甘
色薄牛馬湮陸氏經不經周公夢不夢雲脚俗所
珍烏觜誇仍衆常常濫盃甌草草盈罌甕寧知有
竒品圭角百金中祕惜誰可邀虛齋對禽哢又建
溪新茗詩云南國溪陰暖先春發茗芽采從青竹
籠蒸自白雲家粟粒烹甌起龍文御餅加過茲安
得比顧渚不須誇 宛陵集

劉成伯遺梅聖俞建州小片的乳茶十枚聖俞荅

以詩曰玉斧裁雲片形如阿井膠春谿鬪新色寒
籜見重包價劣黃金敵名將紫笋拋桓公不知味
空問楚人茅 宛陵集

公仕於慶曆嘉祐之間事仁宗願治之主出入殿
陛正言讜論每形章奏最委曲感悟莫如進龍茶
一疏蓋嘗反覆茶錄曰處之得地能盡其材曰善
別茶者如相工視人氣色察之於內曰民間試茶
皆不入香恐奪其真曰水泉不其能損茶味罕譬
牖達無非欲天子深准自當審邪正真偽之辨以

盡賢才之用嗟嗟公豈好事者哉 黃論德序

或者謂公龍團一節爲歐陽永叔所致慨若以爲
公微瑕傳不云乎臣事君猶子事父也昧爽日入
慈以旨甘棗栗飴蜜以甘之薑苴粉榆兔薨滌瀧
以滑之脂膏以膏之豈不孝子哉况乎公之爲人
爲文凡百森整豈有供御品式不致精鑿以恩尚
方屈建薦芟必違乃道仁宗絕愛公書命公書元
舅隴西王碑公唯唯奉詔及書溫成后父碑則辭
曰此待詔職也若謦然可慢其上予謂合此二事

可以觀公之爲臣焉

何匪莪集



國家圖書館, NATIONAL CENTRAL LIBRARY, TAIWAN, R.O.C.

蔡忠惠別紀補遺卷下之下

明晉安徐 燭典公初編

莆陽宋 珏比玉增補

龍溪顏繼祖繩其攷定

荔品

蔡公詩云荔枝纔似小青梅蓋四月初作四月未
有荔支所謂似小青梅者乃一種蚤荔名火山亦
有佳品熟以五月間人不以為貴也又一帖借六
典劉茂才何人藏書乃富於蔡公耶騰本當作騰

疑筆誤或通用也

劉后村集

蔡君謨荔枝譜一卷昔人評其書嚴正方重如土
偶蒙金今無乃類之乎此本棗木刻在閩中故不
能大佳耳白樂天序蘇子瞻詩皆爲荔枝傳神然
彼是巴蜀嶺南荔枝似不足辱二君子語王元美四部稿
蔡端明荔枝譜舊乃棗板所刻博古賞鑒家重之
若木難火齊此本爲莆人翻鏤者亦不失筆意但
搨不用墨而用烟殊乏光彩耳萬曆壬辰季秋徐
惟起跋紅雨樓集

蔡翰林譜荔枝以宋家香爲上品至和丙申宋氏
老以餉公公謝以詩有並賞昔聞思故友之句注
云嘗同陳太監靖方諫議謹言太卿陞並曾會賞
建炎丁未六月師仁居里有以百顆遺予者并
墨公詩相示蓋去公時又七十有二年矣香味絕
世尚如公言嗚呼向非王氏媼保持之豈使後生
見此高韻耶徐師仁識宋氏家譜

修啟遂爾大暄不審氣體何似承已對謝應已漸
治裝無由詣前日劇瞻企荔枝圖已令崔慈傳寫

自是一段佳事碑文好者前已創錄今又于東過
籠中得此數十本勒李敷送上因出過門爲幸不
宣修頓首君謨端明侍郎

歐陽文忠集

莆田方氏有荔枝樹結實數千顆欲重其名以二
百顆送蔡忠惠公給以當歲所產止此公爲之目
曰方家紅著之于譜自後華實雖極繁茂逮至成
熟所存者未嘗越二百遂成識語此段已載遜齋
閒覽中郡士黃處權復志其詳如此

容齋四筆

歐陽公跋荔枝譜曰牡丹花之絕而無甘實荔枝

果之絕而非名花然二者惟不兼物之美故各得
其精余少遊洛陽花之盛處也因爲牡丹作記君
謨閩人也故能識荔枝而譜之因念昔人嘗有感
於二物而吾二人者適各得其一之詳故聊書以
附君謨之末

廬陵別集

唐世進荔枝貢自南方楊妃外傳以貢自海南杜
詩亦云南海及炎方惟張君房以爲忠州東坡以
爲涪州未得其真近閱涪州圖經及詢土人云涪
州有妃子園荔枝蓋妃嗜生荔枝以驛騎傳遞故

君謨譜曰天寶中妃子尤愛嗜涪州歲命驛致又
曰洛陽取於嶺南長安來於巴蜀此實錄也後人
不須置喙矣

浪齋便錄

楊貴妃生日帝命小部張樂長生殿因奏新曲未
有名會南方進荔枝因名曰荔枝香故杜子美病
橘詩云憶昔南海使奔騰獻荔枝百馬死山谷到
今耆舊悲又解悶詩云先帝貴妃今寂寞荔枝還
復入長安則明皇時進荔枝非嶺表明矣蔡君謨
云生荔枝中國未之見也九齡居易雖見新實亦

未遇夫真荔枝然則象坡所云永元荔枝來交州
天寶歲貢取之涪皆非生荔枝也張君房脞說亦
以爲忠州何耶豈未讀君謨譜乎

晚香堂抄

荔枝之於菓仙也佛也斷無一物得擬者江瑤柱
河豚腴旣非其倫寒蒲萄楊家菓不堪作奴矣譬
於月以爲珪爲鏡爲鈎皆第二月非月體也君謨
云非名畫之可得而精思之可述又云剥之凝如
水晶食之消如絳雪其味之至不可得而狀也噫
不可得而狀乃深于荔枝矣

宋香臺食譜

梁蕭惠開云南方之珍惟荔枝矣其味絕美楊梅
盧橘自可投諸藩溷故東坡詩云南村諸楊北村
盧直與荔枝爲先驅君謨謂一木之實生于海瀕
巖險之遠性畏高寒不堪移植曾不得班于盧橘
江橙小發光彩此譜所由作也

浪齋便錄

蔡君謨守泉日書荔枝譜于安靜堂有鄭熊者亦
記廣中荔枝凡二十五種以附蔡譜之末曰玉英
子曰燠核曰沉香曰丁香曰紅羅曰透骨曰牂牁
曰僧耆頭曰水母子曰蒺藜曰大將軍曰小將軍

曰大蠟曰小蠟曰松子曰蛇皮曰青荔枝曰銀荔
枝曰不意子曰火山曰野山曰五色荔枝

浪齋便錄

嶺南好事作荔枝餠頭取荔枝榨之入酥酪辛辣
以合醬又作簽肉以荔枝肉作椰子花與酥酪同
炒土人大嗜之此荔枝遭劫也卽蔡譜中紅鹽蜜
煎白曬亦是荔枝之厄惟順昌白火酒以荔枝投
之浹旬而出濃艷幽沈如西施醉倚玉牀太真瀝
泉出浴用泥頭封固其酒至隔歲開之滿屋作新
荔枝香矣

宋香臺食譜

南海人以黑葉入釀與粵西寄酒并重于江南蔡
譜各製俱備而不知釀法何也豈公嗜茶而不喜
飲耶嘉定程隱士孟陽曾于殷司馬坐中嘗之因
作荔枝酒歌曰君不見杜陵諸侯老賓客左擘輕
紅右拈碧至今浣花詩句中春酒荔枝色相射誰
將巧意相和溲便釀荔枝作春酒重碧輕紅兩有
無萬里瑩然落吾手風流司馬霜鬢鬚玉盤珍羞
十萬鋪天輸尤物慰好事遙從庾嶺飛百壺飲中
予考最下戶一勺分潤詩腸枯銀罍乍發香氣麈

玉杯映色清若無北客浪傳酒如乳吳儂已墮涎
成珠主人貪竒樂更殊金屏笑出如花姝自將風
骨比妍麗羅襦玉膚不用摹韶顏若并化爲酒玉
山共倒誰當扶君不見坡仙流離南海噉百顆一
官爲口誇良圖何如三絕眼前是菓爲醞醪人醜
酬但恨古人不見爾君我不樂何爲乎荔酒之妙
如此而當時蔡公不及余因取而補之

浪樓便錄

公送荔枝與昭文相公帖云襄再拜宿來伏惟台
候起居萬福園中荔枝惟陳家紫號爲第一輒獻

左右以申野芹之誠幸賜收納謹奉手狀上聞不

宣 容齋隨筆

又一帖與七哥制幹云熟甚不審尊體起居何如園中荔子新熟分奉四百枚今歲風亭熟皆晚俟有佳品當馳獻耳五月廿四日襄啟 浪樓雜記

明皇時所謂一騎紅塵妃子笑者謂瀘戎產也故杜子美有憶向瀘戎摘荔枝之句蓋當時閩品尚未有聞至今則閩品奇妙香味皆可僕視瀘戎蔡君謨作譜爲品已多而自後奇名異品又有出于

君謨所譜之外者也

鷓林玉露

宋公荔枝陳紫所從出黃巢兵不果伐但斫一斧而去今所生荔子其核皆有斧痕蔡譜雖不志怪余驗之實然樹在宋氏宗祠後至正戊戌六月宋介夫遺百顆與盧希韓并榻蔡公詩墨一紙盧有和蔡原韻詩卽其處也國初樹猶在後漸以枯死而宋比玉屋傍一樹大如車蓋中可坐四五人是其孫枝云 錢氏閩遊志

宋香乃宋故家喬木也蔡譜品題此居其最靈根

一株生香不斷數百年之風味猶存今宋君對此
樹而植斯堂堂成求扁于余因顏之曰品中第一
景定壬戌之秋竹溪林希逸書

竹谿集

至正癸卯燕會于宋氏之庭庭有古荔枝樹擅名宋
香者世傳舊屬王氏黃巢亂兵欲斧薪之王媪擁
樹號泣願與俱死賊憫而止荔子迄今核有斧痕
蔡端明亦譜其略時之相去五百餘年樹益向榮
根本蟠踞層陰蔽虧叅政公移席其下慷慨懷古
酌以卮酒俾予摹寫詠歌之以紀良集八十翁張

師夔書于輒醉齋

宋氏宗譜

卷

莆中名產稱荔枝爲殊品而荔枝之尤者惟陳紫
宋香爲特勝蔡公譜彙謂陳紫種出宋氏則宋香
較之陳紫又其尤也樹距作譜時已三百禩迄今
又不知幾代洪武間相繼奪于戎衛之官宋子孫
不克復者凡二十餘載迨永樂初年始返業于宋
宋有文用者驟復而喜已而戚然懼其復失也一
日持蔡端明墨蹟及張氏師夔所作畫圖來徵記
于余永樂乙酉嘉平月林環書

崇璧文集

蔡公譜張老圖宋香品第世絕殊亭亭嘉植榮且
敷巢兵欲斧炊行厨王媪抱樹死與俱尤物幸爾
留根株宋氏老人八十餘得之卽此營世居五百
餘禩枝葉舒清陰如幄垂庭除薰風時來蘭麝如
赤日照耀珊瑚珠桃紅籠出玉雪膚斧痕着核留
真模異香奇味天下無有孫文用美且都撫之愛
護如瓊琚故家喬木多摧枯雲仍世守應無虞

朱季
和詩集

江南有佳植託根在庭除扶持王母力珍重端明

書君家忠孝門餘澤尚沾濡子孫貴封植慎勿忘

厥初

林士敏詩

吾莆名菓鮮荔枝君謨有譜世所知陳紫方紅固
爲貴宋香品彙尤珍奇六月炎敲日正長纍纍綠
葉垂絳囊薰風微度疎林晚比隣猶覺聞清香核
上儼若斤斧痕茲事奇怪難評論云是當年巢寇
亂欲伐其枝投爨焚幡幡老媪以身庇天然幻出
斯靈異至今又歷數百年後人培植常留意

林希哲詩

恩遇

翰林學士知制誥權三司使蔡襄轉官加食邑制
勅朕祇若先帝之初大賚以勞天下職親禁地之
臣皆先帝所遺以助朕者也其可以後而忘哉具
官蔡襄率德秉義以綏寵祿主國大計功昭于時
班命有章往欽無斁可

王臨川集

景祐二年春正月孫奭上無逸圖帝命施于講讀
閣至是又詔蔡襄寫無逸篇于閣屏

通鑑綱目

仁宗遇蔡襄厚曰有子如此其母之賢可知命特
賜冠帔

端明遺事

蔡襄在朝奏醫人李端試國子四門助教不理選
限皇帝勅曰爾從事于醫久矣而吾左右親信之
臣稱爾之行能請一命焉厥有故常以爲爾寵其
思淑慎以稱褒嘉可

王臨川集

伯父君謨美鬚髯仁宗一日屬清閒之燕偶顧問
曰卿髯甚美長夜覆之于衾下乎將寘之于外乎
君謨無以對歸舍暮就寢思聖語以髯置之内外
悉不安遂一夕不能寢

鐵圍山叢談

歐陽文忠回杭州蔡端明讓謝到任書云右修啟

伏承出領要藩已諧禮上伏惟歡慶某官剛毅體
仁粹明迪哲直道信于中外高風凜乎縉紳頃煩
持橐之清資蓋賴富民之餘術經綸之業蓄素蘊
以未施偃息于藩邈衝懷而自遠雖重違于誠請
實深鬱于輿情諒煖席之未遑卽追鋒而迅召遂
登大用顧匪私言寒律向嚴神襟善嗇瞻凝感著

交集棕靈

歐陽文忠集

仁宗皇帝親書君謨兩字遣使持詔賜蔡襄襄進

古詩一首帝荅詔

蔡氏宗譜

勅祕書丞集賢校理蔡襄可特授知諫院事兼修
起居注國家廣開言路崇設諫垣擇方嚴之蓋臣
登諍諫之清列責任尤重眷懷亦深向非練達民
彝精詳國體利權不能易所守貴勢無以摧其心
則安可邵厥清芬補予闕政以爾朝奉郎侍御史
判三司都理又司輕車都尉賜緋魚袋周歆等謀
猷鯁亮器範冲深並繇博古之文皆握丞題之選
清心蒞局交負幹才議事飛章第揚風采每詢朝
論亟簡朕心宜進官聯往叅諫列爾其勤乃節行

厲于忠誠姑務罄諤諤之辭敷陳而無撓豈宜持庸庸之計畏避以自安勉膺寵光式遲明效可依前件勅如右牒到奉行慶曆三年四月六日下蔡氏宗譜

莆陽蔡氏家廟記云宗法之廢久矣近代盛時雖號爲世家大族者其子孫往往散越與凡民等而况衰亂之世乎同郡端明殿學士君謨公嘗有志于斯中遭多難未嘗一日而忘今剏重屋上奉得姓之祖神主又南像其祖之有封在祀典者配以

子孫之功德者十位西屋之下延師其中聚人子弟同教之時享月薦買田以給費合族人之尊而年長者祭則繼高祖者主之蓋知本者以明大宗之事則小宗之遺意也自禍亂以來惟學士公作斯譜建此堂以尊祖敬宗示將來以遺族人子孫者可謂遠矣莆陽以忠節顯名皆在其譜云尚書吏部侍郎同郡葉顯撰蔡氏宗譜

遺蹟

江陰悟空寺本梁吳才捨宅爲招隱院天聖中蔡

君謨嘗寓居于此有詩畱題壁間後三十五年又有芥葛通議子發詩子發名密江陰人

江陰縣志

宋蔡忠惠祠在莆田縣南廂蔡宅成化六年巡撫都御史滕昭重建弘治七年知府王弼拓建堂廡又贖田地六畝餘水池二口以供祀事嘉靖壬戌兵燬隆慶六年十七世孫賓志豪元旦呈于巡按御史杜化申行郡給祭租羸金重修其子孫皆聚居祠後巷口有忠惠坊

興化府志

莆田縣南廂地名蔡宅宋端明學士蔡襄舊居王

十朋詩云懷章南過鄭公鄉駐馬遙瞻數仞墻丹荔株株經品藻喬松夜夜惠清涼四賢詩出人增氣三諫章成國有光真是濟川三昧手清涼遊戲

作虹梁

梅溪集

僊遊縣蔡忠惠祠在儒學遵道堂之東知縣鄭肇之建

興化府志

二賢祠在莆田城隍廟左成化間巡按御史尹仁建祀宋名賢陳俊卿蔡襄二公

興化府志

蔡端明墓在楓亭蔡山宋勅葬公及夫人於此矣

忠公歐陽修銘成化六年都御史滕昭修建饗堂
立碑學士柯潛記正德五年提學副使楊子器重
修七年提學副使姚謨更立神道碑九年叅議鄭
毅置墓祀田

興化府志

朱文公謁端明侍郎蔡忠惠公祠文云惟公忠言
惠政著自中朝筮仕之初嘗屈茲郡歲時雖久稱
思未忘厥有遺祠英靈如在熹雖不敏實仰高風
蒞事之初敬修禮謁謹告

朱子大全

惠安伏馬岩南崑崙山南石室幽絕蔡忠惠公母

盧氏爲邑人忠惠嘗讀書于此

泉州志

真文忠公德秀謁蔡忠惠祠祝文曰惟公兩牧是
邦德政在閩至今未泯其實何人亦叨再至緬懷
遺蹟可效可師朝夕恪恭庶幾萬一

西山文集

謁蔡端明文惟公以忠言惠政著于中外至和之
世實自畿甸來守此邦以便親輿之奉流風善政
人到于今稱之某之視公無能爲役然間者九重
假寵之意明著訓詞實用仁祖命公故事顧惟不
佞將何以堪之惟當仰止高風以庶幾其萬一英

靈如在尚聞斯言

西山文集

顧大典爲閩督學使者過萬安橋謁蔡端明祠云
滄波欲盡海雲垂千尺晴虹挂水湄寂寞寒潮自
來去行人惟說蔡公祠魚子腥聞山市近彌房寒
浸海潮生日暮驅車橋上過斷腸秋色似江城顧
吳江人吳江有垂虹橋長顙萬安故云

顧公遺稿

忠惠坊在蔡宅宋蔡襄舊居于此郡爲立坊以其
謚名國朝成化間巡撫都御史滕昭重建上二坊
在府城西南南廂

通志

仁宗朝公以便養知泉州架洛陽橋先是公爲閩
部使者夾道種松以蔽蔽毒閩人卽橋傍作堂以
祠之又作詩二章俾歌以祀公一曰道邊松大義
渡至漳泉東問誰植之我蔡公歲久廣蔭如雲濃
甘棠蔽芾安可同委蛇天矯騰蒼龍行人六月不
知暑千古萬古長清風一曰洛陽橋一望五里排
琨瑤行人不憂滄海潮衝衝往來乘仙飈蔡公作
成去還朝玉虹依舊橫青霄考之溱洧功何遼千
古萬古無頃掇

方輿勝覽

徐節孝先生輓蔡學士詩四首其一十分星孤隴
虞廷鳳不還金龍拋使節玉筍誤朝班世德元明
後家聲王謝間國功圖未卒歸老負江山其二命
也雖亡矣但須銘此墳朝中尋故事江外訪遺文
遠思歸流水高風寄白雲忠魂在斯否義亦不忘
君其三舊業儒編富新裝使索空潔身辭白日隨
柩載清風義與人心在名須江水窮諸山同峴首
有子勝羊公共四且止明旌住玄堂卽閉關素絲
蒙柩往白堊洗車還身後千詩在生前萬事閒松

陵哀怨客來吊自湖山

節孝文集

曹學佺過萬安橋謁蔡忠惠祠云功成前太守行
者每咨嗟石峻猶成堡潮平祗似槎奔星閱車馬
成市集魚蝦獨爲看碑入祠傍日易斜

石倉集

徐燏過洛陽觀造橋碑云路盡平疇水色空飛梁
遙跨海西東潮來直湧千尋雪日落斜橫百丈虹
郊野尚畱棠樹綠歲時猶薦荔枝紅行人幸不爲
魚鱉細看豐碑利涉功

紅雨樓集

徐燏謁蔡忠惠公墓云松栢蒼蒼翳古塋行人猶

說宋端明六陵骨朽冬青死落日寒雲空汴城

紅雨

樓集

王十朋過洛陽橋云北望中原五里遙南來喜見

洛陽橋人行跨海金鰲背亭壓空江玉虹腰功不

自成因砥柱

中流有
若石

患宜預備有風潮

紹興戊午
嘗為颶風

暴雨

所壞蔡公力量真剛者遺愛勝於鄭國僑

王梅溪
集

王十朋謁蔡端明祠云公昔自禁從再來臨此邦

河梁一何壯筆力獨能扛政績畱南紀祠堂枕大

江山川與人物今古兩無雙

王梅溪集

陳傅良題洛陽橋云跨海為橋布石牢那知直下

壓靈鰲基連島嶼規模壯勢截淵潭氣象豪銕馬

著行橫絕漠玉鯨張鬣露寒濤縑圖已幸天顏照

應得元豐史筆褒

止齋集

縣之北三里有故家為林氏門安綽楔出南郭可

五里端明蔡公有舊第熟視雙闕者不覺歛容過

蔡公之門或立馬低回不忍去夫以南北通塗數

里中乃得此若求之井邑聚落所得又益多此圖

經所由出也

林艾軒集

興化府治西南有壺公山古讖曰水遶壺公山莆
陽方好看壺公山欲斷莆陽朱紫半蔡君謨興水
利灌民田引水遶壺公山而登第者比前爲多繼
而李宏築陂以興水利鑿山而濬遂多通顯故雖
山川之形勝亦若有造物以尸之者世運盛衰于
此乎見 搜神秘覽

劉屏山先生過洛陽橋詩曰跨海飛梁疊石成曉
風十里度瑤瓊雄如建業虎城峙勢若常山蛇陣
橫脚底波濤時洶湧望中煙嶼晚分明往來利涉

歌遺愛誰復題橋繼長卿 屏山集

陳仲溱謁蔡端明墓云鬱鬱佳城雲不開峩峩華
表鶴空回銀魚隱見藏丘隴石馬荒涼臥草萊望
斷楓亭勞下拜讀殘荔譜轉堪哀千秋忠惠名猶
在却恨端明殿已灰 陳惟泰集

馬欵謁蔡忠惠墓云野蒿秋草翳殘碑落日烏啼
宰樹悲來往行人知下馬感恩都在過橋時又過
洛陽橋謁祠云長橋高跨覺天低千尺洪濤響拍
堤海岸沈雲迷遠近石城依島接東西日含暮色

盤龍影風吼寒聲亂鳥啼遺廟丹青千古在行人

爭看碣中題

馬季聲集

僊遊楓亭驛在縣南五十里唐爲風亭館宋嘉祐間增建廳事名太平驛端明蔡襄爲記元改楓亭

驛

興化志

洛陽橋中流一小石山列以亭館可供遊玩月之夕風之晨溪注潮生景物奇絕東南一大觀也撫景擊節成一歌曰洛陽之橋天下奇飛虹千丈橫江垂西有滾滾萬壑流波之傾注東有瀕瀕澎湃

潮汐之奔馳石梁亘其上震齧永不移千秋萬歲功利溥直與天壤無休期巍然巨石中流峙羣神百靈共栖止約束濤浪鞭蛟螭雄鎮東南數千里遙望扶桑海日升山頭松栢常青攬衣登躡還四顧使我醉眼惺然醒天空雲滃滃滄海濶東風吹雲海水裂宇宙神物能有幾如此大觀亦稱絕蓬萊仙闕蛟人宮夜半仙人騎玉龍倘于石上求奇事爲言狂客留題處

凌登名榕城隨筆

公刺泉美政不可殫述最昭昭留人耳目者惟所

造萬安渡石橋與當年勒岸左書記一百五十二
字至今如新河洛之思已足不朽况今得公之全
集以行於世也余獨怪公之文可廁歐蘇曾王之
間乃散佚漫患幾不復傳宋乾道世公歿未遠王
梅溪公來守泉過莆入晉訪公遺文則郡與學皆
無之亦得之莆陽世家乃授錄事與蔡伯達公今
日舉合轍梅溪公檢之當代之年蔡公表章隔世
之後梅溪公與公同官同地蔡公與公官同地同
姓同人謂蔡公爲公後身斯集之傳神授非耶

黃論

德雙甕齋文集序

述異

蔡君謨作福州守日有一書生投詩來謁云遠入
青青疊疊峰峰前真宰讀書宮半岩冷落高宗雨
一枕淒涼吉甫風烟鎖豹眠閒霧露井凋鳳宿舊
梧桐九龍山下英雄氣盡屬君家世胄中君謨異
之尋令人伺其所歸至一山下忽不見四顧無人
惟一社屋爾意其社神

墨莊漫錄

蔡君謨知福州以疾不視事者累日每夜中卽夢

登鼓角樓憑樓而睡通判有怪鼓角將累日不打
三更者因對數夜有大蛇盤據鼓上不敢近君謨
既愈與通判言所夢正與鼓角將所說同遂以君
謨爲蛇精

東齋記事

景祐三年五月癸卯日君貺公期道滋先來登祥
源東園之亭公期烹茶道滋鼓琴余與君貺奕已
而君謨來景純穆之武平源叔仲輝損之壽昌天
休道卿皆來會飲君謨景純穆之壽昌遂畱宿明
日子野始來君貺公期道滋復來子野還家餘皆

畱宿君謨作詩道滋擊方響穆之彈琴秀才韓傑
居河上亦來會宿

歐陽公于役志

某自南行所幸老幼皆無病恙風波不甚惡凡舟
行人所懼處皆坦然而過今至此嚮夷陵江水極
善亦不越三四日可到久聞好水土出粳米大魚
梨栗柑橘茶筍而縣民一二千戶絕無事罪人得
此爲至幸矣祗是沿路多故舊相識所至牽率又
少使人作書入京公期始約今冬赴絳州必非久
行矣每憶君謨家會頗如夢中未知相見何時惟

自愛而已

歐陽公與薛公期書

歐陽永叔與劉侍讀原父書云蔡君謨自南歸幡然一叟相見惟互相驚歎而已西齋自去逮今遂不復啟其他可知也

歐陽文集

福州幽岩寺千人麪床君謨作帥因聖節遣人昇置使厨久之院僧禱護伽藍神春會動無麪床何以聚衆施利不至神亦何依一夕公獨坐便齋神聲諾而不見形問何人神對幽岩每歲恃春會以瞻衆願請麪床以歸公領之明日公庫中夜失麪

床令問幽岩果已還院莫不異之

泊宅篇

盱江李覲一日與處士陳烈同赴蔡君謨飲時正春妓皆在後圃賣酒君謨因命以佐飲烈已不樂酒數行衆妓方歌烈踰墻而遁覲座上賦詩有山鳥不知紅粉樂一聲檀板便驚飛之句後烈聞之遂投牒云李覲本無士行輒造賓筵詆釋氏爲妖狐指孟軻爲非聖按聖經云非聖人者無法可依明教肆諸市朝君謨覽牒笑謂來者云傳語先生今後不復使弟子也

道山清話

蔡君謨嘗夢爲虎所逼有一人救之虎旣去與之坐曰公貴人也但頭角不正手爲按之曰骨已正矣翼日李士寧道人謁君謨謂曰夜夢頗驚惶否君謨愕然視其狀乃夢中逐虎正骨者遂叱之此蓋方術家幻惑人之事爾

江寧志

陳亞少卿維揚人善詩什滑稽尤甚嘗遇蔡君謨于金山僧舍酒酣君謨題詩屏間曰陳亞有心終是惡卽索筆對曰蔡襄無口便成衰

唐宋遺史

陳襄鄭穆與陳烈周希孟皆閩人以鄉行稱閩人

謂之四先生烈尤爲蔡君謨所知嘗與歐陽文忠公共薦于朝由是知名然烈行怪多僞蔡君謨母死烈往吊其家匍匐而進人問之曰此詩所謂凡民有喪匍匐救之者也

石林燕語

曾魯公慶曆間道杭州至天竺瞻禮中途見衣素婦人謂同行僧元達曰上座同曾舍人來耶舍人五十七入中書語訖不見已而如其言實觀世音靈現也旣而蔡端明襄出守杭州曾公以錢十萬爲扁求蔡公書靈感觀音院

咸淳臨安志

至和元年四月二十日夜夢蔡紫薇君謨同在閣
下食櫻桃蔡云與君及此再食矣夢中感而有賦
覺而錄之朱櫻再食雙盤日紫禁重頒四月時滉
朗天開雲霧閣依稀身在鳳凰池味兼羊酪何由
敵豉下尊羹不足竒原廟薦來應已久黃鶯猶在
最深枝

宛陵集

蔡君謨守福州上元日令民間一家點燈七盞陳
烈作大燈長丈餘大書云富家一盞燈太倉一粒
粟貧家一盞燈父子相對哭風流太守知不知猶

恨笙歌無妙曲君謨見之還與罷燈

晁氏客語

閩中洛陽橋圯發石有刻文云石頭若開蔡公再
來鄞人蔡錫者永樂癸卯鄉試中式入胄監仁廟
以學行授兵科給事中陞泉州知府錫至欲修橋
橋跨海工難施錫無可爲計欲以文檄海神忽一
醉卒趨蹠而前曰我能齋檄往復乞酒飲大醉自
没于海若有神擎捧之者俄而以醋字出錫意必
八月二十一日酉時也遂于是日舉工潮旬餘不
至工遂成語載錫本傳中此實事也人不知而以

事附蔡端明且以爲傳奇中戲妄之語非也後錫
官至都御史以才廉聞

薛氏筆語

吳興蔡伯達先生名善繼萬曆末年出守泉州刻
公遺稿于雙甕齋自爲序曰不佞繼初令莆陽爲
公故里得納交于公之子孫茲守是邦爲公舊遊
得領公之遺子而撫臨之而又與公同姓雖彭城
不譜弘農瑯琊不譜太原繼何敢妄自攀附然於
公不可謂無夙緣公之盛德大業懿謨風政愧無
能適求光大公之遺文不可當吾世令湮沒而不

傳

雙甕齋集序

逸編

蔡忠惠公云事父母之道曰孝天之性也事君上
之道曰忠人之義也猶耳目心腹有身則有之非
外物也邇代以旌賞勸其孝爵祿勸其忠則孝非
天之性忠非人之義矣猶無耳目心腹豈爲人歟
乃亦若鷺白鳥玄益物之本然也苟染而色之何
可長也惟忠與孝待勸而行詎至孝至忠乎夫忠
孝者感天地動鬼神故有冰魚寒筍之事返風起

禾之應或飾名沽譽雖勸諸亦可捨諸則三五之
世忠孝多由於性三五之後忠孝多由於勸也勸
之尚不能况不勸乎 自警言編

公跋唐榻賜本蘭亭帖云蠟本雙鈎之法世皆不
傳惟唐翰林院所摹帖中用之此蘭亭蓋當時榻
賜侍臣者卷首尾三印曰賜書翰林院文字延資
庫之印又有一時官吏署銜名其詳審如此決不
失真矣嘉祐元年正月望莆田蔡襄題 蘭亭考

蘭亭摹本秘閣一本蘇才翁家一本周越一本有

法度精神餘不足觀也石本惟此書至佳淡墨稍
肥字尤美健可愛或云出於河北李學究家今王
公和所藏也蔡襄 蘭亭考

公與李太白書云襄頓首啓襄才識不能過人天
子悞知擢直諫列每自念孤賤之迹旁無尋尺之
助一旦名徹萬乘而收錄之此宜如何報効也示
及庸奴非所謂難言但未得其詳耳足下業已發
之當爲寃之至詢他人果詐不虛必逃去矣就令
不逃必生奸計莫如密得其詳擿之以寘于法于

時不爲無補行路疲憊草草裁荅足下取其意略
其禮也襄頓首啟二十三日夜

盱江外集

襄啟近承從者之勞過臨海郡適以久疾無悰爲
禮疎略遽此離間豈勝慙跂春寒道上愛護爲佳
不宣襄頓首李君足下二十日

盱江外集

與知郡司門十一月二十八日襄頓首別已經年
每踈馳問但極瞻跂之懷人至承書窺攬詞意豈
勝感著夏聞郡事清閒總適神情自有高趣仰羨
仰羨郊燔甫近天氣變寒惟眠食珍攝剛此遠想

不具襄再拜

帖選

僕自四月以來輒得脚氣發腫入秋乃減所以不
辭北行然于湖山佳致未忘耳三衢蒙書無便不
時還荅慚悵慚悵此月四日交印望日當行襄又
上

停雲館帖

公跋范文度模本蘭亭叙云右軍蘭亭最著今世
尚有搨本秘閣一本蘇才翁一本周越一本猶有
氣象存焉今觀撫倣蓋得之矣嘉祐壬寅五月廿

六日莆陽蔡襄

集古錄

公跋隋下道護啟法寺碑云此書兼後魏遺法與揚家本微異隋唐之交善書者衆皆出一法道護所得最多楊本開皇六年去此十七年書當益老亦稍縱也甲辰治平初月十日莆陽蔡襄記 書譜
公爲歐陽文忠公跋石鼓文云嘗觀石鼓文愛其古蹟物象形勢有遺思焉及得原甫鼎器銘又知古之篆字或多或省或移之左右上下惟其意之所欲然亦有工拙秦漢以來裁歸一體故古文所見者止此惜哉治平甲辰正月莆陽蔡襄 書譜

澄心堂紙一幅潤狹厚薄堅實皆類此乃佳工者不願爲又恐不能爲之試與厚直莫得之見其楮細似可作也使人只求百幅癸卯重陽日襄書 古香齋帖

襄拜今日扈從徑歸風寒侵人偃臥至脯蒙惠新萌珍感珍感帶胯數日前見數條殊不佳候有好者卽馳去也襄上公謹太尉閣下 又牯犀作子一副可值幾何欲托一觀賣者要一百五十千 停雲館帖
襄啟暑熱不及通謁所苦想已平復日夕風日酷

煩無處可避人生韁鎖如此可歎可歎精茶數片
不一一襄上公謹左右 停雲館帖

蒙惠水林檎花多感天氣暄和體履佳安襄上公

謹太尉左右

古香齋帖

襄再拜伏承縣君吉葬有日襄以行路并亡男齋
僧赴期不及謹遣州校少持菲禮聊以伸親戚之
好殊非豐腆深自爲愧謹奉手狀咨聞旦夕前行
此不一一襄上郎中七兄左右 幻閣帖

分及果實多感多感吳菱三十枚吳中謂之折腰

菱附去襄上太保足下

古香齋帖

襄啟自離都至南京長子勾感傷寒七日遂不起
此疾南歸殊爲榮幸不意災禍如此動息感念哀
痛何可言也承示及書并永平信益用悽惻旦夕
度江不及相見依詠之極謹奉手啟爲謝不一七
月十三日襄頓首杜君長官足下 古香齋帖

魯公末年告身忠賢不得而見也莆陽蔡襄齋戒
以觀至和二年十月廿三日 古香齋帖

子敬能作方丈字觀其細書巧妙方丈不足爲大

令右軍法雖同其放肆豪邁大令差異古人用功

精深所以絕迹也治平三年三月廿八日襄

跋洛神賦

襄啟大研盈尺風韻異常齋中之華繇是而至花盆亦佳品感荷厚意以珪易邽若用商於六里則可真則趙璧難捨尚未決之更須面議也襄上彥猷足下甲辰閏月廿一日

幻閣帖

自到軍城此兩日出入兼爲尋地去一兩處然未甚安只是疲乏欲趁未赴任閒了却葬事又難得地極是縈心也五娘子謝得衣物郡太尚在風亭

未來暑熱且好將息吾病勢亦當漸退不要憂心

書送大姐

又

萊州角石畫尊十隻北席一領寄去

外祖端明墨妙計七紙東山謝峒家藏

古香齋帖

襄再拜京府叢碎蚤夜不遑瞻仰門祭情誠雖勤記牘之禮殊爲曠闕近者伏承移鎮并門寄倚固重想在私庭迎侍非便襄畱京四年出入省闈不爲不久何嘗不以裨國致君爲念才薄智窮無助萬一奉親還家庶幾伸人子之志耳已蒙朝恩遂請尚遷職名方辭避未知允否得身舩即便離都

遁居海濱無復來期瞻望台座不勝傾依之至不
宣三月廿六日襄上宣徽太尉閣下 看鏡樓帖

襄啟秋暑猶盛不審動止佳否葉遷回正且蒙示
書信感荷之至門中休豫老親已下各得平善省
廷日來事緒漸簡今夏病軀全獲輕安鄉親未及
一一通書因會集爲言懸懸不宣襄啟親家茂才
足下七月十二日 看鏡樓帖

襄泣血言逆惡深重扶護南歸死亡無日不可循
常禮不通誠意於左右今至富陽平安明日登舟

或雨水少增當舟行至三衢也襄素多病遭此荼
毒就令不死足膝日甚氣力日衰亦爲廢人豈復
相見耶辱君知愛之心不殊兄弟一令哀痛哽塞
何言比在道程頓官員勾當齊整無一闕乏感惕
感惕襄叩頭子發郎中足下十二日 王弁州家藏帖
襄啟去德于今蓋已游歲京居鮮暇無因致書第
增馳系州校遠來特承手牘兼貽楮幅感戢之極
海瀕多暑秋氣未清君侯動靖若何眠食自重以
慰遐想使還專此爲謝不一不一襄頓首知郡中

舍足下七月八日

古香齋帖

襄得足下書極思詠之懷在杭留兩月今方得出
關歷賞劇醉不可勝計亦一春之盛事也知官下
與郡侯情意相通此固可樂唐侯言王白今歲爲
游閩所勝大可怪也初夏時景清和願君侯自壽
爲佳襄頓首通理當世屯田足下

浪齋帖

襄啟近曾明仲及陳襄處奉手教兩通伏審動靜
安康門中各佳喜慰至虹縣以汴流斗涸遂寓居
餘四十日今已作陸計至宿州然道途勞頓不可

勝言尚爲說者云渠亦當有涯計亦不出一二日
或有水卽假輕舟徑來卽無水便就驛道至郡乃
有期耳聞吳大屏皆新除想當磐留少時久處京
塵無乃有倦游之意耶路中誠可防虞民饑鮮食
流移東方然在處州縣須假衛送老幼並平善秋
涼伏惟愛重不宣襄頓首郎中尊兄足下謹空入

月廿三日宿州

幻閣帖

襄啟入春以來屬少人便不得馳書上問唯深瞻
想日來氣候陰晴不齊計安適否貴屬亦平安襄

舉室幸去冬大寒出入感冒一身百病交攻難
可支持雖入文字力求丐祠今又蒙恩復供舊職
恐知專以爲信前者銅雀臺石研十三兄欲得之
可望寄與旦夕別尋端石奉送也正月十八日襄
頓首公綽仁弟足下大餅極珍物青甌微粗臨行
邑邑致意不周悉謹空

古香齋帖

襄啟中間承勞紆問適會疾未平殊不從容示書
兩通知煩指幹新第有未備且與鑄鑰却候別作
一番併了之四人園子只與門下每人一間

幻閣帖

襄上一哥制幹連弓山中從容至適所無也遽別
益用懷企是晚亦得下山方念走訊而專帖已墮
前矣河豚甚富甚鮮與諸人大嚼無不贊美市賈
甚竈爲帑人累爲有媿耳香餅巴脯方糖霜餅範
皆遣去幸視入宰座處極荷重言亦已從郡中投
詞以應之矣見鏹頓有隨冶無之芥拾菴中固嘗
與言矣大儒欠通世務未易救療爲可惜耳一事
目屬心至達其中無曲折云

浪齋便錄

李西臺去唐未遠猶有唐人餘風歐陽公居然見

文章之氣蔡端明如周南后妃容德兼備蘇子美
如古之任俠氣直無前東坡如老罷當道百獸畏
伏
趙子昂評書



蔡端明
趙子昂印



國家圖書館, NATIONAL CENTRAL LIBRARY, TAIWAN, R.O.C.